

**ASO LULU, 23 IANUARI 2019**

*Na nofoia le Nofoa e le Fofoga Fetalai i le itula e 9:13 i le taeao.*

Tatalo.

**FOFOGA FETALAI:** Ou te faasilasila atu ua toe amatalia nei Taulumaga a le Fono Aoao Faitulafono.

**TUUINA ATU O LIPOTI A KOMITI FAA-PALEMENE**

*Na tolaulau e le Failautusi Lipoti a Komiti Faa-Palemene ua faataatitia i luga o le Laulau a Fono e tusa ai ma le T.T.52(5).*

1. P.P.2018/2019 Nu.120, Lipoti a le Komiti o Tulafono Tumau, Mataupu tau Faiga Palota, Talosaga ma Tofiga Faale-Faavae i le Tulafono Tau Faaofi o Teuteuga o le Faavae (Nu.2) 2018.
2. P.P.2018/2019 Nu.121, Lipoti a le Komiti o le Vaega tau le Tamaoaiga i le P.P.2018/2019 Nu.55, Lipoti Faaletausaga a le Ofisa o Fuainumera Faamauina mo le Tausaga Faaletupe na faaiuina i le aso 30 Iuni 2017.
3. P.P.2018/2019 Nu.122, Lipoti a le Komiti o le Vaega tau le Tamaoaiga i le P.P.2018/2019 Nu.60, Lipoti Faaletausaga a le Faalapotopotoga o Eleele a Samoa mo le Tausaga Faaletupe na faaiuina i le aso 30 Iuni 2017.
4. P.P.2018/2019 Nu.123, Lipoti a le Komiti o le Vaega Tau i le Tamaoaiga i le P.P.2018/2019 Nu.61, Lipoti Faaletausaga a le Matagaluega o le Va i Fafo ma Fefaatauaiga mo le Tausaga Faaletupe na faaiuina i le aso 30 Iuni 2017.
5. P.P.2018/2019 Nu.125, Lipoti a le Komiti o Tulafono Tumau, Mataupu tau Faiga Palota, Talosaga ma Tofiga Faale-Faavae i le Tulafono Tau Faaofi o Teuteuga o le Faavae (Nu.1) 2018.
6. P.P.2018/2019 Nu.126, Lipoti a le Komiti o Tulafono Tumau, Mataupu tau Faiga Palota, Talosaga ma Tofiga Faale-Faavae i le Tulafono Tau Faaofi o Itumalo Palota 2018.

**TUUINA ATU O TALOSAGA****Talosaga Faamaualalo a Alii ma Faipule o Tafua**

**FOFOGA FETALAI:** E tusa ai ma le Tulafono Tumau 57(2), o le a faapitoa se faamatalaga puupuu a le Sui Usufono e tuuina mai le Talosaga. Ia saunoa i mataupu patino ua taua e faapea:

- (1)vaega o tagata e sau ai le talosaga;
- (2)aofai o e o lo o saina o latou suafa;

23 IANUARI 2019

### Tuuina atu o le Talosaga

(3)uiga moni o mea o lo o aofia i totonu o le Talosaga;

(4) faitauina mai o le manaoga o le Talosaga.

Tulai mai le sui usufono mo Palauli le Falefa.

**Afioga Hon FAUMUINA TIATIA FAAOLATANE LIUGA (Palauli Le Falefa):** Lau Afioga i le Fofoga Fetalai, tatou te auai faatasi i le talosaga na e molia i lenei taeao i lo tatou Tapaau i le Lagi, ua e toto ai le taamu teevao i lo tatou va tapuia ma lo tatou Atua e faafetai ai i Lona alofa ma Lona agalelei ua taitai mai ai lo outou soifua ma so matou ola i lenei aso o le tatou Fonotaga Faa-palemene.

Lau Afioga i le Fofoga Fetalai, i lou faaaloalo tele, ou te tuuina atu ai le Talosaga Faamaualalo a Alii ma Faipule o Tafua e tetee atu ai i le Tulafono Tau Faaofi o Itumalo Palota 2018, ma o lo o sainia e matai e toa 93. O le manao o lea Talosaga,

Ina ia faatumauiina pea Tafua i le Itumalo Palota o Palauli le Falefa, e pei ona uluai faia e le Fono Faavae i le aso 28 Oketopa 1960.

Lau Afioga i le Fofoga Fetalai, e tusa ai ma le Tulafono Tumau 57(3) ou te faatu ai le lafo ma lou faaaloalo tele, *Ina ia faitauina le Talosaga ua tuuina atu mo le Palemene i lenei aso.*

Ma lou faaaloalo lava lau Afioga i le Fofoga Fetalai.

**FOFOGA FETALAI:** Se i tulai mai lau Afioga i le Sui Palemia.

**Afioga Hon Fiamé Naomi Mataafa (Sui Palemia):** Lau Afioga i le Fofoga Fetalai, e agatonu a Manua o le fesili. O lea ua matauina ua sosoo nei taeao e lua o amata la tatou Fonotaga i le faitauina o nisi o Talosaga. Ua fai foi sina umi o i ai i le Palemene o se mea e seasea ona tupu, ae o lea faatoa tapa atu nei lo tatou Ofisa mo le tatou Pepa o Galuega, a o le aso ananafi sa le i faaalua i le tatou Pepa o Galuega le Talosaga sa faitauina. O lea sa ou tilotilo atu i le aso lenei, e le o i ai foi i le tatou Pepa o Galuega. O le fesili la lau Afioga i le faagasologa o a tatou galuega, po o le a le faatinoga o tatou mataupu faapea aua o lo o i ai foi le isi mataupu i a tatou Tulafono Tumau, aemaise pe a faapea o lo o tagofia le Tulafono o le Tupe, e ave lava le faamuamua i le faagasologa o galuega a le Palemene i le Tala o le Tupe.

E pei o itu ia lau Afioga i le Fofoga Fetalai na o le faafesili atu ma le faaaloalo ina ia manino le faagasologa ma le tulaga o galuega a le tatou Maota Fono.

**FOFOGA FETALAI:** Malo faafetai. Malo le taulagalaga i le faatulagaina o galuega a le Fono Aoaofa Fautulafono. Ma o lo o maua le tuuina atu o Talosaga i le faagasologa o galuega a le Palemene i le Pepa o Galuega.

Ae talu ai ona o lona lua lau Afioga i le Sui Palemia, ona o talosaga e tuuina mai e le o ni galuega tau le faasologa o Galuega o le Aso Tau le Malo, e faapena ona tuuina muamua i aile avanoa itiiti na ona faataatia ma fofoga i totonu o le Palemene ae o lo o faapena ona oo atuai lea o le faasologa i Tulafono a le Malo mulimuli ane.

23 IANUARI 2019

### Tuuina atu o le Talosaga

E leai la se Tulafono e muamua ona talanoa i totonu o le Palemene, vagana ai le Tala Faatatau Faaopoopo o le Tupe. O le mea la lea e tau faapupula atili ai lea tulaga. A o talosaga foi e pei ona tuuina mai, e le o po se lilo, o lea foi ua faataatia i luma o le Laulau a Fono a le Palemene Lipoti a Komiti Faa-palemene. O lea ua aumai ai ma le lipoti e uiga i faiga palota ma le tatou Faavae. Ae talu ai e manatu le Fofoga Fetalai, masalo o le finagalo foi lea o le Palemia ma le Kapeneta ma le Palemene, aua tatou te fanaina i le tuitui le finagalo o le atunuu. E ui lava ina ua vaeseuga ma ua faapena ona agiga i malae ma le faafofoga a le atunuu, e le gata i le Palemene, a o le saunoaga foi a sui usufono i le latou faatalanoa ai ao faafofoga mai Samoa i luga o le ea, aemaise foi o le malaga atu e feiloai ma itumalo ma nuu aemaise foi o fonu a Sui o le Malo ma Sui o Nuu, ua faapupula atili ai leni mataupu, ma le agaga autu ma le mafuaaga e manatu ai le Malo ina ia fetalai le tofa mai lea taimi i lea taimi e faatino ai tatou Tulafono e talafeagai ma le manao. Aua o lo outou maualuga lava o lo o outou saunoa i sui usufono mamalu uma, ae a pe a lua sui usufono mo Aiga i le Tai, ae a pe a lua sui usufono o lea itumalo, ae a pe a tasi ia le palota tasi le sui usufono. Ae a pe a tatou faa-Samoa uma aua ne i toe i ai se palota foi lea Taitoatasi. O lea la ua silasila le Malo i se auala e fofo ai faafitauli ma faamalieina ai manao uma o le atunuu ua talafeagai ma lo tatou taimi. Ae ua manatu e talia le tulaga o le Talosaga i le aso ananafi na faatu mai mo le itumalo o Saleaula e faapea foi le Talosaga o lo o loma nei pei ona tulai mai ai le sui faatulai mai mo le Talosaga a Tafua. O le manatu lena i lo tatou avafatafata, aua le fanaina i le tuitui ae lafo mai pea e ave i le Komiti se i aumai foi so latou finagalo pe mata o le a se isi suiga.

Ae o le taeao nei, o lea ua faataatia i luma o le Palemene le Lipoti a le Komiti o lea ua aumai ai ma le latou fautuaga. O lona uiga, o lea ua aumai le Tulafono i totonu, ae le taofia ai aua e faapena lava uiga o le soifuaga, e le i fausia Roma i se aso e tasi, ioe. Ae faamalulu atu i le tulai mai o le Afioga i le Sui Palemia, e tonu ma sao lou finagalo, ae pei o itu ia e mafua ai ona manatu le Fofoga Fetalai, ina ne i tau le pua ma lafo mai foi e le atunuu, ae pei o se agaga lea. Ia, e le o sou tiute lea o le tau faamalamalama, ae o le mea e malamalama a le sui usufono o le itumalo ia o la e faatulai mai le talosaga. Ioe, e pei e faapena se lagona. Ae ui i lea, o lea e le i faaluaina, ae mafai ona tetee mai se isi, pe faalua foi.

**Afioga Hon Fiamē Naomi Mataafa:** Lau Afioga i le Fofoga Fetalai, o le agaga o le faafesili e le o faapea e tetee i le faatulai mai o talosaga aua o lea e avanoa i lalo o tatou Tulafono, Standing Orders. Ae o le ala o mea i a tatou galuega a le Palemene. Aua e ala ona iloa e matou o sui usufono ma le atunuu, o a mataupu o lo o tagofia i lea Fono ma lea Fono, o le tatou Pepa o Galuega, o le notice lea e silafia ai mataupu o lo o loma mai i le faagasologa o a tatou galuega. E pei o le itu lena lau Afioga i le Fofoga Fetalai, pei e le o aloaia le aumaia o mataupu ia i totonu o galuega o le aso o le tatou Fono. Ma e avatu ai sa matou talosaga, leai e pule lava lau Afioga i le faagasologa o le tatou galuega, ae lelei le faamau mai pea i le Pepa o Galuega i aso taitasi, e manino i ai i matou ma sauni atu ai foi sa matou tala ma sa matou faamatalaga e uiga i mataupu o lo o tulai mai i lea taimi ma lea taimi.

**23 IANUARI 2019**

### Tuuina atu o le Talosaga

Na o le pau lea o le auga o le tulai atu e fia malamalama i le faagasologa o mataupu ia tau talosaga o lea ua sosoo nei aso o aumai ae le o i ai i la tatou Pepa o Galuega.

**FOFOGA FETALAI:** Malo faafetai. Ia, se i tulai mai le Taitai o le Maota, lau Afioga i le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, o lena ua tulai atu le sui Palemia, o lena foi ua manino lau faaaliga. Sa tau i ai lava sina tei i le aso ananafi, e pei ua manatu foi lele, e tilotilo atu ii le tatou failautusi, e pei o lea ua fesui ai kia. Ona faapea ai lea, o mea lava faapea e ono i ai le sisi. Sa i ai lava le agaga e faapena e pei ona laga foi e le Sui Palemia. E pei o le tatou ava fatafata foi lea e faaaliga i totonu i le tele o mea, ia o le ava fatafata foi e tele ina sese ai mea. Ae mafai lava ona tatou alu sese ai pea. Ae o le tulaga foi i mea ia ua taotooto, e aofia ai ma le talosaga lea na aumai nei i le taeao, e leai e le fana i se tuitui e fana i le pomu, pe a oo i le taimi e oo atu i ai le leo aemaise o mataupu ua uma ona talanoaina, ua uma foi ona talia. O le a ou talanoa i ai i se taimi i le tele o sitepu na fai ai teuteuga tetele a lo tatou Malo. Ina ia fofu le mataupu lena e oo i le faavavau.

O lea o le a agai atu tatou i le onosefulu tausaga talu ona tatou tutoatasi. E laga lava le mataupu lea, o le lua tolu fa nofoa o itumalo. O lea la ua agai le Malo e fofu le mea lea, once and for all. A matau mai i le saunoaga umi a le Minisita o Tulafono ma lau faamalamalama, e matua maioio lava. O fofu ia na fai e lo tatou Malo ia Samoa atoa le Palemene lena, ia na o matai. O lea ua uma ona ausia le laasaga tele lava lena, lea na tuu mai e i latou na fausia le faavae, faia e latou nisi mea ae lafo mai nisi vaega i le taimi e tatau ai. O le laasaga lona lua, o le agai loa o lo tatou Malo, ina ia faasao le mea lea ma faatulaga loa i le tulaga na i ai, ua uma le taimi o le faataitai. E tasi le itumalo, tasi le nofoa tasi le tagata tasi lana palota, o le sitepu lona lua lena.

O lea la ua tatou agai mai i le sitepu faaiu, o le sitepu lena e fofu uma ai mea ia e oo i le faavavau e le toe laga i totonu o le Palemene, le mea lea o le lagalaga mai peae itumalo, e tailua taitolu taifa o latou sui. O lea la ou te vaai atu o le matua faatamala lava o sui usufono ia e tulai mai e aumai mea faapea i totonu o le Maota. Ae o le a lafo atu i le Komiti, ana faapea e le i Minisita sui usufono ia, e tau talatuu mai. Ao e sa Minisita e malamalama lelei e le faapaole ona tagofia e le Kapeneta mea faapenei, e le faapaole, aemaise ua taoto, maioio laasaga tetele, o laasaga ia e le tagofia gofie, alo uma ai lava faigamalo i aso ua tuanai. Aisea? E mumusu e tago i afi. Ao le faigamalo a le HRPP o le mau a le HRPP, e na ona asu lava ae leai lava ma se isi e mu ai. O lea la ua tagofia mea ia, seivagana lava le sui usufono e na ona tino ia Esau ae leo ia Iakopo e sau i le Vaega lena ae le malamalama i mea e fai a le Vaega, ma le loloto o le faatofalaiga, o lo o faataoto i fuafuaga mamao nei.

Lau Afioga i le Fofoga Fetalai, o le tulaga lena, ae o le a ou agai i ai, e pei lava ona ou fai atu, e faataape e le pomu atomika mea nei e le fanaina i se tuitui.

**23 IANUARI 2019**

### Tuuina atu o le Talosaga

**FOFOGA FETALAI:** Malo faafetai. Ia, ona o lea e lei faaluaina le lafo. Tulai mai le sui usufono mo Aleipata Itupa i Lalo.

**Afioga Tafua Maluelue Tafua ( Aleipata Itupa i Lalo):** Lau Afioga i le Fofoga Fetalai, ua ou tulai atu i le agaga o le faaaloalo. E faamalulu atu i le Afioga i le Palemia ma le Sui Palemia, onosai mai ia mau le toovae. O lea lava ou te tau tilotilo i le Tulafono Tumau e 57(2), o lo o i ai le aiataata a soo se sui usufono e laga ai se manatu e pei ona faatu atu.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai, o sui usufono nei e aofia ai le Sui Palemia, o sui usufono nei ua leva, e aupito i matutua o le Maota lenei, e mau lava le toovae faasolo atoa. E na ona ou faasao atu faapena, e mau lava le toovae faasolo atoa. E ala ona tutulai atu, ona o le isi vaega lea o le faamasani, o le faamasani o sui usufono o le Maota i faiga faavae, i faiga faavae. E faapena ona fai atu le aumatutua ina ia malamalama lelei i faiga faavae a lo tatou Maota. E le o toe tele ni sui matutua o lo o i ai i le Maota lenei, o le ala foi lea e tutu soo atu ai, ina ia i ai se aoga. E i ai lava manatu sa faaalua i aso ua tuanai, e tataua ona groom, e tataua ona tapena i latou e taitaia le Maota lenei ma le Vaega. O lea e groom lava i aso uma, e le tau faia ni groom faapitoa, e leai e groom lava i aso uma ia tatou saunoaga faapea foi ma le toe faamanino o faiga faavae a le Maota lenei. Ae pei lava ona ou taua, o le tele lava o mea e fai e tatou, e pei e aveane le avafatafata e taotaomia ai i lalo mea e tataua ona fai.

**FOFOGA FETALAI:** Malo faafetai. E asu atu foi vai malu i puega e tusa ai o finagalo o sui usufono, ona o le tatou galuega lava lea, e faapena foi i le galuega a le Nofoa. E tulai mai loa se mea e ao ona faamalamalama, ia o tiute ia e tataua ona faamalamalama ma faasao. E faamalulu atu ai i finagalo o sui mamalu. O le tupu foi lena o le lava o le faamalamalama o se mea ma le faamaninoga o se mea, pe a faamalamalama tonu lava i le taimi o la e i se mataupu. Aua e leai se aoga e toe faamalamalama ai, ae ua maea lenei Aso Fono po o se taimi mulimuli ane. E pei o itu na, e talafeagai ai le tatou Tulafono Tumau, o le mea e tulai mai lava e ao ona faamalamalama, e le noatia e le Malo e tulai mai e faamalamalama ma faasao e pei foi o galuega a le Fono Aoao.

Faafetai atu i lau Afioga i le Sui Palemia, e faamalulu atu atonu o lena ua i finagalo le tulaga o le faagasologa o galuega.

A o le fesili po o aiif .ua tau sola foi le manatu o le Fofoga Fetalai ua tau galo foi.

*Na faamaonia le lafo.*

**23 IANUARI 2019**

**Tuuina atu o le Talosaga**

*Na tolaulauina e le Failautusi le Talosaga.*

ōi LE FONO AOAQ FAITULAFONO A SAMOA

O le Talosaga Faamaualalo a Alii ma Faipule o Tafua:

UA FAAALIA AI:

1. O matou o Alii ma Faipule o Tafua, o se tasi o nuu o le Itumalo Faaalaalafaga o Palauli le Falefa mai le tausaga 1962 na Tutoatasi ai Samoa. O leni faatofalaiga na faia e le Fono Faavae i le aso 28 Oketopa 1960, ma auai o matou tuua ua lagomau mai i tiasa.

E pei ona aiaia e le Fono Faavae 1960 le vaevaega o itumalo a Palauli ma lona Itu e aofia ai itumalo ma tamalii ma failauga sa tofia i le Iloiloga o le Fono Faavae e ona ua taua o latou suafa i lalo:

**Itumalo Palauli:**

- |                      |   |                    |
|----------------------|---|--------------------|
| 1. Tualaulelei Mauri | - | Vailoa Palauli     |
| 2. Toluono Lama      | - | Vailoa Palauli     |
| 3. Fiso Fusi         | - | Vaitoomuli Palauli |
| 4. Lagaia Faamaga    | - | Faala Palauli      |

**Itumalo Palauli Le Falefa:**

- |                           |   |                                  |
|---------------------------|---|----------------------------------|
| 1. Afioga Maposua Seilala | - | Gataivai, Palauli le Falefa      |
| 2. Afioga Matautia Ueni   | - | Tafua, Palauli le Falefa         |
| 3. Tofa Toala Mulifusi    | - | Sili/Gataivai, Palauli le Falefa |
| 4. Tofa Mauisii Sefo      | - | Papa/Puleia, Palauli le Falefa   |

**Itumalo Palauli Sisifo:**

- |                     |   |                      |
|---------------------|---|----------------------|
| 1. Tofa Tuato Poto  | - | Salailua/Siutu       |
| 2. Tofa Faiumu A    | - | Taga, Palauli Sisifo |
| 3. Matale Tuugafala | - | Palauli Sisifo.      |

2. Ua iloga le sao o ia tamalii ma failauga i upufai ma le tuufaatasia o le Faavae o le tatouMalo Tutoatasi. O le matou talitonuga, o le puipuga o le matou aiatatau e pei ona aiaia i leFaavae o le Malo Tutoatasi o Samoa,sa iloga ona finauina e sui o le matou itumalo i leFono Faavae a Samoa.

**23 IANUARI 2019**

### Tuuina atu o le Talosaga

3. O Tafua o le nuu mavae, o lo o afifio ai Tau Faasisina ma Alaala Matuatala, alalatai ai i lauaigoa matua; Ulu ma Lemaota faapea le paia i le Toiloto. Talu ai le taua tele o leneimataupu i le toe vaevaeina o itumalo faaalaalafaga po o itumalo palota e pei o le TulafonoTau Faaofi fou, ua taatia nei i le Palemene o Samoa, na masii atu ai lo matou nuu mafeiloai ma le Komiti faa-palemene o lo o feagai ma le iloiloina ma le lauliliuina o le toe vaevaeina o itumalo palota ia Iulai 2018 i Tuanaimato, Faleata.
4. O le nuu o Tafua, e tele vaega e aafia ai i le itumalo Palauli. E le gata o lo o aofiaTafua i aoga faa-itumalo o Palauli, e aofia ai Palauli Sisifo ma Palauli ma Satupaitea. i leisi itu taua o lo o aafia ai lo matou nuu o Tafua, o mea fai a ekalesia e aofia ai leEFKS e pei ona auai Tafua i le Pulega ma le Matagaluega a Palauli.
5. O vaega e laualuga i lo matou nuu, o le saogalemu ma le nofo lelei o matou tagata faapea lepuipui malu o le matou tofi, o matou eleele lea o lo o faia ai pea faamasinoga i le va o lematou nuu ma Salelologa e oo mai i le taimi nei, aemaise lava le puipuiiga o le matou aiatatau e pei ona aiaia i le Faavae o le Malo Tutoatasi o Samoa.
6. O le lola palota a Tafua e ova i le faselau i le palota o le 2016, ma e onooo atu i le limaselaupo o le sili atu foi. O le popolega i le nuu, aua afai e manumalo se sui tauva a Tafua i sefaigapalota i le lumanai, e toe lagalaga ai tuaoi eleele o nuu ma tuaoi tagata i tulaga faale-agaifanua.

O lea e faatoga atu ai Alii ma Faipule o Tafua i le mamalu o le Palemene;

**Ina ia faatumauiina pea Tafua i le Itumalo Palota o Palauli Le Falefa, e pei ona uluai faia e le Fono Faavae i le aso 28 Oketopa 1960.**

Ma le matou faaaloalo tele, o matou uma o lo o saini atu i lalo:

1. Ulu Iakopo
2. Lemaota Ailoi
3. Lemaota Faletolu
4. Lemaota Sione
5. Lemaota Faafetai
6. Lemaota Saeu
7. Lemaota Faletoi
8. Lemaota Faleni
9. Lemaota Falani
10. Lemaota Vaioge

**23 IANUARI 2019**

**Tuuina atu o le Talosaga**

11. Lemaota Sualii
12. Lemaota Kiso
13. Lemaota Aso
14. Lemaota Petesasa
15. Lemaota Toni
16. Fituafau Tausaga
17. Fituafau Peipi
18. Fituafau Loto
19. Fituafau Tuiala
20. Fituafau Filipino
21. Fituafau Ama
22. Fituafau Malotoese
23. Poulava Foaimaua
24. Poulava Lalovi
25. Poulava Soala
26. Poulava Ueni
27. Poulava Lotomau
28. Poulava Amosa
29. Poulava Vaa
30. Poulava Mataio
31. Poulava Aotoa
32. Fagaumanu Toa
33. Fagaumanu Akapo
34. Fagaumanu Molesi
35. Fagaumanu Metai
36. Fagaumanu Musuai
37. Fagaumanu Pita
38. Fagaumanu Pitoau
39. Fagaumanu Laulau
40. Fagaumanu Toetu
41. Fagaumanu Foleni
42. Fagaumanu Avoli
43. Fagaumanu Maka
44. Laimoega Solomona
45. Lataimoega Loaloai
46. Lataimoega Upulasi
47. Lataimoega Peka
48. Lataimoega Sami
49. Lataimoega Siala
50. Lataimoega Felise
51. Lataimoega Fuaiupu
52. Matautia Veni
53. Matautia Malu
54. Matautia Seigafo
55. Matautia Soli
56. Tiaalii Ta II
57. Tiaalii Matauaiga

**23 IANUARI 2019**



**Tuuina atu o le Talosaga**

58. Tialii Taufaasisina I
59. Tiaalii Togi
60. Tiaalii Togi
61. Tiaalii Tusa
62. Tiaalii Upulasi
63. Tiaalii Taufaasisina II
64. Pulusau Salevaai
65. Malouamaua Keneti
66. Malouamaua Vaelua
67. Sa'u Feaii
68. Sa'u Sekima
69. Salu Tusiga
70. Salu Taei
71. Salu Leuelu
72. Salu Misila
73. Salu Faiesea
74. Salu Toaalii
75. Salafai Tumanua
76. Togafau Afakasi
77. Togafau Pagama
78. Lefu Peni
79. Lefu Kavana
80. Nonu Liuvao
81. Nonu Ueni
83. Taito Faamatai
84. Taito Malu
85. Faimalo Talavao
86. Faimalo Iefata
87. Ili Iese
88. Galu Pausisi
89. Galu Loata
90. Soso Tupe
91. Tautiuimalo Valu
92. Faiumu Faaiu
93. Faalogo Laloata.

**FOFOGA FETALAI:** E tusa ai ma le Tulafono Tumau e 57....  
Tulai mai lau Afioga i le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, e fia maua mai lava sina fesoasoani mai lau Afioga ona o lea ou te matau atu i le talosaga e atagia ai le pogisa ma le le malamalama i le Tulafono. O lea e tau mai, ua aafia itumalo faa-alaalafaga. O le ala lena o lea ou te tulai atu ai, e le o aafia itumalo faa-alaalafaga, e na o le pau lava le mea lea e agai iai, o le mea foi lea na aveese ai le upu lea "alaalafaga" ona e le aafia tu ma aga faaleaganuu.

**23 IANUARI 2019**

### Tuuina atu o le Talosaga

E na o le pau lava le mea lea e taua, o itumalo faapalota. O mea ia sa tataui i sui usufono e ana itumalo nei ona o e faamalamalama. O le ala lea e sau sese ai faapea talosaga. O lea la ou te faafesili atu ai, pe o le a sau faaiuga i le mea lea, pe alu sese ai pea faapea le talosaga, e ave i o i le Komiti ona faasao mai ai lea i o?

**FOFOGA FETALAI:** Malo faafetai, o le ala foi lea sa ou manatu ai e le faigofie lenei mataupu, ona o lea lava ua au asoa ma masina o faamalamalama lava le mataupu lenei, ona o le fesuiaga o lo o lima taitaina sese ai. E tusa ai o le fesiligia o le Nofoa e lau Afioga i le Palemia. O le itumalo faaalaalafaga i le itumalo palota. E leai ma se mea e tasi e aafia ai o tatou itumalo faaalaalafaga. Silasila foi, e tele faataitaiga manino o lea mea sa vevesi ai le aiga malosi, tulou sala le gagana o le upu foi mai, faamalulu atu. E faapea foi i le tele o itumalo, o lena foi e faafofoga mai, o le usogatumua, le usogapule lena e faapena, Leulumoega ma Nofoalii. O le mea foi sa i ai Fasitoo ma Faleasiu, e faapena foi Lufilufi ma le saofaiga a le Toaono. O le a le mea la e tupu? E leai a se mea, e leai a se mea o toia ai le va po o afaina ai le tatou aganuu. O le mea la lea, o le manatu foi lea, ona o le a toe lau atu foi isi galuega, ona o le auga lava o le faamoemoe lea sa ou taua, o lea ua lipoti mai le Komiti ae ua fai foi si asoa o faatali le tulaga o le finagalo lea o Tafua lea faatoa aliali mai nei i le taeao. E pei sa ou manatu i le talosaga lea a Saleaula ona ua leva ona agiga mai le tulaga lea, ona ou faapea lea, tuu pea le avanoa ona o le tulaga ou te le o iloa pe toe i ai se fetuunaiga a le sui usufono o Saleaula ma le Malo aua ua uma ona feiloai ma le Malo. Ia, ae o lea lava na toe maua mai i le saunoaga ina ua toe faatulai mai le lafo ananafi, a o le talosaga la lea mo le aso lenei, o lea ua manino auofala i le mafuaaga, e uso a ma le mea muamua, ae i ai lona eseesega laitiiti. Atonu o le mea lena o lea ua manatu ai aua ia le fana i le tuitui aua ua pasi lea taimi. A o le tulaga o le Talosaga lea, o lea ua manino le saunoaga a le Malo, e lua a mea ia e aumai, o le fefe i le itumalo faaalaalafaga i suia i le itumalo faapalota. A o lea e fai mai le Malo, o le itumalo faapalota. O le mea lea ua ou manatu ai, e mafai lava ona fai lau faaiuga ina ia faaitiitia ai galuega a le Komiti e pei ona outou silafia, o lea e fai ma talosaga mai le Komiti e toe faaopopo se isi taimi e galulue ai, o le tele o latou galuega ae utiuti lo latou taimi faigaluega. Ia, ona o lenei lava Tulafono Tumau, ua ou manatu e i ai le pule faataga a le Fofoga Fetalai e mafai ai ona talia ma mafai ai ona teena.

Ia, talu ai ona o lea ua manino auofala e tusa ai o faamalamalama. Ma ou te teena ai le tuuina atu o le talosaga i le Komiti. Ioe.Ia, o le faaiuga lena a le Nofoa e tusa ai o le talosaga. O le mafuaaga e faamalulu atu i le paia o le tatou Palemene, o le mafuaaga, se i alolofa tatou sui usufono, fai o tatou tiute, faatino o tatou tiute e faamalamalama tatou Tulafono i o tatou itumalo. Silasila foi o lea ua fai le Polokalame Faapalemene a Sui o le Malo, ma Sui Tamaitai, ua toso mai latou ia i totonu se i faamanino atili le tulaga o le tatou galuega. Ae silasila foi i aso ia, e leai e le i aafia le tulaga lea, sa lava a nai toeiina e o atu ma faamalamalama.

**23 IANUARI 2019**

**Tulafono Tau Faaofi o le Faatatauina o Tupe Faaopoopo (Nu.1)  
2018/2019- felafolafoaiga faaauau i luga o le faitauga faalua**

A o le mea lea ua tupu, e amo le faipule ae le fonu i le fonu a le nuu, ona le malamalama loa lea o le nuu ma le itumalo. Malie e faalautele lau tala, aua tasi lea tiute o tatou e fonu i nuu ma faamalamalama le tulaga o tatou Tulafono Tumau. Ma ou te faamalulu atu i sui usufono mamalu, o le faaiuga lena a le Nofoa e tusa ai o le tatou Talosaga lea i lenei taeao. Ia se i tulai mai le sui usufono mo Salega Sasae.

**Tofa Olo Fiti Afoa Vaai (Salega Sasae):** Lau Afioga i le Fofoga Fetalai, e faamalulu atu lava i lau Afioga, e tulai atu foi ma le agaga faaaloalo, o matou nei ua matou le malamalama po o le mea ua vaivai le tofa a lau Afioga i le Fofoga Fetalai i le faaoloataua a le Palemia i le tulaga lea. O lo o manino lava le Tulafono Tumau e alu ai talosaga ia i le process e tatau ona ave i ai, e ave i le Komiti. E moni lau Afioga i le Fofoga Fetalai e mausali lau faaiuga, ae i ai lava le manatu, e ao lava ona talia talosaga ia, o lea foi ua uma ona faalua, ua ioe. O lea ua uma ona ioe uma le Palemene e talia le talosaga. Ma lou faaaloalo.

**FOFOGA FETALAI:** Se i tulai mai le Afioga i le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai, o se mea lava e fia faasao. O le sui usufono lea ua fai si loaloa o i totonu o le Palemene lenei, e ave le faamuamua i le Tala o le Tupe. Ma a fai loa lau faaiuga ua uma. O lea la, o lea ua taatia le Tala o le Tupe ae talanoa isi mea. Ou te fautua atu i lau Afioga, tatou agai loa i le Tala o le Tupe.

**FOFOGA FETALAI:** Malo faafetai. Ou te faamalulu atu, e malu foi le Nofoa o le Palemene. E manatu ina ia faasoina lo tatou taimi. E tolopo la tatou galuega.

**TULAFONO TAU FAAOFI O LE FAATATAUINA O TUPE  
FAAOPOPO (NU.1) 2018/2019 - felafolafoaiga faaauau i luga o le  
faitauga faalua**

**Afioga Hon FAUMUINA TIATIA FAAOLATANE LIUGA:** Faafetai i lau Afioga i le Fofoga Fetalai, ua gasea foi lau Afioga e tau faatonutonu i itu e tatau ona faamalieina ai, aua e sao le saunoaga a lau Afioga, e sao foi le saunoaga a le Afioga i le Palemia i le tulaga o i ai o tatou taofi eseese e uiga i le Tulafono o Faigapalota faapea le toe vaeveina o Itumalo Palota. Ae afai lava e te faamalamalama atu ae mananao latou ia e saili le latou aiatau, o le mea la lena e te le salua i lalo o le fala po o le kapeta. Ae ui o lea, o lea ua fai lau faaiuga pe amiotonu pe leai, ae taatia pea i si afioaga, i faapea ua ou le amanaia la latou tuualalo. Ia, ae faafetai ua amatatia foi lenei taeao ma e sao lelei le tatou Tulafono Tumau, a talanoaina loa le tatou Tala o le Tupe, o le faamuamua e ave i ai.

**23 IANUARI 2019**

**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

E faamaea le tatou Fonotaga ananafi o saunoa le Palemia fai mai e tatau ona ou alu i le maketi ou te faatau ai. O lou olaga o le maketi, sa ou alu i le maketi o lima ou tausaga po o le laitiiti ifo foi e faatau atu au popo, talo ma fai. O le mea lea e ala ai ona ou naunau i tamaiti nei e feoi e faatau mea i le auala, leaga o lou olaga lea ou te fesoasoani ai i ou matua, e le gata o le tausiga o laua, faapea a matou aoga , tautua le nuu, tautua le Ekalesia. O le mea foi lena a ou vaai i tamaiti ia e feoi i le ala ma oloa faatau ona o mea ia, ou te fealuai ma siliva i le taavale, ou te tago ave i ai, leaga o foliga o au lea e i tamaiti nei. Ae leai foi se isi, ou te iloa o le toatele o sui usufono i totonu o le Palemene, o le auala foi lenei na ui mai ai. O le mea la lea e fai, ou te le i faapea atu ou te alu i le maketi e faatau mai ni mea, leai, o lau tala na fai atu, ou te le o toe faatau fai i le maketi leaga o la e toto ou fai. O le mea la lea ou te faia, ou te alu lava i le auala lea ou te lauga ai ma ou tau i tagata, you have to be self sufficient. Afai na e ola mai se olaga lima vaivai, e tatau ona e taumafai ina ia faatupuina le tamaoaiga. O le faalupega sa ou lavea ai i le vaitaimi lea lau Afioga i le Fofoga Fetalai, o au o le faataufai. Ia, o le faataufai i aso la, o le tagata e le taulia, ae o le taimi nei o le faataufai, o le mauoloa lena o lea ua i ai. Ua le o toe aamu i ai se isi. A o le taimi sa ou faataufai ai, e aamu tagata ia te au. Aisea? E leai sau mea e mafai ona fai, aua na pau lava lea o lau.... ou te alu e fai le umu, aumai talo vela, luau, o popo e ave e faatau i le maketi. O isi taimi e fai au fuamata. E pei o le ala lea, ou te alu i le maketi, ae ou te le o toe alu e faatau mai. Na ou alu atu foi i le vaiaso lea ou ula foi i le isi loomatua o faatau ana mea foi nei o vai fala. Ona ou fai atu lea, "ua fia ni faua ua pisi i lenei vai fala?" Ae fai mai, 'faatoa alu atu nei lava Tuilaepa na fai mai pe le mai se isi i le vai fala lea, a o lea foi ua e sau oe fai mai pe le pisi ni faua. Ia, ou fai atu, o le lelei lena ma le suamalie o le vaifala.

**FOFOGA FETALAI:** Se i tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Ia o lea ua tutusa lelei lava taua ta te o i le maketi. Na sau le perenise mai Peretania, pei lava o le lona tolu lena o le fanau a Salesa. Sa ou fesili i ai po o fea o Samoa e fia malaga i ai. E tasi lava lana upu, e fia alu i le maketi. Leaga o le maketi, e iloa uma ai lava le tulaga o lea e i ai le atunuu, aua foi a leai ni mea i le maketi ona e iloa lea ua oge le atunuu. O tatou nei o lo o faia mea o faiga faavae, o i ina la e auala atu ai mafaufauga lelei. E le na o le maketi la o i'a lea e masani ona e alu atu e nofonofa ai, ae tatau foi ona e savali i i le maketi lea e te iloa ai le tulaga la e i ai le atunuu, aua a oge le atunuu e leai ni mea e faatau i le maketi. Ia o le puupuu ia o si au agiagi lea na fai atu ia te oe, a o le ata lena. O le mea lea na ou alu ai i Savaii i le ta maketi lea na fai, o a la mea la e maua i le maketi lea sa e taulamua ai? Na o mea o laulau tenisi la e tumutumu ai. Vaai la i le aoga, so o se mea lava ou te alu ai e tatala, ou fai atu, "oi ua outou vaai i nei auala manaia, ae se i vaai i le maketi na o tenisi ma mea o pateta. E le ola i Savaii ni pateta ma aniani. O lena la ua matua gau aano le Malo i lena maketi, a o le maketi sa e faia.

**23 IANUARI 2019**

**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

O le mea la lea, o lau fautuaga foi lena i le Minisita nei, ae te le i faia se mea, vaai lelei mea ia, ma e alu e te taamilo i le atunuu ma e vaai i ai. A e le vaai ma e taamilo i le atunuu, e te le iloa mea la e tutupu. O le ala foi la lena ou te taamilo atu ma ou talanoa i tagata lea fo'i na ou iloa ai, o le pulenuu a Aeau la e o faaleaga signs a le Malo i le latou itumalo.

Ia o lea foi la ua iloa e Aeau ona o lou taamilo atu ma ou talanoa i tagata, ae lelei ona tatou o tatou taamilo, uma lena toe omai asiasi i le maketi, aua e le tau taamilo pe a faapea e te alu i le maketi o i ina e tau uma mai ai lava, o le ata puupuu lava lena, o le mea la e i ai o tatou nuu i tua.

**FOFOGA FETALAI:** Ia, tulai mai le sui usufono mo Palauli le Falefa.

**Afioga Hon FAUMUINA TIATIA FAAOLATANE LIUGA:** Lau Afioga i le Fofoga Fetalai, faafetai. O lea ou te alu i le maketi, ae ou te alu foi lele e matamata ma ou vaavaai. O le mea la e tau leai ai ni tagata i le maketi, ua leai ni tagata faatau, ona pau foi lea o le tau o mea a tagata. A tele foi oloa ua soona ave fai pe a faapea e faatau au aufai, ona taugofie foi lea. O le maketi lea ma fale ia e saunoa i ai le Afioga i le Palemia, o ia lava na saunoa mai ia te au, a fai fale, fai mo le selau tausaga lea e lumanai, e le gata i inei. E le na o nei po o taeao po o le vaiaso lea po o le tausaga lea, e fai mo le selau tausaga. E le o gau le maketi.

**FOFOGA FETALAI:** Ia, see ese ia ma le maketi.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Ou te le o manatua na ou fai atu ia te oe e fai mo le selau tausaga, o lea lava ou te iloa e tolusefulu tausaga ua ai e ane le fale. Ae o le mea na ou talanoa atu ai, vaai ia lava le mea e faatau ai mea a tagata. O lona uiga, e te tilotilo i mea la e maua...ae alu ese ia ma le maketi e atili ai ona tele ou ai toese.

**Tofa Olo Fiti Afoa Vaai:** Lau Afioga i le Fofoga Fetalai....

**FOFOGA FETALAI:** Aua, faafetai, aua le faia fua le maketi i Vaitele o la ua manaia.

**Tofa Olo Fiti Afoa Vaai:** Lau Afioga i le Fofoga Fetalai, na o sina mea e fia faamalamalama. Ua ou le iloa i le aualii ia, ua fai fai le la maketi ua gau o mai lea pisa i i.

**FOFOGA FETALAI:** E pule lava lau Afioga le sui usufono mo Palauli le Falefa pe e te tali i ai i le sui usufono aua o la e solitulafono.

**23 IANUARI 2019**

**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai, o le mea la lea e leaga ai le moe moe moe tei ae. E le o gau le maketi o la e tele tupe la e maua ai i mea o laulau tenisi la e taaalo ai, ma le aualii la e inu ava ai. O la lava e maua tupe a le maketi, ae e le o gau la. E pau o le mea e le o tele ni mea e faatau ai, ma e tatau ona faatau ai i totonu o le maketi, ae e le o gau. O le mea lea, sei matau ea upu o le taeao.

**Afioga Hon Lautafi Fio Selafi Purcell:** Lau Afioga i le Fofoga Fetalai, e na o se mea lava e fia faasao. E sao lelei le saunoaga a le Palemia, e le o gau le maketi, o la e tele a matou tupe la e maua, aua o lea ua i lalo o lau vaaiga. E pau lava le mea e fia faasao i le saunoaga a le Palemia, e leai e le o ni laulau tenisi o laulau piliati, te i ua faapea foi Savaii ai ua ave atu ni laulau tenisi e aoao ai a matou tenisi. E leai o piliati la e maua ai tupe, ma le faaaloalo lava.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai, ou te alu atu o la e fai table tennis. O lona uiga la e tenisi i le isi aso ae piliati i le isi aso. O lona uiga o le aso lea e alu atu ai le Minisita o le aso o le piliati, tenisi piliati, tenisi piliati. O lona uiga o aso uma ou te alu atu ai o la e fai tenisi.

**FOFOGA FETALAI:** Malo faafetai. Tulai mai le sui usufono, see ese ma ia....

**Afioga Hon FAUMUINA TIATIA FAAOLATANE LIUGA:** E leai o le tenisi po o le piliati o le taaloga lava e fai i polo, aua o polo uma lava mea e faaoga i taaloga ia e lua. A faapea la e afio atu le Palemia ia o le polo, ia o le polo po o le tenisi po o le piliati, o le mea lava e tasi. O le polo lava o le polo. O le a ou see ese la ma le maketi...

**FOFOGA FETALAI:** Leaga e toe faauilavea foi Levaopolo. See ese mai lena mea i toe faauilavea foi Olo.

**Afioga Hon FAUMUINA TIATIA FAAOLATANE LIUGA:** O lou manatu lea sa tuuina atu ai le faamoemoe, e le faasaoa e le isi sui usufono le isi sui usufono. Lau Afioga i le Fofoga Fetalai, e pei o le manatu sa faaali atu ai le tulaga lea, ia lava le taimi e o ai tagata faigaluega i le fale. Ia mafuta ma o latou aiga ia lava le taimi, ma alu foi e toto se fai, talo, ufi ma nisi mea aoga mo le aiga. E le iloa pe tasi lea auala e faaitiitia ai le mea lea o le sauaga i aiga, mo tamaiti aemaise foi o tina ma tama. O le isi vaega lau Afioga i le Fofoga Fetalai, o lea ua talanoa agai i totogi o le aufaigaluega. Faafetai i le Malo i le faatofalaiga lea ua siitia ai totogi. Ae e i ai foi isi vaega e ao ona tilotilo i ai, e le o fealofani e pei e faailoga tagata le tulaga o le faatulagaga o totogi o le aufaigaluega a le Malo.

**23 IANUARI 2019**

**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

I le tulaga lea i principal level, e ese le principal level i isi Matagaluega e \$45,000 i isi principal level i isi Matagaluega e \$55,000 e amata ai. O le eseese e \$10,000. Ae a e silasila lau Afioga i job descriptions po o le faamatalaga o matafaioi, e leai se eseese tele. Afai na i ai i le taimi lea ae le i faia reforms, mo le faaitaiga o le PSC, o la lava e \$55,000 ae ua reduced, na reduce i le taimi o reforms e luasefulu fitu pe luasefulu valu le afaigaluega sa tatau ona i ai. Ae o le mea lea ua fitusefulu ma ona tupu i le taimi nei, ae ua roll out le tele o galuega e pei o le faiga o recruitment i Matagaluega. O le matua le fetai o le tulaga lea, sa fesiligia le Tribunal ae fai mai ua uma ona ave le latou fautuaga i le PSC e tutusa ai totogi o galuega ia. Ma lou faaaloalo lava e tatau ona silasila i ai le Malo ae toe back date po o le amata foi ia Iulai o le tausaga nei.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai, e moni lava e te tilotilo i mea o faamatalaga o galuega e fai. Ae e te tilotilo foi i le faatinoga. E i ai isi taimi e toetiiti lava tolu itulau o galuega e faatulaga e pei lava o le mea masani, ae o le tulaga sao lava e maua ai, o galuega la e faatino. E eseese foi la Matagaluega ma a latou tiute tauave. E matua tele lava le eseese mai i lea Matagaluega i lea Matagaluega. A silasila totoa foi i ai i le faatulagaga e i ai sitepu, e i ai foi sitepu e siisii ai lava ia le level o le principal officer, ae po o le tolu fa lima sitepu ona keke loa lea i luga o le maximum. Ao na mea uma o lou siitia i luga o le sitepu, e faalagolago foi i lau galuega e fai. O le tulaga lena i le faatulagaga o mea nei o galuega. Ao la e silafia lelei lava e le PSC ia latou lipoti i le faatinoga o galuega a tagata o lo o galulue i totonu o vaega eseese, ma iloa ai le tulaga lena o le sii o le sitepu agai i luga. E le o se mea fou nei, o le mea ua leva. Ae ala ona ou taua le mea lea, ona o le ala lena e ala ai ona eseese totogi. E afua i le sitepu lea ua i ai, ma le tele o le galuega o lo o fai ma le faamaoni i le faatinoga o galuega. Lau Afioga i le Fofoga Fetalai, e le tafatasi se faavae o faaiuga a le PSC i tulaga tau totogi.

**Afioga Hon FAUMUINA TIATIA FAAOLATANE LIUGA:** Faafetai i lau Afioga i le Fofoga Fetalai, faafetai foi i lau Afioga i le Palemia mo le faamalamalamaina o le vaega lea. E manaia le faamalamalamaga lea ae e le o faaogaina. E ala ona ou fai atu e le o faaogaina, a silasila le Malo, o le staff turn over i Ministries, o le maualuga ia, e i totonu lava o le fusi lea, principal levels, aua foi e leai se possibility i le CEO na te faia ai se faaiuga i le mea tonu lava lea. O le mea tonu lava lea e tatau ona fai, o le sii o totogi i le fusi lea o principal officers.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Ou te manatu lava o se lafoga le faaaloalo lea, o se lafoga e pito i sili lea ona le faaaloalo ia i latou o lo o faauluulu i ai Matagaluega. E faapea e leai se tofa fetala'i. E leai ou te leai atu.

**23 IANUARI 2019**

**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

O i latou ia e faaululu i ai Matagaluega, o fanau ia a Samoa sa aoao lelei, sikolasipi foi ma iu mai ma faailoga. Ua leva foi ona tautua i le Malo. Ma o le vaai a Malo i fafo o lo o aumai latou fesoasoani, e maua lava le faatinoga a i latou o le afaigaluega a lo tatou Malo. E faatusatusa atu lea i isi atunuu o le Pasefika, e matua maua lava le tulaga o lo o faatino ai galuega a le afaigaluega a le Malo. E oo foi la i mea ia pe a avanoa se tulaga Pule, e competitive ona o le tele o i latou ua fai faailoga ma ua tele foi lo latou agavaa ma le poto masani. E manifi lava foi le eseese e filifili ai le isi mai le isi na tauva. O lona uiga e pei o le manifi o le matatafi e sele ai le ava le eseese o agavaa. Afai la e manifi faapena, e tau mai ai i ina le loloto o le tomai ma agavaa, poto masani, ma faailoga o lo o i ai, i totonu o le service. O le mea foi lena afai e talosaga tagata, e seasea ona maua se tulaga e na o le tasi ai le tagata. E toatele o isi e sefulu ma ona tupu i latou e talosaga. Lau Afioga i le Fofoga Fetalai o le faamalamalama lena.

**FOFOGA FETALAI:** Malo. Ou te fautuaina le sui usufono mo Palauli le Falefa, see atu i se isi vaega o lau saunoaga ina ia aua nei noatia lou taimi.

**Afioga Hon FAUMUINA TIATIA FAAOLATANE LIUGA:** Faafetai lava i lau Afioga mo le avanoa. O lea ua uma ona faamaalo iuofe le tulaga o principal level, ae faafetai i le Afioga i le Palemia.

O le isi mea sa vaavaai i ai o le vaega o konekarate lea e fai, aemaise lava i le au faiaoga i le pule ma le pule lagolago. O lea e taitolu tausaga, a tolu tausaga, e iva tausaga e tolu au end of contracts benefits. E tolu au faamanuiaga e maua. Ae a tuu i le lima tausaga, o lona uiga e lua au end of contract benefits e totogi atu e le Malo e pei la e sili ai i lou lea taofi, e manaia pe a tai lima tausaga ma toe review. E lelei mo le tagata faigaluega, ae lelei foi mo tamaiti nei e le tele ai ni taimi e interrupt ai a latou suega, ma end of year exams ma mea na, ae se i silasila pea i ai, aua e cost less for the government. Faafetai.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** O faiga faavae lea e fia faamalamalama. O le faiga faavae lea e agai tonu mai i ai le sui usufono. E le faigofie le tulaga lena, sa tagai i ai le Malo i le amataga. Sa tailua tausaga, ona sau sau lea taitolu, e i ai la isi vaega ia o le Service e lipoti sao i le Palemene. E i ai le taofi e sili ona tau faaumiumi i latou na, ia aua nei avea le fesuisuii soo i le taitolu tausaga, e ono avea ai lo latou tutoatasi. E ono aveesea ai le tutoatasi ona o le fesuisuii soo. O le agaga atoa lava o le Malo na faataoto mai ai i le amataga, ina ua suia i le tolu tausaga konekarate faigaluega, e lelei le tolu ina ia maua le avanoa o le toatele o lo o naunau e tauave i le tofi. O lona uiga la, e lelei tele mo le atunuu lautele suiga ia. Ae aalu atu lava o lo o lelei lava le tagata galue o i ai, e leai se mea o le a sui ai fua, aemaise lava e faafeagai pea le Kapeneta ma lipoti nei a Komiti e faatalanoaina avanoa. Ae taua le finagalo o le sui usufono ua aumai.

**23 IANUARI 2019**



**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

Ua toatele tama fanau a Samoa ua foi mai ua maualuluga aoga. O lona uiga la a faatamala lava latou ua i ai i le taimi lenei, ona e nofo sauni lea e faafeagai ma isi liona ia e tu mai i le faitotoa ma faatalitali so latou avanoa. Ao le iuga o na faiga uma, o le manuia lautele o Samoa i galuega faatino.

**Afioga Hon FAUMUINA TIATIA FAAOLATANE LIUGA:** Faafetai i lau Afioga i le Fofoga Fetalai, faafetai foi i le Palemia mo le faamalalamaina o le vaega lea. E pei na ala ona ou laga le vaega o pule ma le pule lagolago o aoga ona o le suegata o tagata e faatumuina avanoa nei. E i ai le taimi na oo atu i le luaselau avanoa o pule aoga ma sui pule e lei faatumuina e pei la o le tulaga lea, o le tuai ona sainia o Konekarate ao lea ua manino le saunoaga a le Palemia, ae silasila pea i ai. E lelei foi le laititi o taimi e review ai ina ia concentrate pe agai pea ma taulai le finagalo o le pule po o le sui pule i le faaleleia atili o lea aoga ma lea aoga.

O le fesuiaiga o le tau, tasi lea vaega o le anavatau a lo tatou Malo e ese lou lagolago malosi i ai ona o le tulaga o le tatou foi siosiomaga. Ae lua ni vaega o lea ou te manatuaina le 2010, o le EPC tusa sa contribute le EPC i le 20% o le CO<sub>2</sub>, a o le transport e ova i le 50% o le CO<sub>2</sub> i le taimi lena o le kasa oona lea e puaina atu i le vateatea. Ou te faafetai ai i le Malo i le polokalame lea o le renewable energy po o le malosiaga faafouina o le eletise, lea ua i ai i le taimi nei ou te iloa ua 12% le mea ua i ai le vaega o le EPC i le tulaga lea ua faagasolo ai a latou polokalame o le malosiaga faafouina. E faafetai ai foi i le Malo i le Afioga i le Minisita. I lalo la o le transportation, e ova i le 50% le kasa oona lea e puaina atu i le vateatea i le transportation. O le tulaga la lea e i ai, ou te le iloa po o i ai se polokalame ina ia faaitiitia ai, aua o le mea lea ua ou vaai i ai, ua atili ai ona alu atu le kasa oona ona o le tele o patupatu. E le gata la o le kasa oona, a o le faaleagaina o taavale. Ia le patupatu i lou nuu o Gataivai, na foafoa ai tagata i le pasi mai Salega, aua foi ua sau nei le pasi oso i luga o le patu o le matua tele lava o le osooso i le patupatu lea. E oo foi i le patu la e i Falealupo, ou te asiasi foi au. Ou te alu i Aleipata ou iloa ai, o la ua faafia ona fai le auala laupapa lea before le auala lea e afe i Lotofaga aua toetiiti lava oso ai se taavale feoti ai nisi. Ae ou te le iloa po ua fai le auala la e i Tiavea, o le pioga lena e i ina a leai le patu la e tuu mai o e oso lau taavale i lalo. E lelei lava ia tatou ua tatou iloa, a o le au turisi, ia a o i le pogisa e tofua i le....

**FOFOGA FETALAI:** Ia, se i tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai, na e manatua foi Faumui o taua na faia patu ia, lea la ua patupatua solo ai le atunuu, ae tasi lava le agaga ina ia faasaoina ai le soifua. E tusa lava la pe leaga taavale i le soona saosaoa, a o le mea aupito sili ona taua, ia tau taofiofi taavale afi i le soona saosaoa. Manatua foi toetiiti ato le tolu masina o tau faatonutonu lau vaega i le faiga o patu ina ia talia pei o le mea lea sa ta mananao i ai.

**23 IANUARI 2019**

**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

O le mea la lea, a e toe silasila i ni patu i Savaii ua patupatua tele, ona e susu mai lea i le Minisita, toe tuutuu ifo i lalo patu la ua patupatua tele e fai e toatele pea taavale saosaoa. Ua ou manatu e sili ona faaluaina le uumi i luga o patu ina ia taofiofia ai le mea lenei o pasi lavevea soo. Ae silasila pea i ai, aua le tuua le fautuaga lelei.

**FOFOGA FETALAI:** Tulai mai le sui usufono. Toe lua ou minute.

**Afioga Hon FAUMUINA TIATIA FAAOLATANE LIUGA:** Faafetai i lau Afioga i le Fofoga Fetalai. E na o le fa a ta patu na fai, a o le mea lea ua i ai nei, ua patupatua faasoloatoa le auala tele. O le patu la e i autafa o le faleoloa o le Minisita o Galuega, o le manaia ia o le faiga. A na faapea la e faapena uma le faiga o patupatu... Ae ala ona fai patupatu ia slow down ai taavale, ia toe afe ai i le faleoloa e fai faatau.

**FOFOGA FETALAI:** Se i tulai mai le Minisita mo Galuega, Felauaiga ma Atinae Eeseese.

**Susuga Hon Papaliitele Niko Lee Hang (Minisita mo Galuega, Felauaiga ma Atinae Eeseese):** Lau Afioga i le Fofoga Fetalai, e leai e le fia faalavelavea le saunoaga matagofie a le Afioga i le sui usufono ae ona o lea ua taua fua lou igoa i le patu, e leai o patupatu lava mo le puipuiga o le mamalu o le atunuu. A o tulaga ia e lelei le faaoga o patupatu i luma o aoga ma luma o nai pisinisi e taumafai le mamalu o le atunuu e atinae latou. Ae o le tulaga o patupatu, faafetai i le tou Komiti o lea e aumai ai patupatu, o le a alu lau suesuega i patupatu uma la e fai si maualuluga, o le a toe tatipi uma i lalo e tusa ai ma lou finagalo. O patu lena e te saunoa i ai i Savaii, ia ou te le iloa aua o lena e te saunoa mai ua foafoa ai tagata ae pei ona saunoa le Palemia, o le mea taulia o le soifua, aua ne i aafia se soifua. Ua talia foi la outou fautuaga i mea ia e aumai i patupatu. Faafetai.

**FOFOGA FETALAI:** Tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Minisita, aua e te faalogo fua oe i fautuaga a Faumui, a ia faatau le soifua o tagata. Afai ua maualalo tele patu, toe faaluaina, toe faatoluina i luga. O pasi nei ou te matua faaeteete tele i ai, leaga e aupito toatele tagata e maliliu ai ona o pasi soona televavave le mafaufau. O lea la, silasila lelei pea oe, aua e te popole fua oe i le o lo o i ou lumafale. E le alu lemu lava taavale e afe. Matua tuu uma i luga patu ina ia faasaoina ai ola o tagata. Ave le faatau i le saogalemu o tagata.

**FOFOGA FETALAI:** Tulai mai le sui usufono e saunoa, see ese mai lena mea o le patu.

**23 IANUARI 2019**

**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

**Afioga Hon FAUMUINA TIATIA FAAOLATANE LIUGA:** Faafetai i lau Afioga i le Fofoga Fetalai, faafetai foi i le Afioga i le Palemia. E pei o le mea lea ou te fai atu ai, o le manaia o le patu lea e i le vaega lea o au ala tele. Ia o fea se patu ua tu i se pioga? Ou fesili atu i le LTA ae fai mai na o saoga e tu ai, ou fai atu, ae a la le patu la e tu i le pioga la e i gauta atu? Ae fai mai, ia o le patu lena e tau taofiofi mai ai le sau i lalo i le isi patu lea ei luma ane o le US Embassy. Ae faafetai. Mo le silafia e le tatou Maota....

**FOFOGA FETALAI:** Ia, se i saunoa mai le Minisita mo Galuega, Felauaiga ma Atinae Eeseese.

**Susuga Hon Papaliitele Niko Lee Hang:** Lau Afioga i le Fofoga Fetalai, atonu o lea e saunoa le Afioga i le sui usufono i le tulaga ma luga o patupatu, ua talia foi le fautuaga a le Palemia, o le a toe faatonu le LTA e toe faamaualuga atili le patu lea. Ma lou faaaloalo lava.

**FOFOGA FETALAI:** Ia, ua faaiu mai le saunoaga a le sui usufono mo Palauli le Falefa.

**Afioga Hon FAUMUINA TIATIA FAAOLATANE LIUGA:** Lau Afioga i le Fofoga Fetalai, o le tatou taligamalo i le South Pacific Games, o le mea ou te fiafia ai, ai na silafia e le Atua e toe fai mai taaloga a le Pasefika iinei, aua o au trainees le toalua lea o Loau ma Alaiasa, o tama aoga a au, lea la o le a toe faaauau ai le taaloga lea, leaga na matou faaogaina. O le matua lauia lava o nei tamalii ae faamalo i taligamalo o le a tatou feagai ai ia Iulai 2019.

**FOFOGA FETALAI:** Ia, se i tulai mai... leaga o lea ua e taua le suafa o Alaiasa. Tulai mai le sui usufono mamalu mo Anoamaa Sasae.

**Afioga Alaiasa Muagututia Moefaaouo Malagaitutogiai Sepulona Moananu (Anoamaa Sasae):** Lau Afioga i le Fofoga Fetalai, o lea ua matau atu ua lamalama faaiu le saunoaga a le sui usufono, a o lea ua toe afea i le tulaga lea, ma taua ai o maua o ana students. Ma ou te talosaga atu e aveese ia upu ma faamaumauga a le tatou Fono. Leai ua uma taimi na ma aoga ai i faiaoga sa i ai, lea sa ma lagolagosua i le susuga i le Minisita i le taimi o tulai mai. E ui lava ina tele le gau o taaloga i le 2007, ae sa ma lagolagosua i le taimi sa tulai mai ai. Faafetai.

**Afioga Hon FAUMUINA TIATIA FAAOLATANE LIUGA:** Ou te faafetai i le Minisita Lagolago, o le tamaloa o le Auditor lauiloa. Mo le silafia e lenei Maota e \$8miliona le tupe na totoe, e \$3,500,000 na tuuina atu o se tupe maua faaopoopo mo le 2007 first Supplementary for 2007/2008. E \$8,400,000 le tupe na totoe o taaloga, ave le \$3.5million na ave e faalava ai le Tala Faaopoopo o Tupe i le 2007, faafoi le \$4,900,000 i le Matagaluega o Tupe e totogi faauma ai konekarate e le i maea ona totogi i le taimi o le South Pacific Games, na tapunia aloaia ia Tesema 2007.

**23 IANUARI 2019**

**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

**FOFOGA FETALAI:** Malo faafetai. Ua maea lou taimi lau Afioga i le sui usufono mamalu. Ia, ua i ai le manatu....

**Afioga Alaiasa Muagututia Moefaauouo Malagaitutogiai Sepulona Moananu:** Lau Afioga i le Fofoga Fetalai, o lea sa taua o au o le Okika. O le silasila lea a le Minisita i mea o le paketi e le i faaaogaina, ae le o tupe maua lea, o lea na silafia uma lava e Samoa, na matuai gau aano lava le taaloga. E eseese lava le faiga o mea, o lea la ou te talanoa atu au ia, o mea tino na i ai e gau, ae o lea e talanoa mai o mea sa allocate atu e le i faaaogaina lea sa faaaoga i isi mea ia. O le eseese lenei o le Okika ma le mea o le soona saunoa foi lea e soona fai a tatou mea. Ma le faaloalo.

**FOFOGA FETALAI:** Se malie le sui usufono se i tulai mai lava le Minisita o Aoga, atonu e aliali mai ai foi se isi gau i o.

**Afioga Hon Loau Sola Keneti Sio (Minisita mo Aoga, Taaloga ma Aganuu):** Lau Afioga i le Fofoga Fetalai, ia ona o lea foi e taua ai ma lou igoa i le saunoaga a le sui usufono mamalu. Ou te faasaoa, ou te faaluaina, ioe, sa ma aoga ai i le taimi lenei, e moni lelei, ona ma puea lea o mea lelei ae tiai uma mea leaga. O lea la ma te faia ai nei i le taimi lenei le tulaga o le tapenaga o tatou taaloga i mea lelei na faapena ona fautua mai ai, a o mea leaga na tiai uma. Ma le agaga faaloalo.

**FOFOGA FETALAI:** Ua maea le taimi o le sui usufono mo Palauli le Falefa.

**Afioga Hon FAUMUINA TIATIA FAAOLATANE LIUGA:** O le a ou le tali atu i le saunoaga le faavaea a le Minisita lagolago, aua o lo o tautala mai le Lipoti a le Ofisa o Pule ma Suetusi Sili, e le o lipotia ai se tupe gau a le Pulega o Taaloga i le 2007. E faafetai atu i Afioga i Minisita, ae faapea foi i le Afioga i le Palemia, aemaise o le faafetai i le avanoa na tuuina mai e i ai nai mataupu ae taatia ia mo se isi taimi e le uma le faiaso o le Alii. Si ou itumalo, faafetai tapuai. E faamanuia atu le tausaga ma le tausaga fou i nai afioaga ou te le i oo atu i ai i le taimi na ou fai kerisimasi ai ma ou fai tausaga fou ai i si o tatou itumalo. Faafetai le tapuai, faafetai le lava o le faapalepale ma lo outou onosai i le osiga o tatou nuu aemaise o Ekalesia ma le tausiga foi o lo tatou itumalo. Faamanuia atu le tausaga fou, ia faapena foi i lau Afioga i le Palemia ma lau Kapeneta, aemaise foi o Minisita Lagolago ma le mamalu o lenei foi Itu, lea ua taua ai matou o le Itu e Agaia le Malo. O lou fiafia ia i lenei taeao ua ou vaavaai atu i le mata ataata o tagata, e ui ina ogaoga mea ia tatou te talanoa i ai, a o la e fiafia, leaga o lea e fai mai le Tusi Paia, "O le Atua o le Agaga lava ia." O le mea o i ai le Agaga o le Atua, e i ai le saolotoga. Ia manuia le tatou Fono.

**FOFOGA FETALAI:** Malo faafetai saunoa. Ia, tulai maia le sui usufono mo Faasaleleaga Nu.1 i Sisifo le Afioga i le Tamaitai sui usufono.

**23 IANUARI 2019**

**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

**Afioga Hon GATOLOAIFAANA AMATAGA ALESANA GIDLOW (Faasaleleaga Nu.1 i Sisifo):** Faafetai tele i lau Afioga i le Fofoga Fetalai mo le avanoa o Faasaleleaga Nu.1 i Sisifo e fai ai foi sina tala aua le Tala Faaopoopo o le Tupe 2018/2019.

Ae le i faia se tala lau Afioga e fia piiama atu i le talosaga foi na e saunoa i ai ma valaauina ai le afio mai o le Agaga Paia aua le faafeagai ai o lau Afioga ma le faatautaiga o le tatou galuega, aemaise foi o le Afioga i le Palemia ma le mamalu o le Kapeneta, le susu foi o Afioga i Minisita Lagolago, ae tainane foi le afifio atu o Taitaifono o Komiti Faa-palemene ma le mamalu o le Palemene o lo o sasao atu nei. Ou te faatalofa ma ou faamanuia atu i lenei Fonotaga muamua o le 2019. Ou te lagona o se taimi muamua foi lenei e momoli atu ai moomooga faamaise i le itumalo o Faasaleleaga Nu.2, aemaise foi le afioga i le faletua i le toesea ai o le sui usufono mamalu ia Pau, o le finagalo lava o le Atua ae le o se loto o se tagata. Tau iaina ia faamaise atu le Atua ma faamafanafana i le faletua, le itumalo ma le aiga e tusa ai ma le valaau paia a le Atua.

E faatalofa atu foi i le afifio mai o Ofisa Sili o Pulega ma Faalapotopotoga Tumaoti a lo tatou Malo, ae tainane foi le susu o le Susuga Failautusi ma le mamalu o le aufaigaluega o lo o vae ma lima i ai le Palemene. Malo lava le soifua ma le lagi e mama. O lo o faapea foi ona tapuai mai Lana Afioga Mamalu O Le Ao o le Malo ma le mamalu i Sui o le Fono a Sui Tofia, le Afioga i le Faamasino Sili ma le Aiga Faamasino, le tapuaiga a Samoa mai ona mauga tetele seia oo i ona mauga iti, ae tainane le susu o le aufaigaluega o lo o nono manu aua se manuia o Samoa a o alofaiva foi lona Palemene.

E faapea foi ona faatalofa atu i a tatou paaga mai atunuu i fafo o lo o tele fesoasoani o lo o mauamai ai aua le atinaeina o Samoa. E momoli atu le faafetai ma faatalofa atu mo lenei foi tausaga ma ona galuega o le a faatinoina.

Lau Afioga i le Fofoga Fetalai na o sina faatalofa atu lava i lou itumalo, e moni lava e vaaia pea le tino i aso uma ma vaiaso uma ae maua i le mea foi lea e pasi atu pasi mai ae leai se faatalofa aloaia. O le mea la lea ou te faatalofa atu ai i le paia aua le susu o le Susuga ia Sua ma le Aumaga, Tusani ma Sa Tusani ma le mamalu ia Sa Silafaiga. Le paia foi i le Aiga Salevalasi, i le afio o le Tootoalii ma lo latou Matua ia Asomua, tainane foi le alaatai o lau Fetalai Leauanae ma le nofo a ituaiga ia Sasulu, faapea le afifio o alo o Tagaloa, le Aitu Tagata ma le Fofoga Fetalai, faapea le mamalu ia Safune ma Taulauniu. Afio le Tamaitai ia Gatoloaifaana ma le falefa o Atiulagi ma le Aiga Sa Gatoloai, Taito ma le Usoalii ma le Matua ia Tanuvasamanaia. Afio le Gafa ia Soanai ma Patane, susu le susuga ia Tuilaepa, afio le Alo o Tamalelagi ma le Toainafo ia Tia ma Tuioti, ae polapuipei e le mamalu ia Safuamua ma le nofo a ituaiga, Tevaga ma le Faleono, o Fuga ma Mauga ma Salemuliaga. Faafetai tele lava i le tapuaiga, ae faapea foi auaua o le Talalelei o lo o faanonomanu ma faafalelemalu i totonu o le itumalo aua se manuia o le itumalo atoa ae tainane se manuia o Samoa. Faafetai mo a outou talosaga.

**23 IANUARI 2019**

**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

Lau Afioga i le Fofoga Fetalai, e fia faia lava sina faaopoopoga laitiiti lava mo le faaopoopoga o le Tala o le Tupe o lo o opea nei i le Maota. E muamua ona ou faafetai atu i lau Afioga i le Minisita o Tupe, faafetai lava mo le limalima lelei, faasoasoa lelei, e le tele lava ni a tatou seleni, ae o le lelei o le faasoa e faapea ona auau ai se tamaoaiga ua mafai ona tatou tagofia ma tatou aoina i lenei foi vaitau. Ma ou te lagona foi ua tauaoina foi le lipoti auiliili ma le matagofie a le Afioga i le Taitaifono ma le Komiti o Tupe ua lava a lea e iloa ai o lo o atoatoa le galuega o lo o faatinoina. E momoli atu le agaga faafetai. Ae tau lava o nai tuualalo ma nai fautuaga foi aua le tatou galuega alualu i luma. Ou te faafetai tele atu lava ua oo lau faasoa i le faaopoopoga o le penisione mo i matou nei ua pulapula lagoto soifua ma so matou ola. Ae pau lava o lea e faalogologo atu lava ananafi e pei a tau lotea mai le penefiti lea o le matou penisione lea matou te malaga atu ai i Savaii ma toe omai. Afai lava ua le fia malaga le tagata ia i le penefiti lea, faamolemole aua le toesea, aua o le a afaina ai fua lava ma pei e foliga o le a afaina ai e o lo o papaaao ma affio i Savaii, aua o i matou lava lea matou te faaaogaina le penefiti lea o le penisione, ae i luga o tulaga tatau ma tulaga talafeagai aua le tausiga o aiga, galuega a Ekalesia, aemaise foi o tulaga tofi i totonu o le Malo ma le tatou atunuu. O lea la, a oo se isi tulaga e faasoa atu ai ni tupe tetele mo le penisione, aua lava ne i aveesea le tulaga lea o le malaga fua o le au penisione i luga o vaa faamolemole. Ia, e matagofie fuafuaga aua le tulaga lea o vailaau ua soona faaaoga foi e nisi ma ua faaaoga le tatau, e talafeagai ai le toe tagai i se isi avanoa i se isi tulaga e faatino ai lea faamoemoe. O se manatu lava o ni tuualalo a nisi foi o faapea ona agai mai mo se avanoa e mafai ona faaleo o latou finagalo i le tulaga lava lea o penisione. E pei e malifa se agaga i le tulaga o e ua augatausaga foi o galulue i totonu o le Malo po o pisinisi tumaoti ma fai a latou lafoga, ona oo loa lea i le taimi ua penisione ua tatau foi ona litaea. Ae tutusa lava a latou penisione ma e leai ma se lafoga na totogiina. E pei e i ai se agaga fuafua foi lea, e tatau ona i ai sina faasiliga laitiiti mo i latou ia sa lafo foi sa latou fesoasoani i le tau atiaeina o le tatou Malo e ala lea i lafoga ina ia tau amanaia i sina pasene laitiiti e faaopoopo i le latou penisione. E pei e faapena foi se leo e tuu mai i le tulaga lea o seleni o faalavelave faafuasei, aua o lea lava o lo o fai le lafoga i taimi uma e toesea ai le NPF, toesea ai ma faalavelave faafuasei. E le afaina lava pe a faapea e alu alu e gasegase pe tupu se faalavelave e manaomia ai le fesoasoani lea, a o le tele o latou e fai lafoga e uma atu foi lava ona litaea, ae leai foi lava ma se latou...

**FOFOGA FETALAI:** Tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai e taua tele le mataupu lenei e faapea foi ona faatupu manatu i nisi o sui usufono e toe silasila i ai, lea foi ua toe saunoa i ai le Afioga i le sui usufono.

**23 IANUARI 2019**

**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

Ua tali foi le Minisita o Tupe e puupuu lava i le tulaga faatupu manatu, e le gata la i le faatupu manatu mai o tatou faipule, a o lea foi la e le tuuina lou tilotilo pea i TV ma ua faatupu manatu mai foi nisi loomatua ma nisi toeiina i ni suiga e ono fai, aua a faatupu manatu loa, ua tatau foi ona toe tilotilo i ai. A o mea uma lava e fua i le seleni ua mafai ona maua. O le taimi nei e \$18miliona le tupe lea e alu i le penisione, ma e le o se tupe laitiiti. E pei lava ona faafogafoga mai e le o tuuina le gaoioiga a le Minisita o Tupe ma le Minisita o Tupe Maua i le sailiga o auala eseese aua o mea ia tatou te le faalagolago ai i atunuu i fafo. E faalagolago a tatou ia i tatou. O le taua foi la o mea nei, ia faafogafoga mai i latou o lo o faamanuiaina, na pau lava le mea na fai ai le mea lenei, o sina fesoasoani i tagata matutua o le atunuu. A o upu ia ua ou faalogo atu i ai, ua sau foi lele, fai mai ua le lava mea e tausai ai matou fanau. E le o le agaga lena na fai ai le mea lea, na o se faaamoamotali, a o lea ua vaai atu ua faalagolago i ai ma fanau ma fanau a fanau ma fanau a fanau a fanau. E le o le agaga lena na fai ai le penisione. O le aoga lena o le faatupu manatu e toe tilotilo ai loa aua a faapea e toe tuu i luga le penisione. Ua musumusu mai ia te au le Minisita, o le isi mea e ono fai o le tuu loa i luga i le tai 80 po o le tai 90 tausaga e agavaa ai. O lea foi ua ou penisione, ae ua outou vaai mai o ou savali foi lea faapiopio? O lea ou te lagona pei faatoa 20 ou tausaga. Ua toeitiiti 75 ou tausaga. O lona uiga a fua la i le tulaga lea, sa le tatau foi ona faa-penisioneina le 75 tausaga. Ae aoga lava le faatupu manatu mai, aua e laga mai loa se manatu tilotilo loa i le \$18miliona. O le a la le mea e tatau ona fai? Ia toe tilotilo maoti lava i mea ia, o lea ua maua atu le finagalo o le sui usufono. O le ala lena ou te tulai atu ai, e le faigofie mea faapenei, aemaise pe afai, o lea foi na saunoa mai le isi sui usufono ananafi i aoga a fanau ua taufai faalala uma mai. O le mea lava sa masani ai tatou, e totogi lava e le tama ma le tina pili o fanau. A o le a le mea lea ua tupu nei? Ua vaavaai uma mai lava i le Malo. A o le a ea le mea na soona fai ai nei mau fanau? Ona faalagolago mai lea i le Malo. O au na tuli faalua i le aoga, ona ou alu i lou tama, aumai sou pili, ia na aumai lava e si toeiina le pili. Ua ese le mea lea ua i ai nei ona aso. E tatau foi ona fai se sao o matua latou i a latou fanau. Ae se i faafogafoga mai la i le alu o le aso ananafi o lauga le isi faipule tamaitai i totogi o faiaoga o aoga faataitai, a o mea na e le o ni mea e fai e le Malo, o mea lava e fai e faalapotopotoga i tua a Ekalesia. A o mea na e fai e latou. Ua \$14miliona ea le fesoasoani a le Malo lea e ave atu. Se i vaai i le tele o nei mea? \$14miliona mo aoga i tua ae \$18 miliona le penisione. O le tulaga lena lau Afioga ae tasi lava le mea e sue mai ai tupe ia o le totogi o tiute ma ao mai lafoga a tatou uma, ae le faapea o le totogi o lafoga a isi e faatupe ai mea ia ae nofonono isi.

Lau Afioga i le Fofoga Fetalai, ia o le toe faaopoopo atu lena.

**FOFOGA FETALAI:** Malo faafetai. Ia e sao lava le saunoaga a le Palemia, e solomua lava i le tagata fanau tele le augata e totogi pili o tamaiti. Tulai mai le sui usufono e faaauau le saunoaga.

**23 IANUARI 2019**

**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

**Afioga Hon GATOLOAIFAANA AMATAGA ALESANA GIDLOW:** Faafetai tele lava i le faalatele foi o se manatu e le Afioga i le Palemia. Ae pei lava o le aga o mea uma o le faatupu manatu, ae taatia atu pea i lau Afioga ma le Kapeneta e faapea ona faatino vaega talafeagai ma mea le tatau ai. Ae pau lava o lea lau Afioga, o lea ua e saunoa po o le a le mea e saga faatele ai nei tamaiti, a o lea foi ou te manatua lau saunoaga ia matou lava nei tamaiti, ia toaaga e matua fai fanau, ia faatoatele le faitauaofai o Samoa.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegai:** E sao lelei, a o le mea la na ou talanoa atu ai, ia matua faatoatele mai latou e taaalo lakapi. O le eseese lona, Lau Afioga i le Fofoga Fetalai e sao. O le fesili e toafia la sau au lakapi?

**Afioga Hon GATOLOAIFAANA AMATAGA ALESANA GIDLOW:** Ia taatia ia i si tina faitalia ia ma lona malosi. Lau Afioga i le Fofoga Fetalai, e fia faaauau atu ni nai manatu aua lava le tatou vaa fautele. Ua ou faalogo ma matauina foi nisi o faalavelave e tutupu mai totonu o tatou fale foi nei taumafa pia, bars ua aafia ai tulaga iao securities po o e latou te... e tatau ona leoleoina le saogalemu ma le filemu o ia foi nofoaga faitele. Masalo pe agai lau faamatalaga i le Minisita o Leipa pe a, po o le a se finagalo ae ua tatau foi ona tagai i tomai ma agavaa o le aufaigaluega lea ina ia i ai se tulaga ausia e mafai ai ona alu e faatino le galuega lea, aua o le tau faalogologo atu i ai, e pei e silimusa ia i latou ia ona faatupu le vevesi faaopoopo i le vevesi i faalavelave na tulai mai i na foi vaitaimi o tatou feagai ma malologa, ma oo ai lava ina afaina le soifua o nisi o tatou alo ma fanau ma tagata o le tatou atunuu. Ia, o se tuualalo.

Ona ou fia oo mai lea i le tulaga lea o le siosiomaga lea ua tatou faatauina lava i so o se Fonotaga, e lava le tulaga lea o le siosiomaga. Faafetai i lau Afioga i le Tamaitai Minisita ua oo foi se faatofalaiga i le tulaga lea o le faaogaina o le plastic bag i totonu o faleoloa e oo foi i straws ia e taumafa ai ua tele ina vaai ua faaoga straws ia e mafai ona tiai ma pala, vaeane lava le tatou Fonotaga i lenei aso. Ona oo mai a lea o se manatu po o le a se finagalo, se i tagai ane pea i le faaogaina o le plastic i totonu o le tatou atunuu, i le tulaga lea o teufugalaau i maliu, e fai o le taugata, a o le faatele ai o le otaota, e le mafai ona tanumia pe le mafai ona ifo i le eleele. E i ai la se manatu pe tatau ona tagai i le faaofiina mai o lea foi vaega ina ia taofia ai ma tatou fesoasoani peai le taofia o le faaogaina o le plastic i totonu o lo tatou atunuu aua a taofia loa, ou te lagona e avea lea ma faamalosiua foi i e o lo o faia le tulaga lea o pale fugalaau, pale foi e fai i laufala. O le matagofie ia, e fai o le taugofie, a o le mauagofie foi. Aua a tatou faatusatusa i le tau o le pale lea fugalaau, ou te iloa e le i lalo ifo lava o le \$400 lona tau. Ia pei lava na o le taimi lea mulimuli atu ai ona matagofie lea o lona tulai mai ae mulimuli ane ua tumu ai ia maota ma laoa foi ae leai sona aoga. E manaia lava pe ana avatu le \$400 lona ave sao i si tina po o se tama e fesoasoani i fuafuaga foi aua le ua tuua le malo. O le tuualalo aua ou te lagona ai foi e fai le bbq a isi tagata o le matou nuu e faaoga le mailo ua le faaogaina le ipu plastic foi lea paepae.

**23 IANUARI 2019**



**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

Sau tala a tagata ia aemaise lava tagata mai fafo faapea mai, auoi tai manaia toe faaoga le mailo. O lona uiga o la e taua lava a tatou lava mea sa tatou ola mai ai, ma e matagofie lava i le vaai a tagata ma le tilotilo e le o o ese lava tatou mai tu ma aga sa tatou masani ai.

Ia lau Afioga i le Fofoga Fetalai o nai tuualalo na e tuu atu ai i le paia i le Malo i le Afioga i le Palemia ma le Kapeneta e fai i ai so outou finagalo ae ia manuia tele lava le tatou Fonotaga. Soifua.

**Tofa OLO FITI AFOA VAAI:** Lau Afioga i le Fofoga Fetalai...

**FOFOGA FETALAI:** Faafetai. Talu ai ona ua.... e faamalulu atu i le sui usufono mo Salega, masalo o le a faaauau lau saunoaga pe a tatou talii mai i le tatou malologa masani. E faamalulu atu o lea ua tatou toai taunuu mai i le tatou malologa masani, o le a faaauau ai le saunoaga a le sui usufono o Salega i Sasae o lo o tulai mai ae faafetai atu i le sui usufono mo Faasaleleaga Nu.1 ua maea le saunoaga. Faafetai, malo malele malo saunoa.

Ia o le a faataatiaese le galuega a le Fono Aoa mo lana malologa masani.

*Na faataatiaese Taulumaga a le Fono Aoa mo lana malologa masani i le itula e 10:45 i le taeao ma toe faaauau i le itula e 11:45 i le taeao.*

**FOFOGA FETALAI:** Ou te faasilasila atu ua toe amatalia galuega a le Fono Aoa Faitulafono. Ia ou te talitonu ua maua le malosai o le Palemene ia e faaauau ai ia le tatou galuega. Malo le onosai. Ua fautuaina le sui usufono mamalu o Salega i Sasae, mo lana saunoaga e tatala ai le foi mai o le malologa i lenei aoauli.

Ou te tapa ma le faaaloalo lau Afioga i le sui usufono mamalu mo Salega. Malie le sui usufono, malie lava, o lo o i ai le lafo e tulai mai ai le Afioga i le Palemia mo se lafo, po o le Taitai foi o le Maota.

**LAFO MO LE SUIA O ITULA FONO**

**Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI:** Lau Afioga i le Fofoga Fetalai, faamalo i le Matagaluega mo le faasiligamalosai aua le mamalu o le tatou Maota nei ua toe maua ai foi le malosai faafouina e faaauau ai ia tatou galuega. Ae ua ou tulai atu ma le agaga faaaloalo e taumafai lava ina ia faagasolo le tatou galuega.

O lea e faatu ai le lafo, *Ina ia tatou Fonopo nanei i le itula e 7:00 i le 11:00. O le aso a taeao, ona faaauau mai ai lea i le 9:00 i le 1:00 ona malolo ai lea ona o lea e feagai tatou ma le sauniga o le tatou uso le Afioga i le sui usufono ia Pau Sefo Taumata Pau. Ia ona toe amatalia ai lea i le itula masani i le Aso Faraiile tuua i le 1:00.*

**23 IANUARI 2019**

**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

*Ia e fua lava i le faagasologa o le galuega e ala ona umi o le uumi o lauga. A oo atu e moomia le Fono po, ona tatou Fono po foi lea i le Aso Faraile i le 7:00 i le 11:00. Ia a moomia ai lava foi ma le Aso Toonai ua leva foi tatou te le o toe Fono i le Aso Toonai. O aso la e alu atoa ma le Aso Toonai, ia ona toe faaauau foi lea i le Aso Toonai ae o le a mataitu pea le faagasologa o tatou galuega.*

Ia o le Fono nei e nao si tamai Tala Faaopoopo o le Tupe ia ae a saili ai ai foi nisi e le afaina. Pau lava le mea ne i te i ua le maua ni ai faaopoopo ae na o ai toese. Manuia tele le tatou Fonotaga.

**FOFOGA FETALAI:** Malo ua faaluaina mai le lafo e pei ona malele ma saunoa le Afioga i le Taitai o le Maota po o le Afioga i le Palemia.

*Faaluaina e le Sui Palemia ma le Minisita mo Pisinisi, Alamanuia ma Leipa.*

*Na faamaonia le lafo.*

*Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.1).*

**FOFOGA FETALAI:** Ma le faaaloalo ou te tapa lau Afioga i le sui usufono mamalu mo Salega i Sasae mo lau saunoaga.

**Tofa OLO FITI AFOA VAAI:** Faafetai i lau Afioga i le Fofoga Fetalai ua maua so matou avanoa. Ou te manatu lau Afioga i le Fofoga Fetalai o lea ua maea ona e molimea i faletui e pei o le fetalaiga i le Maota o le Tuiaana se i tatou patipatia ai le alofa ma le agalelei o le tatou Tama oi le Lagi. Na e silasila foi i Taumeasina ae o matou tepa i Matagofie, ua tatou futifuti manuula ai i lenei taeao matagofie ma le agaga faafetai.

Paga lava lea lau Afioga i le Fofoga Fetalai, e le taumasina so tatou iloa ma le finagalo o le Atua. E pule le Atua i lo outou soifua ma so matou ola. Talofa ua faia se tasi o pou o le Maota o le faautugatagi a Samoa, si au uo faapelepele e ma te aleaga i le tele o taimi ma ma fefaasoai. Ia tatou tatalo faatasi, ia manuia le faigamalaga a le uso sui usufono vaeatu le tofi mamalu o le itumalo. Ia faamaise foi le agaga i le faletua ma le nofo a alo, aemaise le itumalo mamalu.

Lau Afioga i le Fofoga Fetalai, ao le i agai se matou tala i le auga o aute ma le faamoemoe o le tatou Malo i le Tala Faatatauina o Tupe Faaopoopo, avea le leo faatauvaa, e fai ma fofoga taumolimoli i le Afioga i le Matautia ma le Falefa o ona alo, Paia o le Aiga Samoeleoi, ma le Aiga Sa Lilomaiaava, le Matua ma le Alaalamaota, ae a le tapuaiga i Maopu ma le Matua, Tapaau Tausi o le itumalo, ao se faautautaga foi i le fetalaiga ia Sela ma Olo faapea le mamalu i le Taupoloalii ma le Alataua.

**23 IANUARI 2019**

**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

Matou te avatu ai le faamalo, ma le faafetai i lea tausaga ua tuanai atu, ma nisi foi tausaga ua tea atu, e oo mai i le taimi lenei, i galuega sa fitaituga i ai le afioga i le Palemia ma le aiga Kapeneta, le tatou faigamalo. Faamalo le lototetele, faamalo tauivi, faafetai le galulue aua se manuia o le tatou atunuu. E ui lava sa fetaii tatou ma matagi, i le tele o faafitauli e tutupu mai, ae aoga ia luitau faapena. E iloa ai foi le tautai e tapena. Ma o mea foi na ou te manatu lau afioga i le Fofoga Fetalai, e ta i ai pute a tautai matapalapala, ma le tauvao e seu mataalia.

O lenei tausaga fou i lau afioga i le Fofoga Fetalai, ia o upu masani e vaapiapi le ala i manuia, e le faigofie le sailiga o malo, aua le atunuu ma le tapuaiga. O nisi foi o taimi e nanau le loto, ia tele ni figota aua le tapuaiga a le atunuu, ae na o se tuualalo lava lea a Salega i Sasae, seu matapoto. Ua tupu le malamalama i aga faatekonolosi i nei onapo, tele auala e ono lamatia ai lo outou soifua ma lo tatou olaaemaise lo tatou atunuu atoa, seu foi ma toe tepa ane, i le soifua saoloto ma le soifua fiafia o Samoa, ia faatumaui. O outou mama na lau afioga i le Palemia ma lau Faigamalo.

Avea foi lenei taimi e momoli atu ai lau faafetai tele, i le mamalu o Ofisa Sili o Pulega a le Malo ma Faalapotopotoga, i lo outou fitaituga i le atinaeina o le tatou atunuu, i la outou pitolaau e le faigofie. Ae o le upu moni lau afioga i le Fofoga Fetalai, e mulimuli le tau i le galuega a le tagata.

E faapitoa lau faatalofa atu i Ofisa Sili o Pulega fou o Matagaluega lea ua ofi mai i totonu o le polokiki, tou te niniva faasoloatoa, ae ia outou onosai. Lau afioga Leasiosio, ia o lou suafa Leasiosio e malosi, o le a ta galulue faatasi. Avatu lau fautuaga o le taimi lava e tau maso atu ai oe e le Palemia ma lana Kapeneta, faa-asiosio mai i ai le faiga o lau galuega, ma e musumusu mai ia te au e pei lava ona ou fai atu o le a ta galulue faatasi.

Avea foi lenei taimi ou te faatalofa ma ou faafetai atu ai i Pisinisi Tumaoti o le atunuu, i lo outou sao taua i tupe maua i lea tausaga ma lea tausaga, tele ia o outou tupe e aumai, ia aua le taliina o manaoga o le atunuu ma le faatupeina o fuafuaga alualu mamao o le tatou Malo. E faapena foi ona ou faatalofa atu i le tatou atunuu, mai fafo po o tatou paaga masani, faafetai i lo outou agalelei mai i lo matou aisi aisi atu, ua uia lava ala o le mativa ona o lo matou fiaola, aua ana le seanoa lo outou limafoai, e tasi lava lo matou toomaga, e na o le matou o i faletupe e loan mai ni tupe e faatino ai ia matou fuafuaga. Faafetai, momoli foi le faafetai i lo tatou atunuu, paia ma mamalu o lo tatou atunuu i ona tulaga faalupeina, aua ua mafai ona faataunuina nei mea uma ona o lo outou lagolago mai. Aua ana leai lo outou mamalu, e le mafai foi ona minoi pisinisi tumaoti. Ana leai foi lo outou mamalu tou te afio mai ma totogi a tatou fees foi ia i Matagaluega service fees taugata lea e i ai, e le maua foi ni tupe e fau ai lo tatou Malo.

Lau Afioga i le Fofoga Fetalai, e faapitoa lau faafetai ma lau faamalo i le afioga i le Minisita o Tupe, faamalo le lufilufi aao lelei i lau afioga. E itiiti lava lou tino vae atu lau afioga i le Minisita, ae to lou pulou i lou faasoaina o si nei lava tamai fasilupe i le budget lenei. Pau lava si ou sasi lea ei i, ua e toe ave atu foi isi tupe ia Tialavea e toe fau ai lana falepuipui, pau lava lena o lou sasi lea ei i ou te fai atu ai. Ia na ona taatia atu pea i lau afioga.

**23 IANUARI 2019**

**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

Lau Afioga i le Fofoga Fetalai e faamauina le agaga faafetai o lenei itumalo, i le agai i luga o tatou tupe maua masani. Ou te faafetai atu lea ia Tialavea, ia ma lana Matagaluega i le aoina o lenei seleni. Faamauina foi le agai i luga o le tatou tamaoaiga, malo faafetai. O le a le tatou mea e fai i le taimi nei? Tatou faafoi le viiga i le Atua i lana foai.

Ae manatu lava lenei itumalo lau afioga i le Fofoga Fetalai, atonu e le o le atoaga lea, o tatou tupe e tatau ona maua i lea tausaga ma lea tausaga. Tele ia tatou tupe lau afioga i le Fofoga Fetalai, e faamaumau, i lo tatou faatamala, ma lo tatou faaloloto ma lo tatou faatautala, o ni upu tuusaø

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai....

**FOFOGA FETALAI:** Malie le sui usufono se i tulai mai le Afioga i le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:**O se mea e fia faasao. Ua matauina ma le totoa le le manatu o le sui usufono i Ofisa Sili o Pulega uma o Matagaluega a le Malo. Ua ia le amanaia. E leai lava ma se upu o ave i Faauluuluga o Matagaluega uma a le Malo e silia i le 30, ina ia silafia ai, ia le sao o latou uma nei. Ua leva ona ei totonu o le Maota, ua leva foi ona e faafeagai ma galuega faakomiti. Ae lea e foliga mai e te le o amanaia le galuega tele o lo o fai e le toatele o Ofisa Sili o Pulega uma o Matagaluega a le Malo.

O le vaega lona lua lau afioga, e uigā au saunoaga i le falepuipui. E te silafia lelei e faapena ona faatino galuega leaga e te le i Minisita. E te le malamalama i mea ia. Afai e alu alu ia se galuega, afai e le uma i se tausaga e faaauau i le tausaga lona lua. E leai se galuega e fai fai tu ai lea, e tatau lava ona faaauau ma faamaea. O lenei falepuipui ua leva ona laumanuia aemaise o le tuputupu pea o soligatulafono, o lea ua agai atu ai ina laititi Tafaigata. O lea la e manaomia ai se fale e malu, malu lelei, fale lelei toe tel .

E ala la ona ou tulai atu, e faapena le faagasologa o galuega, a le uma i le isi tausaga e faapena ona faaauau i le isi tausaga. E leai se galuega e fai fai ona le uma lea. E uig upu ia e saunoa ai le sui usufono. O le faasaoga lena lau afioga.

**FOFOGA FETALAI:** Ia se i tulai mai le sui usufono, ae se i fai atu le fautuaga a le nofoa. O lea ua malele ma saunoa le Taitai o le Malo e faapena foi le fautuaga a le nofoa, agai mai i totonu o le tatou Palemene ma Minisita ma le Palemene ae aua le agai i tua i le aufaigaluega mamalu a le Malo aua e le saunoa mai latou i mea o lo o e malele ma e saunoa ai. Ae tuutuu mai i totonu i le tatou Palemene ia tatou saunoaga. Ia o le fautuaga lea a le nofoa, aumai i totonu o le Palemene lau saunoaga. Tulai mai le sui usufono e faaauau lau saunoaga.

**23 IANUARI 2019**

**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

**Tofa OLO FITI AFOA VAAI:** Faafetai i lau afioga mo le saunoaga, ia ou te... e uma loa ona ou faafetai atu i le afioga i le Palemia ma le Kapeneta, ae ou faafetaia loa Ofisa Sili o Pulega o Matagaluega ma Faalapotopotoga a le Malo. Po o misi lana faafofoga mai, ae ui i lea o le a...

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioaga e lei ...

**FOFOGA FETALAI:** Se i tulai mai le Taitai o le Malo.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** E le i misi ia te au, ae o lea ua e saunoa sao lava i ai i le tulaga lea. Aua le taua fua suafa o i latou aua e le tali mai, ae o lea ou te faalogologo lelei atu lava i ai e i ai lava upu e masani ai le atunuu. *-E i ai e faalele, e i ai e matau'.*

**FOFOGA FETALAI:** Malo, se o tatou lava ua leva ona... faafofoga mai le sui usufono, ua leva na polokiki. Tuu mai i totonu, tuu mai i totonu le saunoaga.

**Tofa OLO FITI AFOA VAAI:** Lau Afioaga i le Fofoga Fetalai e pei ona ou fai atu, o upu tuusao na o le alofa, e pei ona ou fai atu i le taimi ua sola. Aua po o fea lava e agai i ai ia tatou taumafaiga, tatou te le taunuu seivagana lava ua tatou toe foi mai, foi mai i tua, e toe faaleleia ni mea o faaletonu.

Lau Afioaga i le Fofoga Fetalai, le tausaga lea na se i mavae atu nei, o se tausaga ese lea i totonu o le tatou atunuu. O le tele o faafitauli, uma atu lea Matagaluega a le Malo, oso mai lea Faalapotopotoga. E mafai ona ou faapea atu lau afioga i le Fofoga Fetalai, i le gagana faigofie, o vaivaiga faale-tagata.

Ae a tatou talanoa loa i faiga faavae faapalemene ma faiga faavae a le Malo, o le corrupt, o le mea lena o lea e tupu i totonu o le tatou Malo.

Lau Afioaga i le Fofoga Fetalai, o le upu moni, e leai se...

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioaga i le Fofoga Fetalai, o le ala lea ou te tulai atu ai.

**FOFOGA FETALAI:** Malie le sui usufono, tulai mai le Taitai o le Malo.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Ua tele le le mafaufau o le sui usufono, o le le anoano o le soona saunoa i upu tuulafoai. Ae o le faaaogaina o upu ia. O le a le mea e te le sau ai e talau mai? Po o le a le corrupt lea e te talanoa i ai?

**23 IANUARI 2019**

**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

O le faiga lava lea o le sui usufono lea mai le amataga. E leaga lava mea uma e fai e le Malo, o le ala lena na ala ai ona tuu oe i totonu i o i le Komiti lea e te galue ai. E te silasila ma aumai lau fautua. E le faapea a lavea se taavale i se isi ona faapea lea ua corrupt. Aua le fiafia e soona lafo upu ae le malamalama ai.

Lau Afioga i le Fofoga Fetalai o le ala lena e ala ai ona i ai suetusi, o le ala lena e ala ai ona i ai ia tatou loia, e molia ia mea faapenei i le Tulafono. O lea e malu lelei ia a tatou faiga faavae. O le vaai mai foi a latou i fafo, e leai lava ni mea faapea.

Lau afioga, e i ai lava ia uiga faauigalua, e oo foi la i le mataupu lea na ala ai ona alu aumai lana article tele mai o i le Observer i fua o le Malo o Saina e faalumuluma i le galuega o le fausia o le fale taalo. E 6 fua la e sisi faalelea ai, ae alu lava aumai na o le fua e tasi o le Malo o Saina. O le a la le mea o leaga? E le o le mea ea lea e ala ai ona faalelea fua o Malo o lo o fesoasoani mai i le tatou Malo, o le faailo o le Malo o lo o aumai ai le fesoasoani. O le a le leaga? Ae o mea ia e te fealuai faaleaga atu lea mea faaleaga ane lea ae o lea e maua mai ai fesoasoani aoga mo fanau a Samoa.

Lau Afioga i le Fofoga Fetalai, o le sui lea e pototo tele e faaleaga isi, ae tilotilo ifo oe ia te oe, po o a au mea na fai, tilotilo ifo oe ia te oe, ma au pisinisi ia sa fai i le mea o lo o i ai ia faletetele o le Malo i Tuanaimato. O na aiga uma na matua le manofonofu i le pisapisao o au pisinisi sa fai ai ua le mafai ai ona momoe. Se e lelei ona matau ifo oe ia te oe, ao lou fiafia e lafo upu faalumuluma i isi ae o lena foi e faulai ou faaletonu. O le corrupt o le Malo o le tupu o faaletonu ae le faia i ai se fofu. O le sao lena. Aua e te fiafia e lafo leaga i isi, ae se i mafaufau muamua ifo oe ia te oe, po o e faapefea mai.

**FOFOGA FETALAI:** Ia masalo e... faamalulu atu i le sui usufono mamalu, o le tiute lava ia o le nofoa o le fautua atu, saunoaga faauigalua ma le tuutuu mai i totonu o le Maota. Aua le ta i tua i le atunuu ma le aufaigaluega a le Malo ma taua o latou suafa leaga e puipui e le tatou Tulafono Tumau, e sa ona taua suafa o le aufaigaluega leaga e le mafai ona tali mai i le saunoaga a le sui usufono mamalu.

Ae o ni lafoga e le faavaea, e mafai ona tapa, ioe, o le tatou Tulafono Tumau e 83 o lo o taua ai ia puipuiga o mea ia o faauigalua. A oo la ina tapa ia faasaoga ae le mafai e le sui usufono ona tuuina mai, ona fai lea o le aulape. Ioe e ono tulai mai ni faafitauli e tatou te le fia o i ai i lea vaega ae tulai mai le sui usufono, aumai i se gagana foi lea e faigofie ona maua ai se fesoasoani i se suiga foi o lou finagalo. Tulai mai le sui usufono.

**Tofa OLO FITI AFOA VAAI:** Faafetai, ia o le a le faia atua sau faamatalaga, molimau le atunuu. O nisi ia o vaega o le a ou talanoa atu i ai. O le tele o Matagaluega ma Faalapotopotoga a le Malo, e tai o mai lava ma a latou avanoa ia e le faatumuina. E leai ma se Matagaluega ma se Faalapotopotoga e misi mai le mea lea, ma aumai e avatu ai totogi i totonu o avanoa e le i faatumuina.

**23 IANUARI 2019**

**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

Lau Afioga i le Fofoga Fetalai, sa ou faamaopoopoina le aofai o tagata faigaluega e tusa ma le 530 ia avanoa e le i faatumuina ae ua uma ona avatu i ai tupe...

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, o le mea e fia faasao lau afioga.

**FOFOGA FETALAI:** Se i tuu atu i le Malo se i faamalamalama le vaiiliu lea, tatou te manino ma malamalama ai.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** O fuafuaga na e faaigoa o policy a le Malo e fesuisuia. E tele taimi e aumai ai e Tala o Tupe ia ni avanoa, ae faasalalau atu ae leai nisi po o le talosaga foi o nisi ae le agavaa. Ae le faapea la ua corrupt se Malo. Ailoga o e malamalama i le faasamoa o le upu? O mea piopio, o a la mea piopio? Se i saunoa mai, o a la mea piopio?

O le ala lene na ala ai ona tuu oe i totonu o le Komiti lene ete galue ai. Soia e te faaaogaina sese avanoa na tofia ai oe aua e faigofie ona toe aveese oe mai totonu o le Komiti lene i lou faaoga sese o faamatalaga nei e maua mai ai ni fautuaga lelei a le Komiti mo le Malo. A o totonu o Komiti nei, e noatia uma outou i totonu o le tulafono o le puipuia o faamatalaga e le faalauaitete. O le ala lene e mafai ai ona maua atu faamatalaga sao, ona o le iloa e tagata e o atu ae taofiofi faamatalaga ia ia tou felafolafoaiga. Ae o le mea lea o lou aumaia i fafo ma faasalalau, e le talafeagai le mea lene, ma le faatinoga o outou galuega faa-Palemene. Ailoga o e faitau i Tulafono o le Maota e uiga i amio ia ou te talanoa atu ai? Afai o le faiga lea, e leai ma se isi e toe fia avatu ni molimau ia te outou. Mo avanoa galue ia e taua. Afai e le o mafai ona faatumu, ona o le tulaga lea o le faasalalau ae leai ni tagata, o le a saga tuu ai lava la tupe ia ae le tatau loa ona faaoga? E te le i i ai i totonu e te le i faigaluega i totonu o le Malo, i le tulaga o mea ia ou te fai atu ai. E le i aveae oe ma se Minisita o le Kapeneta? E tatau ona toe fetuutuunai ma aumai i totonu o Tala Faaopoopo o le Tupe ni tupe totoe e toe fetuunai ai. O le uta a le poto o le fetuutuunai.

**FOFOGA FETALAI:** Ia se i tulai mai le sui usufono

**Tofa OLO FITI AFOA VAAI:** Lau Afioga i le Fofoga Fetalai, ia e 532 avanoa e le o faatumuina. A ua masani ai i le tulaga lea o le aumai pea aumai pea i Tala o le Tupe uma lava, ona avatu loa lea o tupe....

**FOFOGA FETALAI:** Ua ou fautuaina le sui usufono mamalu. O lea ua maea ona tulai atu le Palemia e faamanino ma faamalamalama lene tulaga. Ua leva lava foi ona tatou Komiti faatasi mai i na mea, tatou te iloa lava faiga faavae na mai ia taimi i ia taimi.

**23 IANUARI 2019**

**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

E le o i i foi Tuivalea ia i latou o lo o faapena ona faataotoina polokalame ma fuafuaga i totonu o lea Matagaluega ma lea Matagaluega. Ae ou te fautuaina, o lo o i ai foi Tulafono e puipui ai tatou o sui usufono mamalu o le Komiti ina ia aua ne i aumaia tulaga ia e fau ai i se agaga foi lenei e tulai ai se faauigalua o se saunoaga i totonu o le tatou Palemene, leaga e faapena le puipuiga ina ia malupuipua ai foi galuega a le Komiti latou o lo o faapena ona latou feagai ai ma Matagaluega ma le auaigaluega a le Malo. Ae malie e see ese i se isi mea. Ma ou te tau atu ma ou fautua atu, o le saunoaga faamalamalama a le Malo, that's final, ua uma, e le toe faataumatatao i ai se isi se i e Palemia foi oe. Ia tulai mai le sui usufono e saunoa.

**Tofa OLO FITI AFOA VAAI:** Faafetai i lau Afioga i le Fofoga Fetalai. Ona ou oo mai lea i Lipoti Faaletausaga lea e aumai i totonu o le Palemene lenei, sa tatou amata mai i lo tatou iloilo ina faatasi o lipoti ina ia malamalama ma silafia e le atunuu le faaaogaina o tupe a le atunuu e Matagaluega ma Ofisa o le tatou Malo. O fea o i ai le mea lena? Na sui nei lava i le Paeaiga lenei. O lea ua le toe faia le mea lena a ua tuu i Komiti, na o le toalima lava sui o le Komiti e malamalama i mea ia ma le... ae pogisa uma le toatele o le Palemene.

**FOFOGA FETALAI:** Malie le sui usufono se i saunoa atu le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai, o le suiga lea o le tausaga e 1995 na sui ai le faiga lea a o le taimi lena e le i faipule le sui lea i totonu o le Maota. O le mea lena ou te fai atu ai, se i fesili mulimai ia muamai. O le mea sa fai i totonu o le Maota lenei, o le talanoa o Lipoti, e le avea i ni Komiti. O le taimi lena e oo i le tai tolu vaiaso o fai fonotaga a le Palemene. E le umi lava ona talanoa ae faatu le lafo, soloia uma Lipoti ua leai se taimi e talanoa ai, soloia uma ai lava. Masalo o lea ou te tau tomanatu nei, po o le tausaga e 1997 lea na teuteu ai le tatou Tulafono Tumau, ona faaopoopo atili ai lea o Komiti o le Palemene latou te talanoaina lipoti i tulaga faa-Komiti. O tua atu la o le 1997 sa talanoa uma ai lava i totonu o le Maota mea nei o Lipoti nei o le faagasologa o galuega a lea Matagaluega ma lea Matagaluega faapea foi ma kamupani a le Malo mo le tausaga atoa. Ae talu ai la ona e fiu e talanoa Lipoti nei i le tele, ona fai ai lea o le suiga a le Malo i lena taimi i totonu o le tatou Tulafono Tumau o le a faaopoopo ni Komiti. Lea la ua tele ai Komiti, e fai ma a latou galuega, o latou o sui o le Palemene lenei, o la outou galuega lena e fai o le faitau o lipoti o galuega fai. O lea la e tele ai tatou Komiti e tou te o e avea ai outou ma sui e tou te vaai i mea uma nei ma lipoti mai i totonu o le Palemene. A o talanoaga o mea o le faagaioiga o tupe, standard le tulaga o lo o i ai le faagasolo o tausaga i le agai i luma ma tupe o lo o maua ma tupe faaalu, ma le tulaga ua taunuu i ai.

**23 IANUARI 2019**



**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

O mea tetele lava na e tolu i Komiti nei, e tilotilo i alatupe maua ma tupe alu, ma se tupe faaopoopo na maua po o se tupe foi na le maua, ma faatino ni dividend i le tatou Malo. O lea la e fai ma galuega tumau a le tatou Matagaluega fou lea na faatu nei mo Enterprises, e tulituliloa ai e le Minisita faapea foi ma le Matagaluega kamupani ma i latou o lo o maua tupe e aumai i totonu ni seleni i lo tatou Malo ma ave foi le fautuaga i ni tulaga ua faaletonu ai ina ia toe faaleleia. E le mafai ona malamalama i mea ia pe afai o lena e fusia lou finagalo i mea leaga, na o mea leaga lava na e te tilotilo i ai, a ua misi ai ia te oe galuega lelei uma ia e tatau ona fai o le fautua i auala e agai ai luma galuega. O tiute la na a Komiti latou te faatinoina ma aumai ai a latou Lipoti i totonu o le Palemene. O Lipoti la na a aumai, ona ave loa lea tali mai i ai Faauluuluga o Matagaluega, ona aumai loa lea i totonu e table ma silasila i ai tou Komiti ma matou i le tulaga o tali ia na aumai e faaleleia po o faaletonu foi o i ai.

Lau Afioga i le Fofoga Fetalai, o le tulaga atoa lena, e malamalama gofie pe a maua mai lau faamalamalama, ae ala ona pei e foliga e lavelave ona o lea e i ai le agaga tiapolo i tua e ave le uiga sese. O le mea lea, o mea ia na tutupu ae le i ave ae ma faipule. O le mea lea, ia e toe amanaia mea nei, e faalogo mulimai ia muamai.

**FOFOGA FETALAI:** Ia, tulai mai le sui usufono e saunoa. See ese maia i lea mea.

**Tofa OLO FITI AFOA VAAI:** Faafetai i lau Afioga i le Fofoga Fetalai. O totonu lava ia o le Palemene e fai lava le finagalo o le sui usufono ia. E le tau faalogo fua le isi sui usufono i le isi sui usufono. O le saoga lena o le....

**FOFOGA FETALAI:** Ou te fautua atu... Malie le sui usufono, se i toe tulai mai le Afioga i le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai, ou te toe faamanatu i le sui usufono, e le mafai ona tuua e le Malo ni mea faaletonu. Ua leva ona i ai le sui usufono i le Palemene ae le o iloa lava mea e fia faasao ma mea fia faamalamalama. O le mea lena e avanoa ai le Kapeneta e tutulai atu pea i le sui usufono. O lona uiga la, o le taimi lava e sasi ai, faasao loa e le Malo.

**FOFOGA FETALAI:** Ia, tulai mai le sui usufono.

**Tofa OLO FITI AFOA VAAI:** Lau Afioga i le Fofoga Fetalai, e malamalama lelei lava le sui usufono o Salega i le mea lea e saunoa i ai le Afioga i le Palemia. Ia manatua foi o taimi ia, e uma loa ona fai le lipoti a le Komiti table i totonu i i, talanoa.

**23 IANUARI 2019**

**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

O le taimi lenei, uma ona fai le lipoti a le Komiti ona ave lea i le Kapeneta e tali mai. Ia se i silasila ane lava lau Afioga i le Fofoga Fetalai i faamaumauga a le Palemene po ua fia lipoti a Komiti e le talia maia, tai fia masina e le talia.

**FOFOGA FETALAI:** Ou te fautua atu i le sui usufono mamalu, o mea sa faapena ona.... o aso ia sa leai se mea sa le tali mai le Malo. A o aso nei o lea ua tali le Malo i fautuaga na, a o aso ia i le matou faatoa omai e le tali le Malo, o lea ua more temokarasi atu le mea lea ua i ai ua tali mai le Malo. O le tau faapupulaga lea a le Nofoa leaga o lea ou te nofo ua leva foi ona avea ma sui usufono, ua tolusefulu tausaga, ae ui i lea, se i saunoa mai le Malo pe moni lau tala lea e fai atu.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai, o lea ua uma ona vaavaai latou i lipoti ma aumai foi a latou lipoti lea ua tali mai le Malo. O ai la se isi o toe aisili? O au foi ou te le malamalama i mea ia e fai mai ai le sui usufono, o le anoano o le mau lipoti e avatu i le Kapeneta e tai tofu lava le Fono ma ia lipoti e aumai, e tasi lava le upu a le Kapeneta, ave loa i le Palemene. E faigata tele ona oa sau lauga pe a faapea o lo o tumu lou manatu i uiga faatiapolo. E le mafai ona lelei sau lauga pe afai na o le pau lava lea o le mea e te agai i ai, na o le faaleaga, faaleaga, faaleaga. Vaai, aua ne i galo ia te oe, e le valea uma tagata. O la e matau lelei, e pau le mea e fiala tagata e fia faalogologo mai ia te oe pe a e tu i luga o oe o le sui usufono ua leva, ae matua faanoanoa, o mea ia e alu atu, na o mea e aliali ai lou vaavaa. O le tuualalo lena, faalogo i upu a e matutua.

**Tofa OLO FITI AFOA VAAI:** Lau Afioga i le Fofoga Fetalai, ua saunoa soo lava le Afioga i le Palemia i mea nei o le tiapolo. E faapei foliga o lena mea? E te lua mafuta ma le mea lena i taimi uma? Ou te le i vaai lava au ia i ai. E ui i lea lau Afioga i le Fofoga Fetalai, o le a ou oo atu i le isi vaega lea, leaga e ala ona ou talanoa i lipoti nei, na o le toalima lava sui usufono o le Komiti, e 13 le Kapeneta, pau lava na o tagata o lea e malamalama i mea ia, a o le isi 31 o sui usufono, latou te le i vaavaai i lipoti ia ma tali o lipoti ia.

**FOFOGA FETALAI:** Ia, se i tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai, ia tasi la lea mea e ave ai manatu sese i fafo. O lea ou te tau manatu nei e 19 le aofai o sui usufono ia e i totonu o Komiti, 19 le aofai o outou lea e i totonu o Komiti tou te tilotilo i lipoti nei, o outou o sui usufono o le Palemene tou te tilotilo i lipoti tou te lagolago i galuega a tatou uma, o tatou o le Malo, e aofia ai foi ma oe. Ailoga o e malamalama i le mea lena? E ave le fautuaga i Matagaluega, e 19 sui usufono o le Palemene lea e i totonu o Komiti nei e tilotilo i Lipoti. Ae a faalogo i ai, pei lava na o ia lea e tilotilo i lipoti. Aua e te fuaooina le Palemene lenei, aua.

**23 IANUARI 2019**

**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

**Tofa OLO FITI AFOA VAAI:** O oe le fuaao numera tasi o le atunuu ma le Palemene lenei.

**FOFOGA FETALAI:** Ia se i... Malie le sui usufono mo Salega Sasae se i tulai mai lava le sui usufono mo Palauli le Falefa po o ai o ouluea e manao e faasao po o le Palemia po o...

**Afioga Hon Faumuina Tiatia Faaolatane Liuga:** Lau Afioga i le Fofoga Fetalai, o le mea e fia faasao. Leai o faamaumauga, e 23 sui usufono ia o lo o i totonu o Komiti, e toatolu le Vaega Tutoatasi ma le Sui Fofoga Fetalai, ona 23 lea o tagata ia e i i. Toeitiiti lava afa le Palemene. Ma lou faaaloalo lava.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Faafetai atu i le Afioga i le sui usufono, o lea sa ou tau faamamaina atu na o sui usufono o le HRPP ae ou te le i tuua i ai i latou ia e toatolu. A faaopoopo la i ai, e sao la le Afioga ia Faumui. Ia se i vaai la i le toatele o i latou nei e tilotilo i lipoti? Ae a faalogologo lelei mai lava i upu a le sui usufono, e pei na o ia lava lea e tilotilo i lipoti ae piano uma latou. E muamua oo mai lipoti na i le Kapeneta matou te tilotilo i ai ona faatonu ai lea e avatu loa i Komiti a le Palemene. O le faatonuga a au ma Minisita o le Kapeneta ma Ofisa Sili o Pulega uma ia, so o se taimi e valaau mai ai Taitaifono o Komiti uma a le Palemene, tuu a outou galuega ae o, o e faamatala ma faamalamalama mataupu o lo o laga mai, leaga o taitai ia o Samoa. Ua outou vaai i ai i le lagolago tele a au ma le Kapeneta? Aua ne i i ai se mea e nana, leaga o le Malo lenei o le Malo e faavae i luga o le transparency ma le accountability, aua le faalafia ni mea. Aua ne i faalafia ni mea, faaaliali uma mea uma ma faamalamalama mea uma. Lau Afioga i le Fofoga Fetalai, o le mafuaaga lena, o lea la ou te faafetai atu ai ia Faumui, se ua leva ona ou nofo ma ou vaavaai po o afea tou te tutu mai ai outou e faamatala mai mea i i, o outou uma o le HRPP, ae na o le toatolu lava latou ia, e le afaina le isi toalua ae na o le toatasi lava lea e taufaavalea, tutu mai foi outou e faasao.

**FOFOGA FETALAI:** Ia, ua ou manatu toe lua minute o le sui usufono aua o lena ua i ai uma a taimi ia sa faauilavea ma mea faapena. Faaiu mai le saunoaga a le sui usufono.

**Tofa OLO FITI AFOA VAAI:** Ia, o lea la ua manino le faafofogaaga a Samoa, e toatolu lava le Itu Agai, ae pei e tau... ou te le iloa po o le a le tauga lea e tau ai le isi itu agai.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga e leai o lea foi e sese, e leai se Itu Agai. Se o lea e tau faasaosao atu a tatou mea, e leai se Itu Agai, na o sui tutu taitoatasi. O le sao lena, na o sui tutu taitoatasi. Ia o le sao lena.

**23 IANUARI 2019**

**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

**FOFOGA FETALAI:** Malie se i tulai mai le sui usufono mo Falealupo.

**Afioga Hon Aeau Peniamina Leavaiseeta (Falealupo):** Lau Afioga i le Fofoga Fetalai, ou te tulai atu o se mea e fia faasao. E leai e le fia faasaoa, e fia faamalamalama atili. E leai e le toatasi le sui usufono o lenei Itu, a o le taua ia i le faafofogaaga a le atunuu atoa foi ma le Palemene, e ese le manaia o se issue ae malamalama. E ese le manaia, silasila foi, taatia ia le matou itu, ae silasila foi i le taua o si a matou tamai point lena e ave atu, a ia malamalama lelei. Silasila foi e oo foi i le Palemia e faale o malamalama foi ia i le mataupu atoa lenei. Lau Afioga e manaia tele le fetufaai, ae o le a matou faalogologo pea. Ae ua lava le lua pisa ae faapuupu la tatou mataupu, faafetai.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** E leai ou te le o faapea ou te le o malamalama, a lea na ou talanoa atu, o lea na ou taua atua na o le matou vaega. Ia aua ne i taai faafala ai la outou toatolu. O le uiga tonu lena, aua o la e pese mai lava Olo ia, e peiseai na o ia ma la outou vaega e toalua lea e malamalama. Ae o lea o le a ou tau atua, e toasefulu iva isi sui usufono ia e auai i totonu faaopoopo la outou toatolu ua toatele, toaitiiti lava afa o le Maota, lea e faitau uma i lipoti nei. Ae a faalogologo mai i le ituaiga lauga lea e aumai e le sui usufono Salega, e pei lava na o ia ma oulua e toalua lea e tilotilo i mea, ao lea e tilotilo uma outou e le o taofiofia e le Malo ia ni mataupu o lea e malamalama uma. Matua tele na mau pepa e taatitia mai i luga o tou laulau. Leitioa foile saunoaga a Tofilau i le isi Fonotaga, "Ua toetiiti ona solo lea o lipoti nei tanumia atu ai ma feoti atu ai nisi o sui usufono le tele o nei mau lipoti. Ae sa mafai lava ona tagofia i lena taimi. O le taimi lena ao matou itu faatasi male sui usufono mo Falealupo. Sa lelei foi le finagalo o le sui usufono mo Falealupo i na foi taimi. Na alu ese loa foi ma le HRPP, faaletonu atu ai foi ma ia.

**FOFOGA FETALAI:** Faaiu maia le saunoaga a le sui usufono mo Salega o lo o saunoa.

**Tofa OLO FITI AFOA VAAI:** Ua alu se lou taimi i lenei mea....

**FOFOGA FETALAI:** E i ai se mea e fia saunoa i ai le sui usufono mo Gagai fomauga Nu 3.

**Afioga Faaulusau Rosa Duffy Stowers:** Faamolemole lau Afioga i le Fofoga Fetalai, pe maua se avanoa. Faafetai lava i lau Afioga i le Fofoga Fetalai.

**23 IANUARI 2019**

**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

E moni lelei lava le saunoaga a le Palemia. E le o i ai se Itu Agai, e na o sui usufono lava o le Palemene ia e i i. E i ai o matou tagata. Ou te tu atu ai i lou ava ma lou migao e tatau ai, faamolemole lau Afioga i le Palemia, ou te le o i i le vaega a le sui usufono mamalu o lo o saunoa nei, ae ou te tulai atu i le ma ava fatafata ma le va feagai ai, *E faaopoopo se lima minute e faauma ai lana saunoaga.*

Faafetai.

**FOFOGA FETALAI:** E faaopoopo se fia minute? Se lua? Ou te le taliaina ona ua tea le taimi. Ua faalua ona fai lau faatonuga i le tulaga o lo o i ai. Ae ui i lea o le a ave atu pea leaga o lea ua faatu mai le lafo. Ou fai atu, e faalua loa ona tuu atu le avanoa, ae le tulai mai se sui usufono e faatu le lafo ona tea lea o le taimi. Ae ui i lea leaga ne i te i ua tuaina le Nofoa i le aia tatau a le sui usufono. Tulai mai le sui usufono e faaopoopo se lima minute.

*E le i faaluaina le lafo.*

*E le i tuuina atu le maliega autasi a le Maota i le lafo.*

**Tofa OLO FITI AFOA VAAI:** E toatele lava le au ioe lemu, ae tasi le leai lapoa. Ae faafetai mo le lima minute faafetai i le sui usufono tamaitai faipule.

**FOFOGA FETALAI:** Faaiu mai le saunoaga ua maea lou taimi.

**Tofa OLO FITI AFOA VAAI:** O le a faaiu atu lau Afioga i le Fofoga Fetalai, e toe tasi lava si vaega lea. E matau lava ma le totoa ia le tulaga o tatou tupe faaalua. I le mea lava lenei o taavale, penisini o taavale tulou le Maota. O taavale e toe faaleleia, ma taavale lavevea nana, tele ia o tupe, faitau fia sefulu miliona e alu i tausaga uma lava. O le mea lea e ave atu le fautuaga, ia outou afioga i Minisita, e malamalama lelei lava le sui usufono. E tasi le taavale i totonu o konekarate faa-minisita. Ao le mea lea e i ai nei, e taavale le Minisita, taavale le faletua, taavale le atalii po o le afafine, silasila le atunuu i ia faiga faapea. E oo foi ia outou Afioga i sui Minisita, e ave atu le fautuaga lena, o lea faatoa tai tolu tausaga o le Paeaiga. Ae ua malepelepe taavale na avatu nei, mataga taavale a le Malo. O le mea lea, alolofa maia a outou afioga, o tatou e ave atu ai le faataitaiga i Ofisa sili o Pulega.....ma le aufaigaluega atoa e vaai nei taavale.

**FOFOGA FETALAI:** Tulai mai le Palemia leaga e matuia le saunoaga a le sui usufono.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaioi:** E leai se lipoti faapena o aumai i totonu o le Kapeneta e i ai ni mea faapea. Ma e leai foi se mea e taofia ai le aumai o lipoti i tulaga ua aliali mai ai ia uiga faapea.

**23 IANUARI 2019**

**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

E leai se taavale mo faletua o Minisita, o le taavale lava e tasi a le Minisita e tietie aifoi le tina o le aiga. E ave foi le taavale ma le faaeteete. E leai la ni mea faapea o i ai. Ae o le mafuaaga lena o lea na ala ai ona tofia outou i komiti tou te tilotilo i ai i ni lipoti o i ai ni uiga faapea. Ae l o le aumai o ni tuuaiga faapea ae e leai ni faamaoniga. Lau Afioga i le Fofoga Fetalai, o le tulaga lena o lea ou te tulai atu ai. Ou te tau matau e i ai Faumui Liuga i totonu o le Komiti faatasi ma Olo, o lea ou te fesili atu ia Faumui, e sao ea ia mea Faumui?

**FOFOGA FETALAI:** Tulai mai le sui usufono mo Palauli Le Falefa..

**Afioga Hon Faumuina Tiatia Faaolatane Liuga:** Ai e eseese lipoti la e faitau i ai le sui usufono mamalu ma lipoti ia ou te faitau i ai. Ou te le i vaai i se mea faapea lau afioga.

**FOFOGA FETALAI:** Se o lea la e molimau e le isi sui usufono mamalu o la outou Komiti e sese lau saunoaga e leai se mea faapea. Se i mama ia le sausu ma see atu i se isi mea.

**Tofa OLO FITI AFOA VAAI:** Manaia lava si a matou komiti ae ua toe susu lava le sui o le matou komiti, ia soia ia, e usitaia e le.....

**Afioga Hon Faumuina Tiatia Faaolatane Liuga:** Lau Afioga i le Fofoga Fetalai, leai ou te fautuaina le sui usufono, e saunoa mamalu. A lea na ou fai atu, atonu e eseese lipoti o lo o silasila i ai. Ou te le o vaai i ni lipoti o ni taavale lavevea ma ni taavale o faaoga le tatau. Atonu o le Komiti o Tulafono Tumau lea e ave i ai lipoti. Ae ou te le o faitau i se lipoti o i ai ni mea faapea i le Komiti o Tupe maua ma Tupe totogi, e faapena foi le faamatalaga o tupe a le Malo. Ma lou faaaloalo lava.

**Tofa OLO FITI AFOA VAAI:** Lau Afioga i le Fofoga Fetalai, e tele lava mataupu e fia oo i ai sau faamatalaga.

**FOFOGA FETALAI:** Ua maea le taimi o le sui usufono.

**Tofa OLO FITI AFOA VAAI:** Ae faigata o lea ua faalava le amoa i lou finagalo ua lava lau lauga. Silasila lau afioga, e tau o le Itu Agai, ae o lea ua matou toe vevesi matou i i, ua toe au i o, ai o le vaavaai atu ai foi o lea vaega ua tau vaivai mai o, e pei o le mea lena ua o mai faatasi ai. Ae ui i lea faafetai mo le avanoa. Manuia lau Afioga i le Fofoga Fetalai manuia la tatou Palemene, ae ola Olo e le aea e se fili po o King Fonoti lenai. I le alofa o le Atua faafetai.

**23 IANUARI 2019**

**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

**FOFOGA FETALAI:** Malo i le sui usufono mamalu, e pei lava foi ona fautua atu, e fai lava ma silasila mamao i tua i le saunoaga. Leaga e le tuumamaina e le Malo ia tuuaiga ia. Ma o tuuaiga lava ia ua faafagogo tagiao, amata mai lava le HRPP o faatino lava ia tuuaiga ia. Ae fai silasila aua e le faapea e avea le masei o se toatasi i se aso se tasi i tausaga e tele ua mavae ma mea e..... E faapena ona outou faitau ai faapea. Ao le taimi nei, e leai e faapena foi se lagona. O lea ua tapa se finagalo o se tasi o le komiti. E leai o lena ua saunoa mai foi, e tusa ai o le fesiligia e le Malo. E manao le Palemia e sue pe sao tuuaiga ia. Ae o le mea sili o lea ua maua. Tautuana foi ma tatou o sui usufono, aua foi le naunau tele i le ia ae manumanu i le upega, leaga o le upega e toe lavelavea ai lava le sui usufono la e saunoa. Leaga e faapena le taai a le peau o le sami ae toe foi atu lava. Aua le anu i le matagi e pei o ia muagagana, e foi atu pisia ai fofoga. Tulai mai le sui usufono mo Aana Nu 2.

**Tofa ILI SETEFANO TAATEO TAFILI (Aana Alofi Nu. 2):** Faafetai i lau Afioga a le Fofoga Fetalai. Faafetai mo lou avanoa. Masalo o le a sosoo ia le isi sui usufono tutu toatasi ma le isi sui usufono tututoatasi. I lenei itula ou te faatalofa atu i le la itu o le Maota fono o Samoa, i le afio a lau Afioga i le Palemia, sui Palemia ma le Kapeneta faapea foi ia Minisita lagolago. I lenei foi itu, taitai o Komiti faapalemene taitasi, faapea sui a komiti o Komiti faaalemene. Faafetai i lo matou avanoa e ave atu ai se sao o lenei itumalo o Aana Alofi Nu 2 e tusa ai o le Tala Faatatau o le Tupe 2018/2019. E manatu o le a le toe ta i tua se faamatalaga i le aso, ua manatu foi ua leva ona tatou feagai ma lenei foi mataupu i le iloiloina o lenei mataupu o le Tala Faatatau o le Tupe. I le vaega lea o totogi o le afaigaluega e manatu o lea sa taua e nisi o tootoo, le vaega lea o principal officers, e pau lava sau tuualalo ma sau fautuaga, o le va o le ACEO po o le pule lagolago ma le principal officers, a tagai foi ia i, e fai lava sina vava mamao i le tulaga e pei ona i ai. E pei o lena sa matou tuualalo e uiga i le tulaga lea tau totogi. Faafetai i le Malo o lea ua siitia totogi e amata e pei ona i ai i lenei vaitau. Faafetai foi i le afea o nai faiaoga, o lea ua maua le siitaga o nai faiaoga, atonu e le o faasopolia ae fai aso le Alii, e fua foi i le seleni o lo o i ai. E matau foi le tupe faaagaga mo togafitiga i atunuu mamao i le Tala Faaopoopo o le Tupe lau Afioga i le Fofoga Fetalai, e \$2miliona le vaega lea na toe faaopoopo. E le po ma le laina o le tulaga tau gasegase tatou te le talanoa ma ni mai. O tulaga na atonu lava e aoga foi.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielega:** Ao le i see ese le sui usufono, e pau lava lea o le mea ou te fia faamalamalama o totogi. O totogi e tau faafetaui ai se siitaga o se soifuaga. O lona uiga la e aafia uma ai lava le afaigaluega a le Malo. E na ona ou faamalamalama atu e leai se isi o misi, o lea e aafia uma lava, o lo o faamanuiaina uma lava vaega uma o le tatou Malo. Ona o le tau faamama avega lea i le alu i luga o le tau o le soifuaga.

**23 IANUARI 2019**

**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

**Tofa ILI SETEFANO TAATEO TAFILI:** Faafetai i lau Afioga i le Palemia mo le faamalamalamaina o le vaega lea. O le vaegatupe lea a faaopoopo i le Tala Faatatau o le Tupe mo gasegase auina atu i fafo, pei o lea sa agai i ai se faamatalaga. Aua e pei ona silafia foi e le o na ma le laina i lenei vaitaue faatupulaia pea le manao o le atunuu foi i nisi o gasegase e saili togafiti i fafo, ae pei o le manatu lea sa i ai pe o lava le faasoa pe toe faaopoopo foi se isi afa miliona e faaleoleo e tau faamaea ai le tausaga faaletupe 2018/2019. O le vaega lea i le tulaga tau i le galuega tetele a le Malo, ia faafetai tele lava i le Minisita foi o lo o fitoitonu i ai lea vaega. E manatu e le o toe po foi se lilo, o lea ua maea le auala foi o lenei nuu ua leva ona taoto atu le talosaga, ae o le mea sili ua tuai, a o lea ua faataunuuina.

O nisi o manaoga o lenei foi itumalo, ua maea foi ona feutagai ma le Minisita e fitoitonu i ai. A o le i faamaeaina sa matou faamatalaga, ou te manatu e le o se galuega faigofie sa feagai ma le Afioga i le Minisita ma le Matagaluega. Aua o le upu moni lava ia o Samoa o se atunuu e vaivai lona tamaoaiga. E pei lava ona taua e leai ni a tatou minerale po o nisi oa faalenatura e faamoemoe i ai lo tatou tamaoaiga. A le lelei la le faasoa mai lea taimi i lea taimi i le mea e faamuamua ma le mea e faamulimuli ona paulia lea o lo tatou sa, ona ua le lelei le fuafua ma le faatatau a i latou o lo o faatautaia mea tau tupe, ae faafetai tele i le Minisita ma le Pulega pei ona i ai foi lenei Tala Faatatau o le Tupe 2018/2019. Ia o lea ua amata lenei tausaga i galuega foi a le Afioga i le Palemia ma le Kapeneta, ia sagai ane ai o le tau aua le faatautaia o le sa o Samoa i lenei foi tausaga a o faapea ona tatou feagai ai foi ma tiute ma faiva.

Ou te manatu foi e le alulua sa matou faamatalaga, le paia i lou itumalo o Aana Alofi Nu.2, le falelua ia Nofaalii ma Leulumoega, ia o lea ua toe amatalia lenei tausaga i galuega o lo o feagai ai ma le sui usufono. O le upu moni lava ia e masani ai le atunuu, o faiva lava e tapuaia e ae ma le manuia. Le aufaitatalo, le aumatutua, ia tautuana le tou sui usufono i le feagai ai ma ona tiute pei ona tofofi i ai. Ia maua foi le malosi o lau Afioga i le Fofoga Fetalai o lo o faapea ona tu i matagiolo pe a siisii le tai i le sa o le tatou Fono Aoao Faitulafono. Ia manuia le Fono.

**FOFOGA FETALAI:** Malo faafetai. Ia, malo saunoa. E faamalulu atu se i tuu atu le avanoa i le toe Ulutaia, le tama matua o lea itu o le Maota i lau Afioga i le sui usufono mo Falealupo. Ma ua faafaigofie ai foi, masalo o le toe saunoaga lea o le tatou Tala Faatatau Faaopoopo o le Tupe, o lea ua saunoa le toeaina o lea itu o le Maota.

**Afioga Hon AEAU PENIAMINA LEVAISEETA:** Ou te tulai atu i le ava e tatau ai ma le faaalalo i lau Afioga, faafetai mo le avanoa. O le agaga ua ou tulai atu ai, ua i lumamea le Tala o le Tupe aua le faafofogaaga a le atunuu, e atagia ai i i aga a le Palemene ma le tulaga o lo o i ai le tatou faigamalo. Ioe.

**23 IANUARI 2019**



**Tulafono Tau Faaofi o le Faatatauina o Tupe Faaopopo (Nu.1)  
2018/2019 - felafolafoaiga faaauau i luga o le faitauga faalua**

O lea ua tatou soalaupuleina nei, ua faafofoga... ae o lou tulai atu, aua ou te talitonu ua lamalama faaiu le tatou fetufaiga, ua faafofoga le atunuu, ua malamalama vaega uma o le tatou atunuu i le faatinoina o galuega ma tiute taua sa feagai ma le Malo i lea vaiata. O lea ua tatou soalaupuleina, ua tatou oaoa ai nei ia faamalo ua i lumamea ua faafofoga le atunuu, ua malamalama uma. O le agaga faamalo i lau Afioga i le Palemia ma le Malo i le faatinoina o le tatou galuega, ua iu o lea ua tatou toe sauni atu, o moomooga a tatou uma lava o sui usufono o le Palemene ina ia mautu ma lelei ma manuia le atunuu i tonu uma i totonu o le Palemene atoa ma lona faatinoga. O le tatou faamoemoe autu lea. Ua tatou oo mai la i lenei vaiata, o lea ua i lumamea uma lau Afioga i le Fofoga Fetalai galuega ma mea lelei uma ua faia e lau Afioga, ua tatou fefaamaloai ma tatou faafetaia le alofa o le tatou Matai i le lagi ona ua faapea ona... i le galuega a le Malo Tutoatasi o Samoa ua tatou oaoa ai nei. O le agaga sili lea ma le fiafia i lau Afioga i le Palemia ma lena Itu sa avea ma taiala ma taitai o le tatou Palemene. E talitonu foi e faapea le lagona ma se faatofalaiga i le mamalu o le atunuu i le tatou Palemene ma le tatou galuega. Faafetai tele i lau Afioga i le taitaiga o le Fono.

E momoli atu lava le agaga faafetai, faapea ma lau Afioga i le Palemia, ua malieo ua malie malo o lea ua faafofoga le atunuu i aga o le tatou galuega a le tatou Palemene, ua tuuina atu... o le tatalo ia faamanuia pea lo tatou Matai i le lagi i galuega uma a le tatou Malo ina ia manuia ai le tatou atunuu. Faafetai.

**FOFOGA FETALAI:** Malo faafetai saunoa i lau Afioga i le alii matua o lena itu o le Maota. Ia se i tulai mai le sui usufono mo le itumalo faaalaalafaga o Siumu. Malie le sui usufono mo Salega Sisifo se i tuu atu le avanoa i le sui usufono mo Siumu.

**Afioga FAALOGO IOSEFA SOPI (Siumu):** Faafetai i lau Afioga i le Fofoga Fetalai mo le avanoa. E muamua ona faatalofa atu foi i lau Afioga i lenei itula i le Fono amata o lenei tausaga. M alo foi le folau mai i le tausaga ua tuanai. E faatalofa atu foi i le Taitai, le Sui Taitai, le Aiga Kapeneta, Minisita Lagolago ma lena Itu i galuega foi i lea tausaga ua mavae atu. Faamalo atu le fai o galuega aua le atinaeina o si o tatou atunuu. Ia e faapena foi ona faatalofa i lenei Itu o le Maota i le Itu o lo o agaia le tatou faigamalo.

E faatalofa atu foi i Ofisa Sili o Pulega ma Pule Sili o Matagaluega ma Faalapotopotoga a le Malo, faamalo atu i la outou galuega faatino mai lea tausaga ua mavae atu, o lea ua amatalia lenei tausaga, ia tatou alo agai i luma, ua ese foi le alafua ua tatou alo agai i ai i lenei tausaga.

Ia o le a muamua atu se faamatalaga i le Tala Faatatau Faaopopo o le Tupe o i ai nei. E muamua ona momoli atu le faafetai i lau Afioga i le Minisita mo le tuufaatasiga o lenei tupe e ui ina utiuti, ae o lo o gafatia mea uma i lau fuafua tatau ma le tofa ua ae i lena Itu. E momoli atu ai foi le faafetai i le Matagaluega i le Ofisa Sili o Pulega i la outou foi galuega fai i le lagolagoina o le Minisita. Faafetai foi i le Aiga Kapeneta, ou te iloa o outou uma o lo o i ai i totonu i le filiina o lenei faamoemoe, e momoli atu le faafetai tele i lo outou sao.

**23 IANUARI 2019**

**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

E fia faapitoa se faafetai i Afioga i Minisita e toalua, e vaai atu i o la sao i totonu o le Tala Faaopoopo o le Tupe lenei pe tai \$4miliona ea le Minisita o le Matagaluega o Faalapotopotoga Tumaoti ma le Minisita o lo o aoina tatou lafoga. Faafetai i lo oulua sao, ou te vaai atu o oulua lea e tele le sea i totonu o le faatupega o lenei Tala Faatatau Faaopoopo o le Tupe.

Ona oo mai lea i le Minisita mo Aoga, faafetai i lau Afioga faapea le Afioga i le Palemia i le lua oo atu e molimauina le tatalaina o le faleaoga o lenei itumalo, o le faleaoga lea sa malaia i le tausaga ua tuanai, o lea ua toe tatalaina. O lena foi ua taatia atu i le Malo le talosaga a lenei itumalo i le faatotogaina o nai potu faamolemole, a tele logo mai. O le isi itu e fia oo i ai se faamatalaga, talu ai o lau Afioga o lo o faauluulu i ai taaloga i lenei vaitau, ia tautuana tapenaga aua taaloga a le Pasefika i lenei tausaga, ia tatou numera muamua ai, ia sili a tatou pine auro i atunuu uma o lo o omai. E tuu atu foi lou tauau e fia lagolago i lau Afioga, e le pei o le saunoaga a le sui usufono i le taeao, o lona uso po o lona... ia, a o au e tuu atu moni le tauau e lagolago atu i lau Afioga.

O le isi itu e fia faafetaia, o le toe amatalia lea o asiasi aoga. O se tulaga ou te iloa o se tulaga ua leva ona toe foi i ai le Matagaluega ma lea matata i lenei vaitau. Faafetai i le tofa na ae ua ala ai ona toe amata asiasi aoga, aua o le teleo asiasi aoga nei, o i latou pei ua litaea mai ua le toe faigaluega, o la e ua amata toe ona faigaluega i lenei vaitau. Faamalo faafetai i lau Afioga.

Oo mai i le Minisita mo LTA ma galuega tetele, o lena ua taatia i ina le tele o talosaga a lenei itumalo i auala ma mea uma faapena. Na pau le talosaga e toe tuu atu, o le vai foi lea na ou talosaga muamua i ai. O le faafitauli o lo o tulai mai i le vaega lea, e vaapiapi le alavai o le auala lea, a oo ina mamafa timuga ma tetele tafega ona sau lea o le vai ua ova i luga ma faaleaga ai meatotino a aiga o lo o i ona autafa. Toe silasila ane lau Afioga i le tulaga lea.

O le isi tulaga lau Afioga faamolemole, na o se tuualalo, se i tagai ane lava i konekarate ia o lo o faia le maintenance, le maintenance contract, e vaai lava ma le faanoanoa le tele o auala e amata mai le la tausaga e oo mai i lenei taimi, i le tele o omoomo ma tulaga faapea. E matauina e lou nei sui usufono, ua umi tele le taimi o faataatia, ua ova atu ma le vaiaso, lua vaiaso, tolu vaiaso, a o nisi foi taimi ua ova atu i le masina e le i faia lava i ai se fuafuaga i nei auala. O le mafuaaga lena e ala ai ona toe fai ma toe fausia auala ona o le le vave i ai o le vaega o lo o latou nafa ma ia matata.

**FOFOGA FETALAI:** Se i tulai mai le Afioga i le Minisita mo Galuega, Felauaiga ma Atinae Eeseese.

**Susuga Hon Papaliitele Niko Lee Hang:** Lau Afioga i le Fofoga Fetalai, ou te le fia faalavelave i le saunoaga matagofie a le Afioga i le sui usufono mamalu, ae ne i meaane ua toe laga mai e nisi sui usufono mamalu le tulaga o tatou auala i lenei vaitau ona o le louloua o le tau. Ia, o lo o fai lava le galuega a le LTA o le faatonuina o konekarate lea ua maua zone eeseese i le faaleleiga o tatou auala.

**23 IANUARI 2019**

**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

Ia o lea lava ona o lea foi e faaletonu le tau, ae pei e faamauina le finagalo o le sui usufono mamalu, ona e sao le saunoaga i le tulaga o le faaleleia o tatou auala, e fai si faifaiaga o tatou konekarate. A o le faamatalaga la e fai mai se i lelei le tau ona toe faatopetope lea, ae tatou onosai pea ma... e le o faatamala lava le Pulega o le LTA i le tulaga o tatou auala. Ae talosia e le o aafia ai le konekarate a le Afioga i le sui usufono i nei mea o lo o aafia ma le maintenance ae faafetai. Ia e fautuaina foi la lau Afioga, a fapea o fai e lau Afioga nisi maintenance, ia se i alofa ane e fai faalelei a tatou galuega. Ma le faaaloalo lava.

**FOFOGA FETALAI:** Tulai mai le sui usufono mo Siumu.

**Afioga FAALOGO IOSEFA SOPI:** Ia faafetai i lau Afioga i le Minisita mo le faamatalaga malamalama. Ia e le o alo lava leni sui usufono i se ata o se niu, o lo o avatu sao lava se faamatalaga e uiga i le tulaga o lo o vaaia i leni vaiatau.

Ona oo mai lea i le Minisita mo le Soifua Maloloina. Faafetai o lea ua tapena le toe faaipopoga a le Falemai. O lo o maua foi o le a ave le faamuamua i le Prevention. O lona uiga o le a matua tele se tupe o le a sefe mai ai a lo tatou Malo i le toe avatu o mai i fafo ma nisi togafitiga o lo o tausaili i fafo. E faafetai ai i lea tulaga ona o lea ua maua lea tulaga lelei o le a taumafai i ai.

Ia a o se talosaga a leni sui usufono, o lena ua taatia atu se talosaga e uiga i le health centre lea a matou e i Siumu, faamolemole lau Afioga se i tagai ane i ai ae lavea ae i le faaopoopoga o nai au falemai faaopoopo mo le Tala o le Tupe o lo o lumanai nei.

E i ai le tulaga lea o lo o maua nei, a amata le faaipopoga fou lea, o le a ave fomai, o i latou uma i falemai i tua, o le a i ai fomai faapitoa ma tulaga faapena. Na pau se tuualalo e tuu atu i lau Afioga, se i vaai ni benefit lelei mo... aua ou te iloa e fiu e tausaili ni fomai i tua. O le tulaga lena sa matau mai tausaga ua mavae, e pei e augatata e o i tua, e fia nonofo i Apia ona o lo o aoga fanau ma tulaga uma faapena. Se i tagai ane lava lau Afioga i ni benefit lelei ina ia attractive ai ma fia o ai alii ma tamaitai fomai i tua i falemai o le a filifilia.

Ia lau Afioga, ona pau ia ou te vaai atu e fetai lelei ma le taimi, ae avea ia leni itula e fai atu ai se tala i lou itumalo. Si ou itumalo pele o Siumu, le paia ia Sa Asomua ma Aiga, Tuuu ma lo outou Aiga Sa Tuuu, le falelua o Tulafale, le Fofoga o le Alataua, Utaileuo ma le Faletolu. Faafetai i la outou tapuaiga, faafetai foi mo timaiga ma le tatalo mo la outou sui usufono. O leni ua amata leni tausaga, ia alo mai tatou alo faatasi lo tatou sa. E momoli atu le faafetai tele i lau Afioga mo le avanoa. Faafetai. Ia manuia le Fono.

**FOFOGA FETALAI:** Malo faafetai. Masalo o le sui usufono mo Salega Sisifo o le a tamua pe a tatou toe taliu mai i le itula e 7:00 i le afiafi pei ona fautuina mai le lafo. Ae faamalulu atu i le sui usufono mamalu, ona o lea ua ta le 1:00 ua tatou taunuu i le taimi malolo o le aoauli nei, tatou toe amata ai i le itula e 7:00 i le afiafi e pei ona fautuina mai le lafo.

**23 IANUARI 2019**

**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

Ma ou te faasilasila atu o le a faataatiaese Galuega a le Fono Aoao mo le tatou malologa ma toe amatalia i le 7:00 i le afiafi seiaaulia le itula e 11:00 nanei i le po.

*Na faataatiaese Galuega a le Fono Aoao Faitulafono i le itula e 1:00 i le afiafima toe faaauau i le itula e 7:05 i le po.*

*Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.1) 2018/2019.*

**FOFOGA FETALAI:** Ou te faasilasila atu ua toe amatalia Tualumaga ma Galuega a le Fono Aoao Faitulafono. Malo le usufono malo foi le onosai. Faafetai le tauatai. E faia le tatou malologa ma tuu ese galuega a le Fono Aoao i le aoauli ua sola ua faapena ona tuuina atu le avanoa i le sui usufono o Salega Sisifo. Ia, ma ou te tapa ma le faaaloalo lau Afioga i le sui usufono mamalu e tulai mai e saunoa.

**Afioga TOOMATA AKI TUIPEA (Salega Sisifo):** E momoli le faafetai i lau Afioga i le Fofoga Fetalai mo le avanoa taua ua maua e le sui usufono o lenei itumalo. A o paia ma mamalu sauoo o le Palemene o Samoa, i ona tulaga faalupe, i le afio o lau Afioga i le Fofoga Fetalai, lau Afioga i le Taitai o le Malo, le Sui Taitai, le vasega o Minisita, ou te talitonu e le oo i ai se faamatalaga i o outou paia, o sa ma faiga, aua o paia e tumau mai le vavau e oo i le faavavau. O paia foi i afioga i Ofisa Sili o Pulega o Matagaluega ma Faalapotopotoga Tumaoti a le Malo, ia nuunuu atu ia outou paia, o sa ma faiga aua o paia e popo, e tumau, e le mafai e le sui usufono ona faaopoopo pe toese outou mamalu. O le faafofoga tapuai foi a Samoa mai mauga tetele e oo atu lava i mauga iti, faatalofa atu i le faafofogaaga. O le paia lava lea i Tama ma o latou Aiga, Aiga ma latou Tama, Tumua ma Pule, Ituaui ma Alataua, Aiga i le Tai ma le Vaa o Fonoti.

Ou te talitonu i lenei tausaga o lo o ua amata, ua atagia le alofa ma le agalelei o le Atua ia Samoa, ua leai se mala faalenatura ua afaina ai lo tatou atunuu, e ui o lo o tatou i ai i le vaitau e masani ona afatia ai la tatou folauga i tausaga taitasi ona o suiga tetele o le tau. O le mea lea faafoi le viiga ma le faafetai i le Atua ona o Lona alofa ma Lona agalelei.

Ae o le a vili tonu le ifi a Maina ma fagatonu le malama i se sao o lenei itumalo i le Tala Faatatau Faaopoopo Muamua o le Tupe 2018/2019. E faamauiina lau faamalo ma le faafetai tele i lau Afioga i le Palemia, le Sui Palemia, Afioga i Minisita aemaise o Minisita Lagolago ma lena Itu o le Maota ona o se tofa ua ae e faia se siitaga mo le aufaigaluega a le Malo i le amataga o lenei tausaga. Ou te talitonu o se taimi talafeagai ona ua feagai tonu ma le ae o aoga a le fanau, lea ou te talitonu lava lau Afioga, o se faautautaga potu ma se faautautaga tuutumamao ua mafua ai.

**23 IANUARI 2019**

**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

Ona faapea lea o sau faamatalaga, maumau e moomoga o lenei itumalo, pe ana faapea o le a ogatasi i le taimi e tasi le faatinoina o lenei siitaga. Peitai, ua malamalama lelei le sui usufono i le mafuaaga ua ala ai ona faasoosoa le siitaga ona o faiga faavae i le pulea o tatou tupe ina ia aua ne i afaina lo tatou tamaoaga, aemaise o galuega masani faatino i totonu o Matagaluega taitasi ma le totogiina o a tatou nonogatupe o lo o faia mai paaga i atunuu i fafo.

Lau Afioga i le Fofoga Fetalai, na pau lava le atugaluga o le sui usufono ona a vaavaai i le afaina o le tau o le soifuaga, e mafua mai i le inflation, ona afai o le eleni mo se faatusatusaga lea e \$1.50 pe \$3 i le taimi lenei, o lona uiga, e oo atu i le tausaga lea, ua \$3.50, e oo atu foi i le isi tausaga ua \$4. Ae ana faapea e ogatasi, se meamanu e lagona e le afaigaluega le lololo ma le suamalie o nei faamanuiaga ua maua ona o le tofamamao ma le faautautaga i le Malo. Ou te faapea atu ai, e talia e lenei itumalo le Tala Faatatau o le Tupe Faaopoopo ua i luma nei o le Fono a le Palemene.

Ae e i ai nai vaega o lo o fia faaali ai ni manatu. O le vaega muamua i le Tala Faatatau Faaopoopo o le Tupe, o lo o i ai ni vaegatupe o lo o fuafuaina mo le Esetete Tausi. E ui lava e tele lea vaegatupe, ae talitonu o se fesoasoani aoga i lenei Faalapotopotoga. E le gata foi i lea, afai e alu alu ae le mafai ona totogi, o lo o tele aseta tumau a le Esetete Tausi e mafai ona tapa i ai le Malo e faaoga. Ou te manatu, afai e alu alu le mafai ona toe totogi mai e le Esetete Tausi, e manaia ae ave ane se 100 eka e fai ai foi se taulaga foi lea o le industrial zone, free zone e pei ona i ai i Vaitele ina ia mafai ona faatuina ai ni pisinisi ma ni atinae, e le gata o le a faigofie ai i itumalo, Falelatai, Manono ma Apolima, aemaise foi o Savaii, e faigofie le faimalaga mai ma le tau omai mamao i Apia. E i ai la se manatu, manaia ae faataatia ae se isi vaega o Fanua o le Esetete Tausi, ina ia fuafua sea atinae mo le lumanai.

O lona lua, faafetai i lau Afioga i le Minisita o Galuega ona o talosaga a lenei itumalo sa tuuina atu mo le fausia ma le faaleleia o ona auala galue. O lea ua amata le galuega a se tasi o ou nuu i Fagafau, faafetai le pule, faafetai le magafagafa ma le amanaia o le talosaga. Ae ou te talitonu o lena lava o lo o i ai i lau faila nisi nuu o lou itumalo e pei o Fogatuli. O le nuu lea o Fogatuli ua ou maua tala, ua faalua ona fai survey, ua oo mai ma folafola e le sa pulea le lala i Salelologa faapea o le a faataunuu le galuega. Peitai, ina ua faatino galuega o auala galue i le tausaga ua mavae, e ese itumalo sa faatino. O lea lava la e faatali si o matou itumalo ma faapea mai, pei ua olegia le alaafaga, e le gata i le Malo, a o le sui usufono. Ou te tatalo atu ai ma lou ava ma lou migao, faamolemole, faalatalata ae i luga i lau faila le talosaga a Fogatuli. E le gata i auala galue i faatoaga, a o lo o i ai nai malumalu o Ekalesia, le Ekalesia Mamona ma le Ekalesia Asofitu, ua matua leaga faia lava le auala. Ou te talitonu o le auala lea e maua ai manuia. O Samoa o le atunuu kerisiano, e faamuamua foi Ekalesia i so o sana faigamea. E le gata foi i lea, o lo o i ai ma le tanevai i gauta. E taua tele le lelei o auala. Ia, ona tuutuu ane ai lea ma nai auala na o lo o i ai, Samata i tai ma Samata i uta i le tausaga fou i lau paketi. Ma lou faaloalo lava.

**23 IANUARI 2019**

**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

Ona oo atu ai lea o sau faamatalaga i le Faalapotopotoga lea o le ACC. E taua tele tiute ma galuega o lo o faatino e le ACC. Ou te faamalo ma ou faafetai i le Faigamalo na latou faavaeina lenei Faalapotopotoga, e le gata ua tele ai aseta e maua e le Malo, ae ua faapena foi ona fesoasoani i nisi o manaoga e pei o taavale fuimu, taavale mo faalavelave faafuasei, lea e lata mai nei na fesoasoani ai i taavale e tolu, ae le gata foi i lea o le aveina o mai i fafo. O itu lelei ia o le ACC, ae a liliu i le isi itu o le coin, ona ou vaavaai atu lea, o tatou o tagata faisaoafaga, o lo o tipi a tatou tupe i totonu o lenei Faalapotopotoga. Ona ou faapea lea, se pei lava le ACC o se Faalapotopotoga aiafu, tulou le gagana. Ua ala ona ou taua le tulaga lea o le aiafu, aua foi o tupe a le aufaisaofaga lea o lo o tuuina atu i le ACC, ona o lea o le ACC ua invest i poloketi, teu foi faavaitaimi a latou tupe i Faletupe ona maua mai ai lea o latou tupe faaopoopo, ona alu ai lava lea o latou ma fai ai lava latou, a o lea lava e pulapula mata o le aufaisaofaga.

**FOFOGA FETALAI:** Malie le sui usufono leaga e matuia le saunoaga ae se i tulai mai le Minisita o Pisinisi ma Alamanuia.

**Afioga Hon Lautafi Fio Selafi Purcell (Minisita mo Pisinisi, Alamanuia ma Leipa):** Lau Afioga i le Fofoga Fetalai, ua manaia lava le faalogologo atu i le saunoaga a le sui usufono, ae pei ua tau avea sui usufono o le faaitu lea o matou lea e lavea ai ma le sui usufono lea e le o nofo mai o, pei a tau oo ni faamatalaga i ni tulaga le talafeagai. Ou te talosagaina lau Afioga ina ia aveese ia faaupuga faapea o le ACC e aiafu. Mo le silafia e le sui usufono, e leai lava ni poloketi a le ACC o lo o sosolo lava le ACC i le latou mandate na tuu i ai e le Malo o lo o i lalo o le Tulafono a le ACC e latou te ao maia saofaga a tagata. O lea na sao lava le saunoaga a le sui usufono e invest ae le faapea la o o le ACC o fai ai nisi mea. O investment na e fai e le ACC, o le investment ina ia tupu ai tupe a tagata ia e faisaoafaga, aua le lumanai o le aufaisaofaga. E leai lava se mea o fai e le ACC ina ia ave ma le ACC, leai, o mea uma lava ia o fale ma tulaga ia lea e fesoasoani ai le ACC, o mea uma lava o lea e mafai ona latou faia i lalo o le Tulafono lea o lo o pulea ai latou. Ae leai se mea faapea o o ai le ACC e fai ai lava a latou faiga. E leai se mea a le Matagaluega po o gain mai ai mo i latou lava. O mea uma lava o lo o invest tupe aua le mamalu o le atunuu ina ia lava seleni ina ia tulai mai se tulaga e manaomia ai se cover mo le atunuu atoa ae o la e lava le seleni tatou te tua i ai.

Ia o le faamalamalamaga lena. Faafetai i lau Afioga.

**FOFOGA FETALAI:** Malo. Ou te fautuaina foi le sui usufono mamalu i le faaaogaina o upu faauigalua e tapu i le tatou Tulafono Tumau. Ia agai i le saunoaga, faaoga se isi upu talafeagai.

**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaaauu i luga o le faitauga faalua**

**Afioga TOOMATA AKI TUIPEA:** Faamalulu atu i lau Afioga i le Fofoga Fetalai, ua vavevave mai le tu a le Minisita. O le uiga o le aiafu, e lei aiafu le aoga. E aiafu aoga o lea e alu aoga mo tagata ma le atunuu. Ae o le uiga la o lau faamatalaga, o lea lava e goto uma i totonu o le taga a le ACC, ae faapefea le au faisaoaoga. O lea la ou te faatuina atu ai....

**FOFOGA FETALAI:** Oute fautuaina foi le sui usufono mamalu, i le faauigaina o upu faauigalua e tapu i le tatou Tulafono Tumau. Faaaoga se isi upu talafeagai.

**Afioga Lautafi Fio Selafi Purcell:** Lau Afioga i le Fofoga Fetalai, o se mea e fia faasao leaga o lea lava e pei e tuuaia lava le Matagaluega o lo o goto ni tupe i totonu o le taga a le ACC. E leai ni taga a le ACC, o tupe o la e teu faafaigaluega, aua le mamalu o le atunuu. I lalo o le Tulafono o lo o i ai nei, o mea uma lava ia e tatau ona alu i ai ia tupe nei. E mo i latou e aafia i ni faalavelave faafuasei, o lo o alu i ai. E leai lava se mea e faapea ua i ai ni tagata ua o mai ae faapea ua fai atu i ai le ACC ua le lava le tatou seleni. Ona o lea ua faatau ai taavale ia ua ave ma le fuimu. Pe faapea foi ua le lava se tatou seleni, ua ave e faatau ai le CT scan la ua ave i le falemai. O mea uma ia o lea e aoga, aua o mea uma lava e link mo le saogalemu o tagata, ma ia vave ona foia faafitauli e tulai mai, pe afai e aafia i ni faalavelave faafuasei. Ae faamalulu atu lava i le sui usufono, e leai lava ni tupe faapea o faaaoga e le ACC po o alu le aoga. O le faamalamalama lea lau afioga.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr.Sailele Malielegaoi:** Lau Afioga i le Fofoga Fetalai, o mea ia e eseese le au faisaoaoga. E le faapea e eseese ma le NPF. O le NPF la e toe foi mai lava i le tagata e sao, ia e ana ia tupe. Ao i, sei vagana ua e lavea, ona faatoa mafai lea ona e agavaa i i. A e lavea foi la, o se lavea foi lele, e te le nofo lava oe ma faalavea oe. O le mea lena o le faitoga fiti le mea lena. Ae o lea e faaaoga ia seleni nei, e faatino ai foi ia galuega e aoga mo le Malo. E i ai taimi na leai ai se tatou CT Scan, e tala'u mai i Niusila e scan ai. E ave i Tutuila, o i la lea na ala ai ona maua le tatou faata, faata taugata lava. O lea foi la e i ai le isi faata lea e toe manaomia e sili atu le malosi. O lea la e aoga i tagata o le atunuu. Ao mea ia e le soona faia, ona o mea o faalavelave e tupu faafuasei, lea e aoga i ai faata ia. Ma le isi o lea foi e faaaoga e invest e teu faafaigaluega i totonu o galuega a le Malo. E pei o le fausia ai o fale i fafo, ona faasaoina ai lea o tupe a lo tatou Malo e alu vale i le totogiina o fale o papalagi i fafo. O lona uiga la, a fau le fale e pei o le fale la e i Ausetalia, ona totogi atu lea o le tupe e le Malo i i i le ACC, e totogi ai le nonogatupe lea, e leai se foreign reserve o faaaoga. O lea e fai lava o feuaiga o tupe, o lea e fai lava i totonu o Samoa. E leai la se mea o alu i fafo, o lea e i totonu lava o le atunuu. Ae o le mea e pito i sili ona taua, ia tupu mai faalavelave e agavaa mo le tupe lea, ao lea lava e i ai seleni a lo tatou Faalapotopotoga. O le faautautaga tatau lena o lea e faafae ai le Faalapotopotoga lena i lo tatou Malo.

**23 IANUARI 2019**

**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

**FOFOGA FETALAI:** Tulai mai le sui usufono mamalu, e toe lua ou minute.

**Afioga TOOMATA AKI TUIPEA:** Ua malamalama lelei le sui usufono i le tulaga o lo o faaaogaina ai tupe. Ae pei ona ou fai atu, atonu e matuia le upu lea aiafu ae sili la ona ou faapea, o le faaoga tatau o saofaga a tagata ae e le maua mai ai se penefiti a tagata. O lea la ou te faatuina atu ai se teuteuga....

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr Sailele Malielegaoi:** Lau Afioga i le Fofoga Fetalai, o lea e sese le faaupuga. Leaga o Tulafono e sosolo lava i luga o le Tulafono. Afai lava na fai lau saofaga, e pei lava o le insure, insure lea o faalavelave e tutupu faafuasei. O le eseese o le insure lena ma le insure o lou soifua, o le mea lena e faaigoa ai le isi mea o le insure ae faaigoa le isi mea o le assurance. O le mea lena i lou soifua, e faaigoa o le assurance, aua ua e mautinoa e i ai le taimi e te oti ai. O lea la e mafua ai ona eseese le faaupuga o mea. Ae a oo loa i le insure o afi, e ono le tupu se afi, ae o la e alu lava au tupe, alu lava au tupe, alu lava au tupe. A oo la i le selau tausaga e leai lava se afi e tupu e alu ai lava au tupe ma alu ai lava au tupe i le vasaloloa. E faapena foi i le mea lena, ua matua manino lelei le faataatiaga o a tatou mea. Seiloga e tupu le faalavelave ia te oe, ona faatoa mafai lea ona e agavaa. E tusa ai ma Tulafono na aumai pasia i totonu o le Maota lenei. O lona uiga la o le tagata na te vaai maualalo i le ACB po o le ACC, o lona uiga ua vaai maualalo foi i le tomai na ala ai ona pasia e le Palemene lenei ia le Tulafono. Lau Afioga i le Fofoga Fetalai, e pei o le mea lena o lea ou te toe tu atu ai, ina ia matua malamalama lelei i le aoga o le faaputugatupe lenei. Ae le mafai la ona alu atu ia te oe, seiloga lava e faamalieina le Tulafono, le ituaiga manua lena e manua ai. E le faapea e te nofo oe ma faamanua oe, ona e agavaa ai lea, e leai o le togafiti le mea lena.

**FOFOGA FETALAI:** Ua maea le taimi o le sui usufono.

**Afioga TOOMATA AKI TUIPEA:** Lau afioga o lea e tau faauma atu pe a tusa ai ma lou finagalo.

**FOFOGA FETALAI:** O lea ua ou fai atu ua maea le taimi o le sui usufono, ona o lea sa toe lua ou minute. Ae faaiu mai le saunoaga.

**Afioga Hon Gatoloaifaana Amataga Alesana Gidlow:** Lau Afioga i le Fofoga Fetalai..

**FOFOGA FETALAI:** Ou te le toe talia se lafo e faaopoopo ai le lauga a le sui usufono.

**Afioga Hon Gatoloaifaana Amataga Alesana Gidlow:** Faafetai i lau afioga.  
*23 IANUARI 2019*



**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

**FOFOGA FETALAI:** Faaiu mai le saunoaga a le sui usufono.

**Afioga TOOMATA AKI TUIPEA:** Faafetai mo le avanoa ua toe tuu mai, e faauma atu ai sau faamatalaga. Ou te faatu ina atu, faatupumanatu se tuualalo lau Afioga i le Palemia ma le Kapeneta, se teuteuga i le Tulafono a le ACC. Ma o teuteuga la e faapea, ave atu pea e faatualalo atu, ae pule lava le Malo pe talia pe leai.

**FOFOGA FETALAI:** O lou finagalo ae e le o le tulaga lea o lena mataupu.

**Afioga TOOMATA AKI TUIPEA:** O le tuualalo, e a pe a fai se teuteuga o le Tulafono. O se teuteuga la o le a tuu atu pea. Muamua ia poloaina le ACC, ia faamaumauina uma tupe a le au faisaofoaga. Ia tuuina mai ina ia silafia e le tagata lana saofaga i le faaiuga o tausaga taitasi. Lona lua, ia tuu i ai sina lua pasene o se tului, e faaopoopo i luga o lana saofaga e tuu i ina e teu ai faateugatupe. Lona tolu, aua nei nonoina, aua nei faatagaga e guarantee ai ni loan. Lona fa, seiloga lava e maluu le sui ona aumai lea e ave e fai ai lona maluu. E tusa o se insurance foi lea, e tapa i ai le tina po o le tama, po o fanau foi, i le taimi e uma ai lou soifua. Aua e leai ni insure faapea, o lea faatoa tau amata e le isi vaega, ae sili le amata mea o le Malo. Aua e ala ona ou fai atu, o se tasi lea o Faalapotopotoga...

**FOFOGA FETALAI:** Ua ou faauilavea i le saunoaga a le sui usufono e faaiu mai le saunoaga.

**Afioga TOOMATA AKI TUIPEA:** E faaiu atu ai sau faamatalaga, ou te faatalofa atu ma ou faafetai atu i lou itumalo, o lou itumalo pele o Salega i Sisifo mo la outou tapuaiga. Faafetai tele ia outou tatalo, ua maua ai le lototele o le sui usufono. Manuia tele lau Afioga i le Fofoga Fetalai, lau Afioga i le Palemia ma le Kapeneta, aemaise foi o lena itu o le Maota faapena foi lenei itu o le Maota, ma le tapuaiga a Samoa.

**FOFOGA FETALAI:** Malo faafetai. O le manatu lava ia tulei la tatou galuega, o lea ua outou faafofoga ua faatu le lafo e pei ona amata ai nei la tatou fonu po. O le manatu lava ia faapena, ae e le o se agaga e faapea e taofiofi i finagalo o sui usufono mamalu. Ae i ai lava avanoa e auala ai fautuaga ma tulaga faapena. Ou te tapa ma le faaloalo lau afioga i le sui usufono mamalu o Anoamaa i Sisifo.

**Tofa Hon LAUOFO FONOTOE NUA FESILI PIERRE LAUOFO (Anoamaa i Sisifo):** Faafetai i lau Afioga i le Fofoga Fetalai. O au lea sa ou tau tulai atu e faaluaina ia teuteuga ia ua tuuina atu e le sui mamalu. Ae ona o lea ou te le i lauga, o le a amata ia lau lauga.

**23 IANUARI 2019**

**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

Faafetai i lau Afioga mo le avanoa, e manatu foi lou sui usufono, o lea ua sii le tai le sa o lo tatou Palemene, aua lana folauga i lenei foi tausaga fou 2019. Ou te manatu foi ua maea i le malama analeila ona e momoli le talosaga e talosia ai faiva o sui usufono uma o le Maota o lenei aso. Ae e i ai foi le lagona o lea ua i ulugaluliaga o le tai, le paia faaifo gata o Samoa. Ona faapea lea o se leo, faatini ia o tausala outou sa ma faiga, ponaoo ma tulatoa o faleupolu tofia. Aua o latou o lo o tausia upu a le atunuu.

Lau Afioga i le Fofoga Fetalai, e tusa ai ma lau faaaliga i le aso ananafi. Ua f ia foi se pou o le Maota fono nei ona o le valaau paia a le Atua i le afioga i le sui mamalu ia Pa'u Sefo. O la matou tatalo e faaopoopo ia alofagia e le Atua, ia faapena ona faamaise le Atua i le faletua faapea le aiga itutetele ma itu taulagi ona o le malaga a le maliu ma le oti. Lau Afioga i le Fofoga Fetalai, e faafeiloai atu i lau afioga faapea foi sui usufono mamalu uma o lenei Maota, aemaise le faafofogaaga a Samoa o lo o faafofoga mai i Maota ma laoa i lenei itula o le afiafi. Faafeiloai atu ma ofo alofa atu. Ou te tulai e faaleo se manatu ma se lagona e tusa ai ma le Tala Faaopoopo (Nu.1) o le Tupe. E pei ona saunoa malamalama i ai le Afioga i le Minisita o Tupe i le masina ua tuanai atu. Sa ia taua ai nisi atinae tetele a le Malo sa faatino i le tausaga 2018. E aofia ai le faafouina o le tatou malaevaalele faava-o-Malo i Faleolo faapea foi le tatou uafu tele i Matautu tai, e le gata i lea o le faalauteleina o aualatetele e agai atu i le itu i sisifo o Apia ma le tele o isi atinae tetele ua tatou molimauina. E le selu atu, lau Afioga i le Minisita o Tupe, ou te manatua ai upu a le atunuu e faapea, -A ae i fanua faatamasoaliiga i le tai, ona faapea lea o le upu a le atunuu, -ua faamalo le tautai ae Faamalo le tautai ae i lena itu o le Maota aemaise le aiga Kapeneta o lo o galulue. A oo foi ina ae mai faiva o le atu vaivao, ona faapea foi lea o upu a le nuu, -Se o se togi le seu ua lagatila ua faapulou le tualima ua faamalo fai o le faiva Faamalo le galulue, e i ai lo matou lagona o le a foi se lagolagosua atu a lenei itu o le Maota, Afioga i Taitaifono a Komiti Esee, faapea foi Afioga i sui usufono mamalu. E i ai lo matou talitonuga o le sa o Samoa e fau tele, o la tatou galuega e fai faatasi aua se manuia lautele o le atunuu.

Lau Afioga i le Fofoga Fetalai, e faamauiina le faafetai a lenei usugafono i le fuafuaga ua i ai le Afioga i le Minisita o le NPF po o le Afioga foi i le Minisita o Tupe mo le siitaga o le penisione mo tagata matutua, sii mai le \$135 i le \$145 i le masina. Sa tele foi ni manatu ma ni lagona i nisi foi fetuunaiga, peitai, ua saunoa le Afioga i le Minisita ananafi, ia ua faaopoopo foi le Afioga i le Palemia i le tele o manatu faatupu manatu i lea foi mataupu i nisi o manatu ma ni lagona e faaopoopo pe sii le tupe ae faataatia ese nisi o faamanuiaga. O lena foi se lagona o lenei usugafono pe a tatou oo atu i ai i le iloiloiga o lena faamanuiaga.

I se taimi lata mai e le i mamau atu le asiasiga sa oo atu ai i gauta i le tatou falemai faamamatoto e asi foi se tasi foi o gasegase, lau Afioga i le Fofoga Fetalai, matauina le vaapiapi tele o le falemai lea, ua le lava se avanoa, a ua toatele ma faatupulaia latou o lo o ua gasegase foi i lea ituaiga gasegase, ua maua se fuainumera po o le 120 ua i ai nei.

**23 IANUARI 2019**

**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

A o le talosaga, e manatu foi i aiga o i latou o lo o gasegase e autovaa atu i le falemai e avatu e faatino togafitiga i lea aso ma lea aso, pe leai se isi avanoa o le tatou falemai tuai sa i ai i uta e sii i ai le falemai lea, se vaega tele atu ina ia lava le avanoa....

**FOFOGA FETALAI:** Malie le sui usufono o lo o tulai mai le Minisita o le Soifua Maloloina.

**Afioga Hon Tuitama Talalelei Tuitama (Minisita mo le Soifua Maloloina):** Lau Afioga i le Fofoga Fetalai, e le faalavelavea le saunoaga matagofie a le Afioga i le sui usufono, e tatau lava ona ou tulai atu leaga o lea e agai pea i ai lana saunoaga. O lena tonu lava le fuafuaga o lea ua faagasolo i le taimi nei, o lea ua amata ona renovate le laboratory tuai ma le faletalavai la e tutu faatasi, masalo toeitiiti maea le galuega o totonu o le fale, e siitia atu i ai le tatou auaunaga faamamatoto. O le taimi nei, e na o le 20 nofoa la e faaoga, ae faamoemoe a maea le galuega lea o lo o faagasolo i le taimi lenei ma faatino le siitaga e pei ona ioeina ma pasia e le Kapeneta, ia, e oo atu i le 60 nofoa e mafai ona faaoga, ona talafeagai tonu a lea ma le finagalo lea e faaalua e le sui usufono mamalu. E momoli atu ai foi le faafetai mo le afea o lea Matagaluega i lea tulaga e lagolagosua ma faufautua aua tulaga matagofie mo le agai i luma o le auaunaga. Ma le faaaloalo i lau Afioga i le Fofoga Fetalai.

**FOFOGA FETALAI:** Malo faafetai. Tulai mai le sui usufono e saunoa.

**Tofa Hon LAUOFO FONOTOE NUAFESILI PIERRE LAUOFO:** Faafetai i lau Afioga i le Fofoga Fetalai. Faafetai foi i lau Afioga i le Minisita mo le tali malamalama i lea vaega mo se fuafuaga e toe faaopoopo nisi nofoa mo le falemai faamamatoto lea i Motootua, ia, se i silasila ane i le tatou lala o lo o i Savaii, o lo o i ai foi nofoa pe toe faaopoopo nisi nofoa mo le motu i Salafai mo i latou o gasegase i lea foi ituaiga gasegase.

Ae e le tuua ai le matou faufautua ma tuualalo pea ina ia aua ne i pa polokalame faalauiloa ina ia tuutiitia ai gasegase nei o lo o aafia ai o latou fatugao. Aua pei e matau atu na mafua mai lava ona o taumafa. O lena le matou fautuaga, aua e tatau lava ona o faatasi tulaga ia o le treatment faapea foi ma le prevention aua e tatau lava ona faalauiloa pea nai polokalame na mo le silafia e le mamalu o le atunuu. Pei o lo o matauina e lou sui usufono se vaegatupe i totonu o le Tala Faaopoopo o le Tupe mo i latou o le a lavea i le vaea mai le tuufaatasiga o le falemai i Motootua, le NHS ma le MOH. Po o le a se faamaninoga o lea tulaga lau Afioga i le Minisita aua o lea e pei ona matau atu e i ai i latou o le a vaea a o lea foi e loma le talanoaina o le Tulafono Tau Faaofi a lau Afioga ina ia faataunuu ai lea fuafuaga a le tatou Malo.

**23 IANUARI 2019**

**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

E momoli atu le faafetai ona o lea e i ai le fasi seleni ua faaagaaga mo le faamamaina o le aitalafu o lo o i le Faletupe o Atinae, ina ia faamama ai aitalafu o le falemai lea sa taua o le MedCen i Vailima. Ou te talitonu ua tele tausaga o taumafai lea mataupu, a o lea ua tulai mai i se tulaga masuiga malie. E momoli atu ai le faafetai i lau Afioga i le Minisita o Tupe, ia o lau Afioga foi o le Minisita o le Faletupe o Atinae, ina ia faaavanoa lea nofoaga e toe see mai i le Malo aua se isi atinae taua a le Malo e faatino ai, po o le faamatuu atu foi i se tatou paaga, se tatou development partner, aua o latou ia o lo o fesoasoani mai i a tatou atinae. Malo faafetai mo ia fuafuaga. E i ai le popolega lau Afioga i le Fofoga Fetalai i mea ua tulai mai i lenei vaitau, o ituaiga soligatulafono, ua matau ma ua maua foi lipoti i le soligatulafono lea o le fasioti tagata. E le o se solitulafono fou, ua leva.

E pau lava lea o le mea ua popoe ai foi lou taofi, ona o le faatinoga ua i ai i lenei vaitau, ua matuia, ua ogaoga, ae maua ai foi ma lipoti e masalomia le aafia o tagata o lo o faatinoina nei soligatulafono i le fualaau faasaina lea o le aisa. Ma se i toe tagai ane le Malo faamolemole i ia tulaga. Ou te talitonu o lo o faatino se galuega lelei a le Ofisa o Leoleo, ae atonu o lo o manaomia foi e le Ofisa o Leoleo se isi fesoasoani faaopoopo. Atonu e i ai ni masini faaneionapo e fesoasoani ai i leoleo i le sailiga ma le tulaga o latou osofaiga ina ia tineia le tulaga lea o latou o lo o gaosia le fualaau faasaina lenei o le aisa. Ua maua i le faalogo ua faasolo ina sosolo faaafi i totonu o le atunuu, a o se fualaau faasaina e gaosi lava pe mafai e le tagata ona gaosi i totonu o lona fale. A o lea foi e maua i lipoti mai fomai ma latou atamamai, e ese ma le tuga ma le ogaoga o mafaufau o i latou e faaaogaina lea ituaiga fualaau faasaina. Ma e pei ona ou fai atu, o le tulaga lea, o lea pei e fetauaiga ma maua i nisi o lipoti i nisi o faalavelave e le i mamao atu nei. Atonu po o le taimi la lenei, ua tatau foi ona toe silasila i ai le Malo i le tulaga o faasalaga o soligatulafono faapea, e le gata i fualaau faasaina lenei, ae faapea foi isi soligatulafono matuia.

O lea ou te manatua na aumai le Tulafono i totonu o le Maota leni i le 2007, sa ou lauga ai foi, le Tulafono lea o le Narcotics. Na aumai e faaopoopo ai isi fualaau faasaina matuia ia ma sii ai i luga le faasalaga o latou, latou te gaosia ma latou, latou te faasalalauina pe faatauina atu. O lea ou te manatua na sii mai le 7 tausaga i le 14 tausaga. Atonu o se taimi lelei leni se i toe silasila ane i vaega ia, e tatau ona toe i ai ni teuteuga, aua a faalogologo atu i ituaiga soligatulafono nei i isi atunuu e mamao, ia e au i le tai 20 tausaga, 30 tausaga taimi e falepuipui ai. Ia ae atonu o lea foi e faagasolo le fausiaina o le tatou falepuipui fou, o le taimi foi leni ou te lagona e au ia, e silasila ai i vaega faapea. E tatau foi ona i ai se vaega i totonu o le tatou falepuipui fou mo latou ia o lo o faaaogaina sese mea o fualaau faasaina, o drug abuses. E tatau foi ona silasila i ai, aua e manaomia foi togafitiga i le tulaga o latou mafaufau po o le mental capacity.

**23 IANUARI 2019**

**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

O vaega ia lau Afioga, aua o le tatou falepuipui lea sa saunoa manino le Afioga i le Minisita o Tupe ma le Minisita o Tupe Maua, i lena tausaga ua tuanai, pe a ma le \$20milionia i le \$30milionia le tupe e alu ai. O lo o faagasolo i le taimi nei, e matau atu pe \$14milionia lea ua faaaluina, a o lea ua aumai i le Tala Faaopoopo Muamua lenei o le Tupe le isi \$2milionia e toe taumafai ai, ma e tatau ona uunaia le tatou galuega lea ina ia vave faauma ina ia mausali ma ia malu tulaga uma o le falepuipui lea.

Sa saunoa le Palemia i le taeao analeila i le vaega lea o tatou falepuipui, aua o lea foi ua maua lipoti o lea foi sa i ai pagota sa sosola po o ananafi ea po o le Aso Sa. Ia o mea ia e tatau ona silasila i ai ma tau faatelevave le tatou galuega lea aua le malupuipuia, e le gata i le soifua o tagata lautele, ae faapea foi meatotino a tagata lautele.

Lau Afioga i le Fofoga Fetalai, ua tatau lava ona toe aumai se isi tatou vaalele e faalua ai tatou vaalele, aumai se isi vaalele e tau tele teisi atu, aua o lea foi sa i ai mea sa tulai mai, afai e i ai sina mea faaletonu ua le mafai ona lele le vaa lea e tasi, ae lafo atu i lau faasoa lau Afioga i le Minisita, ona e talitonu o mea lava faapenei e fuafua i le seleni. O isi foi vaalele tetele atu, ou te talitonu e fai foi si taugata o le faagaioiga po o operating costs, ia a o mea ia e silasila i ai e fuafua foi i le maketi. A o lou lena taofi, e tatau foi ona toe faaopoopo se isi tatou vaalele.

Lau Afioga i le Fofoga Fetalai, e leai lava se tagata faigaluega e le manaomia se siitaga o totogi, pe galue i le Malo pe galue i le vaega Tumaoti, e manaomia lava ona o le faasoa ia lava aua le tausiga o aiga. Sa ou galue foi au i le Malo, o le vaitaimi sa ou galue ai i le Malo, sa maualuluga totogi o le private sector i lo totogi a le Malo. O lea ua sau sau tausaga, o lea lava ua siisii i luga totogi a le Malo, ma o se lagona fiala foi lea i le matau atu. Ae sa i ai nai fesili i lou mafaufau ina ua faatulai mai le siitaga lenei ina ua ou tilotilo i le private sector. Ae o lea sa saunoa le Minisita o Tupe, o lea foi sa fesoasoani i ai le Afioga i le Palemia i le faamalalamaina o le tulaga lea, aua o le paaga lea po o faiga paaga a le Malo ma le vaega tumaoti, po o le public sector ma le private sector, masalo po ua 20 tausaga pe a o faatino faiga paaga lea i itu ia e lua, e uunaia ai e le Malo le private sector ina ia latou galulue e uunai le tamaoaiga o le atunuu po o le economic growth. O galuega uma ma faiga faavae sa taumafai mai i ia taimi, ae sa tau tilotilo foi lou nei sui usufono, e le gata i le vasaga i totogi i totonu o le Malo, ae faapea foi le vasaga o totogi i le private sector, le aufaipisinisi, o kamupani, o le aufaifaatoaga, o i latou uma o le itu tumaoti a le Malo. A o lea foi sa saunoa le Palemia, o mea ia ua uma ona silasila i ai le Komiti foi lea o lo o faatulagaina totogi a le Malo, le Salaries Tribunal. O lea la ua fuafua faapea, aua e i ai le popolega foi lele, afai ua lelei tele totogi o le isi vaega, pei o le a soloai uma atu agavaa moomia o le isi itu i le isi itu. E faapena foi le isi itu, a maualuluga foi totogi o le private sector ia, ia ua soloai uma agavaa o la e moomia i o i le la itu. Ae peitai, o lea e faalogologo atu ma le totoa, o lo o maintain pea le bearit le tulaga o le fuafua lelei, ina ia aua ne i i ai se tulaga faapena e soloai mai le isi itu i le isi itu ona ave lea ma mea e tau saili ai agavaa.

**23 IANUARI 2019**

**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

Aua o lea foi sa tau tilotilo atu, ia o lenei foi vaitau, ua tele lava tagatanuu o isi atunuu o lea ua galulue i totonu o le tatou atunuu. Atonu o agavaa moomia ia e le o maua tele i totonu o le tatou atunuu, a o mea uma ia o lea e mataitu e le Malo i le faalogologo atu, e lagona ai le agaga fiafia. E le faapea o i ai se vaega o faatamala ai le silasila pe lape ai le silasila a le Malo. O le siitaga o totogi, e 5% le masina lenei ia Ianuari 2019, 3% ia Ianuari 2020 tausaga fou, 2% Ianuari 2021. Ia, na o nisi o vaega lea e lavea i le siitaga lea e 5% ae faatoa lavea sui usufono i le tausaga fou ma si 2% lea e totoe i le 2021. Ia, o le mea la lau Afioga i le Minisita o Tupe, ia se i silasila ane, Ianuari 2021, pei ua fai si latalata tele i le palota. Aua foi lele lona uiga o le a le maua faamanuiaga e nisi o sui usufono o le a le toe foi mai le 2% lea e tuu atu lava ia Ianuari. Ae silasila ane i lau faasoa, aua o lea ua tele tatou Tulafono ia na e aumaia i le Maota e sii ai lafoga o taumafa suamalie, sii lafoga o tapaa, sii lafoga o ava malosi, sii nisi totogi o auunaga a le Malo, fai lafoga a faifeau. Ia ou te talitonu o lona ua lava le seleni lona ua i ou aao. O le a se tofa? Na ona eu mai lava i le 2% lona eu mai i le 3% i le tausaga fou, 5% Ianuari o le tausaga fou, 5% le masina lenei, paleni mea uma. Ne i te i ua le... Aua ou te alofa atu i lau Afioga ma lona itu o le Maota ne i te i ua le maua na faamanuiaga. A e silasila mai i le itu lenei, e toe foi uma mai lava sui usufono lea e nonofo atu i le itu lenei, e toe foi uma mai lava. Ne i fai fai au siitaga ae e le aeaie ai ma lona itu. E pei o le fautuaga alofa lona ne i te i ua outou le maua na faamanuiaga, aua e le gata ma te omai matou toe foi uma mai ae matou omai matou nonofo uma mai i le itu lona.

Lau Afioga i le Fofoga Fetalai, e pei o le tulaga lea o fautuaga ia, na ona faataatia atu, o le a se faatofalaiga a lona foi itu o le Maota, o le Kapeneta e mafua mai ai mea uma ma faamalagai mai mea lelei aua le atinae o le tatou atunuu.

Ia ona alu alu lea o se matou faamatalaga, ou te manatu o le a seu ia i fanua lou vaa ae sili lau foe, ia manuia le Fono a le atunuu, manuia lau Afioga i le Fofoga Fetalai, manuia le la itu o le Maota faapea foi lenei itu o le malu, ia manuia foi le tapuaiga a Samoa o lo o faafogafoga mai faapea le Aufaigaluega a le Malo. Soifua.

**FOFOGA FETALAI:** Malo faafetai. Se o miti lelei nei pei ona saunoa i ai le Afioga i le sui usufono. Malo le fautuaga mo le Malo. Ia se i tulai mai le sui usufono mo Gagaemauga Nu.3.

**Tofa NAFOITOA TALAIMANU KETI (Gagaemauga Nu.3):** E tagamalie a le faafogafoga foi i lenei afiafi, e pau mai foi le talo matua ia e toa ai le moa. E le tau laeia foi i se lauga a Gagaemauga Nu.3 le tumatila o le Maota o le Fonousu a Samoa, aua o paia ua uma ona paniniu ma faalauatea, o lea ua potu moli i futiafu o le paia o Samoa lea ua lipoi i Tiafau tauave nei.

**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

Lau Afioga i le Fofoga Fetalai, faafetai ua maua se avanoa o Gagaemauga Nu.3 o le muautasi, o le muauafaalele, a o le muautau foi e tua i ai le lauga a Vaituutuu e pei ona i ai tala i le taeao. Ona i ai lea o le lagona, goga ia mamalu ma paia aua o mamalu ua popo, o paia foi ua maea ona aisa, e le toe vaea i sa matou talanoa i lenei afiafi, tulou.

Lau Afioga i le Fofoga Fetalai, o se taimi ona oo lea o se matou talanoa i le auga o aute o lenei aso ma lenei vaiaso, o le Tala Faatatau Faaopoopo Muamua o le Tupe 2018/2019. Ae ua ou lagona ma le loto mauualalo i lenei vaega o le afiafi, ae se i ou asia le mauga o Kilepoa lea na faapea ai le tupu o Tavita, talofa, aue, ua maliliu toa, ua maumau ai auupega o le taua. Le sa pele ma faifaimea faatasi. A ou vaai atu i le itu lea o le Maota, talofa, ua na o le pale ua tafea i le auau, ua le see mai ai i ona seetaga malu le faipule o Safotulafai, e paga tutusa ma Vaituutuu aua Salafai ma ona upu. A o le fesili; o fea o i ai le Tofa a Pau Sefo Taumata Pau? O fea o i ai? O le ala lea lau Afioga i le Fofoga Fetalai, i lou tulaga faa-Taitaifono o le Komiti o Tulafono Tumau, Faiga Palota ma Faailoga Taualoa, ou te faaleo ai le agaga mauualalo ma le loto faavauvau pe a ou toe manatua lenei vaiaso ua sola sa tauaofia ai le Komiti ona o le talanoaina o se Tulafono e pei ona faale ai i le taeao ua sola. O lau fesili; Failautusi, o fea Pau? A o le lagona o le Taitaifono, tasi lea toa manumanu, tasi lea tofa e faamoemoe i ai le Komiti o Tulafono Tumau. E matua le tofa, ae se i faaatoa ai le quorum, se i lauliliu ai le fautuaga ua tuuina mai i le Komiti. O fea nei o i ai? O lele ua segia e le tufuga pule ma le mataisau o mea uma. Ona i ai lea o se matou vaivaiga, a o faafofoga mai le tausiga ia Ana ma le aiga faavauvau, matou te faapea atu, faamaise le agaga filemu o le Atua aua o le agaga e malu, e maua ai le toafimalie. Utu laia ia Keriso outou loifofoga faanoanoa, talofa, ia maua le mafanafana o Keriso i ona aao e apelepele ai le agai i luma. Tafimala lau faigamalaga oe le uso, e manatua pea e le tatou Komiti, ia maua sou nofoaga mau i le lagi. Talosia ia aua nei mafuli a puou le faigamalaga, ae aua foi nei sola o le sola a le manuma, a ia pau se toa toe tulai se toa, aua le faaauauina o le galuega i le tausiga o le aiga, o le nuu faapea le itumalo ma le Malo ma ona tagata.

Lau Afioga i le Fofoga Fetalai, ona ou oo mai lea i le tulaga o le Tala Faatatau o le Tupe Faaopoopo Muamua, e fia faailoa le agaga faamalo ma le agaga faafetai o lenei itumalo. A matou vaavaai ma le totoia i tapenaga na faavae ai le Tala Faatatau Faaopoopo Muamua, o lo o faavae i se upu faapea, o tapenaga sa oñilifili ma le to'aõ, the right path. Ona agai lea o sa matou vaavaai i tulaga o lo o faasoa ai le Tala Faatatau Faaopoopo o le Tupe. E momoli atu le faamalo ma le faafetai, o lo o agai lava i le tulaga o le ave o le faamuamua i le galuega e fia vave faatino. Malo. A mea o le aute lenei o faigamea. O lea ua e agai lau Afioga i le Minisita i le tulaga o le faamuamua o le taui o tagata faigaluega po o latou totogi ia siitia. Se malo faafetai. O tala a lenei itumalo, a mea o le agaga mauualuga lea. O fea lava tatou te agai i ai, o le taui o le galue a le tagata o le mea sili lea. O le mea lea i lau Afioga i le Minisita o Tupe, matou te momoli atu le faafetai.

**23 IANUARI 2019**

**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafaiga faaauau i luga o le faitauga faalua**

Ua saunoa se tasi o sui usufono, o lea ua faavasega i ni vaega se tolu, o Ianuari o le tausaga nei, o Ianuari o le tausaga 2020 ma Ianuari o le tausaga 2021. E atagia ai le faasoasoa i le filifili ma le toa, the right path aua foi o lea e ave le faamuamua i nisi o atinae tetele a le Malo. Na pau lava si popolega laititi i i lau Afioga i le Minisita, e pei o lea ua foliga mai ua aafia ai i totonu ma le totogi o lisi ua tuai ona totogi. Sa i ai le faamoemoe o lou sui usufono, ave pea le faamuamua o le Tala o le Tupe Faaopoopo Muamua i le agaga o lo o fia faatino ai galuega e fia faamuamua a le Malo, e lagolago i ai o matou itumalo. Afai la o lea e aafia ai i le Tala atoa lea o le Tupe le tulaga o le toe tau totogiina o lisi tuai.

Ona oo mai lea o sau faamatalaga lau Afioga i le Fofoga Fetalai i le Matagaluega o le Fono Aoaofaitulafono, e matau atu ma le totoa, e \$284,900. O le faamoemoe o lea seleni tele, e toe totogi ai Tuanaimato e tau ia Iuni. A o le tautaula lea e tau avatu i luma o lau Afioga faapea foi le Faatonu Sili ma le Matagaluega, o le taimi lea ua i ai nei lea ua sui mai ai le Matagaluega, le Ofisa o le Fono Aoaofaitulafono i Mulinuu. Lau Afioga, e fai si tele o mea e fia faalelei, a o le tautuaina foi o le Fono, o lea e tu le loma aua le faaulufaleina o le tatou Maota manaia, a o le faalavelave, o lea e tausaili po o fea se fale a o fea se maota e tua i ai sui usufono mamalu o le Maota pe a oo i le taimi e malolo ai, ua le toe i ai se Luafatasaga. O le agaga lena o lea e tau avatu i ai le faamuamua a lau Afioga, a oo ina malolo ma faaoga le tatou Maota, ia o le matou tatalo lena, se i silasila ane. O le naunautai lava o le sui usufono mo Gagaemauga Nu.3, o maota ia, o maota e fitoitonu i le Malo, e le tau faamoemoe e fau mai ni fesoasoani mai fafo, a o le mea lea e tatau ona ifo tonu lava le fuiniu i le lapalapa, o le maota e fau mai outou aao ma o matou lima, e filitagaga ai ona upufai. O le agaga lea o lea matou te faoololomaau atu ai....

**FOFOGA FETALAI:** Malie le sui usufono lea e saunoa se i tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielega:** Lau Afioga i le Fofoga Fetalai, e sili le tuutuu mai i totonu o le saunoaga a le sui mamalu. O mea faapea e taua lava lou finagalo, i le mea lea o le faatupe e tatou o a tatou lava galuega. E pei lava o oe le isi sui usufono e faapea atu e totogi lafoga uma le isi vaega ae fai mai e aua, o le mea lena o lea e taumafai i ai lo tatou Malo. O se luma le fai o o tatou fale e nisi i fafo. Ae e faapea le mea o le faautautaga tatau. E saili saili saili, a le lava loa a tatou tupe, le augatata o tagata e totogi a latou lafoga. Ona tatou agai lea i nisi auala, ae tautuana foi ma oe a fai a tatou tulafono, ia e lagolago mai o oe o le sui Fofoga Fetalai.

**FOFOGA FETALAI:** Tulai mai le sui usufono e faaauau le saunoaga.

**23 IANUARI 2019**



**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

**Tofa NAFOITOA TALAIMANU KETI:** E taua le fautua a lau Afioga le Palemia, e taua tele i lenei itumalo. Ao motugaafa e faatupu manatu, e faatupu lagona, ae e le po malae i lau Afioga i le Palemia faafetai. O lea matou te tautaulenu ai, sei toe silasila ane lava. E tele mea e toe fia faaleleia o le tatou fale lea ua see atu i ai le Ofisa o le Fono. E omia i le tele o potu, ao le talosaga, o la e avanoa pe ana faapea e agai le NPO...

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, o la o lo o i ai le fuafuaga a lo tatou Malo mo le fausia o le fale tele e tautua ai le fale lea. Ana fai ma e afio mai ta te talatalanoa, manatua foi o au o le Minisita o le Matagaluega. Ou te le o vaai lava ia oe, o e fealuai fealuai lava ma e sau fesili. E faapena le mea e fai ma e oo mai e te fesili mai po o a mea a lo tatou Matagaluega o lo o fai, ona ou tau atua lea. Sei vaai i ai toeitiiti a pau le fale nei i le tele o lou leo. Ae tau tutu mai lou fatu i i le mea lea e taumafai le Malo e fai.

**Tofa NAFOITOA TALAIMANU KETI:** O lea la ua maua faafetai. O le agaga lava e ololo pito vaa, tatou te galulue faatasi. Afai o lea o lenei ua tapena, ia faafetai tele i lau afioga.

Ona see mai lea o se matou talanoa i le tulaga o le tamaoaiga o le Samoa ma lona atinae. E faaluaina faatoluina le agaga faamalo ma le faafetai i le tulaga o le tatou malaevaalele. E matua lagolagoina e le motu o Salafai ia fuafuaga uma, aua e faigofie mo matou. Ia sagai ane ai o le tai, e lagolagoina foi e lenei itumalo, le i ai o se isi a tatou vaalele, e fesoasoani ia i tatou ma le tau atinaeina ma le femalagai o le atunuu. Lau Afioga i le Minisita o Pulega o Uafu ma Taulaga, matou te toe tatalo atu. O le sootaga lava lea e tasi ma i matou i Salafai ma le malaevaalele, sei toe silasila ane lava, sei toe faalelei le tulaga o tatou vaa. O le mea lea ou te vaai i ai, ou te malaga i vaiaso uma lava, Aso Faraile sau i le Aso Gafua, aso uma vaiaso uma. O le agaga lea e taumafai atu ai, e foliga ua toe see i tua le auunaga, tulaga o taavale a silasila i ai lau Afioga i le Minisita, e oo loa i le taimi o le a tuta le vaa, e o mai uma lava tagata o le pasese. Ae o le mea tatau sa sau ai e na o avetaavale, silasila la i le va o taavale, e olo ai lava ato i luga. E naunau foi le mamalu o le atunuu e fia oo, e fia muamua i le pasi. Ae afaina ai mea totino e ese le fou e taugata e tai selau afe taavale. E tatau lava ona nonofo pea i luga ae na o avetaavale i lalo sei agai. E pei ole agaga lea o se matou taumafai atu, leaga o lea matou te malaga i masina uma ma vaiaso uma. Ae sei toe silasila ane i ai lau afioga. O le sootaga lea o matou ma le malaevaalele faapea le taulaga, ina ia toe faalelei pe a tusa ma le faaso.

**Susuga Hon Papaliitele Niko Lee Hang:** Lau Afioga i le Fofoga Fetalai.

**FOFOGA FETALAI:** Sei tulai mai le Minisita o Galuega.

**23 IANUARI 2019**

**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

**Susuga Hon Papaliitele Niko Lee Hang:** Lau Afioga i le Fofoga Fetalai, ou te tulai atu ona ua laga mai le mataupu lea i vaa. Vaa ia e faaoga i femalagaiga i Mulifanua ma Salelologa. Ua silafia e le sui mamalu o lea e tapena le isi vaa faaopoopo i Savaii. O le vaa lea e tapena e tele atu i lo le vaa lea e faaogaina nei. E tele le pasese toe tele taavale e mafai ona ave ai. Ae o lea e tapena le fuafuaga lea, masalo e le o toe mamao mo se isi vaa e lua ai vaa mo Salafai. Ao le tulaga lea e saunoa ai, i le omia o le pasese i lalo i le mea e i ai taavale. E alu lava le vaa ae fai faasalalauga a le vaa. O pasese uma e afifio i luga, ao taavale e i lalo, ae pau lava o le mamalu o lo tatou atunuu e le usitai i faasalalauga aua le puipuiga mo i latou e ala ai ona faasalalau ia mea. E fai lava faasalalauga lea i taimi e tuua ai le vaa po o Mulifanua po o Salelologa. Ae paga lea, pe na te saunoa e vave ona oo i fafo e tuli le pasi, ae faapefea le omia i taavale pe a.....o tatou e tataua ona tatou fautua i tagata, le mamalu o le atunuu. O la lava e folafola mai e le kapeteni o le vaa, faamolemole le pasese e agai mai i luga mo le puipuiga la lea. E pau lava o le le usitai lava o tagata na e mafua ai le tulaga lea. Ao la e faasalalau lava le tulaga lea, aua le puipuiga o le mamalu o le atunuu o lo o feoi ma faaoga o tatou vaa. Ma le faaaloalo lava.

**FOFOGA FETALAI:** Malo faafetai, tulai mai

**Tofa NAFOITOA TALAIMANU KETI:** Faafetai o lea ua manino le saunoaga a lau afioga. E sao lele lava e le faigofie le mamalu o le atunuu. Ae peitai o lea mea sa i ai muamua i le faatoa aveina atu o le vaa lea, sa mafai lava ona taofi i luma le mamalu o le atunuu sei faasee muamua taavale e le aufaigaluega. E na ona tuualalo atu faapena i le atinaega o lo tatou atunuu lautele, ia agai pea i luma ae aua le fai ma solomuli i tua e pei ona matauina e matou e malaga i Savaii i vaiaso uma. Ao i ai pea lau afioga i le Minisita o Galuega, ou te talosagaina ma le agaga faaaloalo e ui lava e le o le avanoa leni. Ae ua maea ona fofola i luma o lau afioga talu ona tulai mai i le tofi.

Lou nuu o Safai ma Satoalepai e le o ni auala galue o lo o talosagaina. O auala lava i totonu o le afioga. Ua fai si leva na afaina, o lea ou te toe talosaga atu ai, tuualalo ai i lau afioga ma talosagaina lau afioga, sei toe silasila ane lava i talosaga a matou nuu. O le faiga faavae a lo tatou malo ma le tatou HRPP ave le faamuamua i mea o lo o i ai malumalu ma aoga. A silasila la i auala ia e i totonu o nuu ia, o lo o i ai ma le mataaga o le Laumei. Ona o lea sa ou matauina i taimi o asiasiga o aso fiafia, i le tele o le au matamata mai fafo. Ae o le agaga lena o le faaletonu ole auala. E na ona tuutuu atu i autafa o lau afioga i lau faaso. O lea ou te talitonu sa saunoa lau afioga i tulaga o le faasoaina o auala, ae e le o ni auala galue o auala i totonu o afioga.

Ona ou oo mai lea i le Ofisa o Aoga.

**FOFOGA FETALAI:** Malo, e faamanatu atu i le sui usufono toe lua au minute faai mai lau saunoaga.

**23 IANUARI 2019**

**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

**Tofa NAFOITOA TALAIMANU KETI:** Talafeagai lau afioga. Matou te momoli atu le faafetai tele i lau Afioga i le Minisita o Aoga, o lea ua matou maua o lea o le a tapena le malae. Masalo o lea sa silasila i ai le Palemia ma le Minisita o Tupe, se faleaoga ina a matagofie o Laumoliafi i Avao, e pau lava lea o le faamoemoe, ae o lea ua ou maua e momoli atu le faafetai tele. E toe lava o le malie o le Minisita o tupe i le tender lea e fai, maua loa le konekarate latou te faia. Ao la e faafogafoga mai lo matou nuu, ma lo matou itumalo, momoli aloaia atu i luma o le Maota lenei le faafetai tele i lau afioga i le toetaufanua a le Malietoa. Faafetai le manatu atu i lo matou nofonofa mai i Salafai. Ona faamuliai lea o sa matou tala ona o lea ua maea lo matou taimi.

Lato i le ea ma le lato i le ala lau Afioga i le Minisita o Faatoaga ma Faigafaiva, na ona matou toe tuutuu atu la tatou talanoaga i le tilapia. Ae faapea le limu lea ua sosolo i aau. E pau lava lea o le mea e ola ai Matautu. |O le vao o la e sopo le tualava ma le gataifale o la e sosolo ai le limu. O lea matou te talitali mai po o afea e afifio atu ai le Matagaluga o Faigafaiva, sei tofu ma matou o e fesoasoani ae sei tau tae le limu ae sei faatupu tamai ia, aua le tamaoaga ma le fofoga taumafa o le itumalo.

E le tauoo se matou talanoa i le tulaga o le penisione, i le tulaga o matou lea e malaga. Sa saunoa se tasi o sui usufono, ae ua ou manatu o lea ua matagofie le faalamalamalama a le Malo o lea e agai i luma o le a silasila i ai.

Foi mai sa matou tala, lau Afioga i le Fofoga Fetalai, faafetai mo lo matou avanoa, malo le faatoatoa malo foi le onosai i le faafoefoeina o le Fonousu a lo tatou atunuu. Manuia le tapuaiga i lo tatou Malo faapea foi le isi itu lea o le Maota ae matou maloloina i le alofa o le Alii faafetai.

**FOFOGA FETALAI:** Malo faafetai i lau afioga i le Sui Fofoga Fetalai. Ou te tapa le Taitaifono o le Komiti o Tupe.

Malie lava le sui usufono o Alataua i Sisifo sei tulai mai le sui usufono mo Faleata i Sisifo, atonu e le umi sona finagalo, aua o Minisita lagolago.

**Tofa LEALAILEPULE RIMONI AIAFI (Faleata i Sisifo):** Faafetai i lau Afioga i le Fofoga Fetalai mo le avanoa. O lea e tau matau atu o lea ua tau see loa le sa o lau afioga ao lea e le i ave atua ni finagalo o lenei itumalo.

E taua tele le Tala o le Tupe, na ou sau nei i le afiafi valaau mai lou tina, "Manuia le Fonotaga Leala, o le a ou faalogologo atu". Ou fai atu, "Mama ki faaleo tele lau laau ma fai i le toeaina e soso ane i talaane o le leitio", ou te alu atu loa ou lauga. Ou fai atu i le loomatua, "Vaai oe mama, faafetai i le Atua faafetai i le itumalo, aumai le avanoa i lau tama e lotolotoi ai i upufai o Samoa". O le tagata e sau iinei i totonu o le Palemene ae le faaogaina le avanoa, ua matua maumau le taimi na ave ai e lona itumalo ma le meaaloa a le Atua e sau. Leaga na o tatou lava a lauga e faamaumau i totonu o faamaumauga a Samoa e oo i le faavavau. Ma o i e toe saili mai ai le tofa i e fai mai, pe faapefea le tofa sa i ai tatou, leaga o upu nei e faaoga e taua, aua le atinae o le atunuu faifaiepa. Aua o tatou o lo o i ai le taitaiga o Samoa i lenei vaitaimi. O lea lau Afioga i le Fofoga Fetalai, faafetai mo le avanoa.

**23 IANUARI 2019**

**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

E fia pai foi se faamaisega i le sui usufono, se tasi o toa manumanu o lenei Maota. I le faletua ia Ana ma le paia i le itumalo, faamaise le Atua, e tasi lea tagata taua ua iloga lona sao. E le gata i le atunuu aemaise o lona taumafai mai i le Palemene. Ua fia tausaga o taumafai mai, malo faiaina malo faiaina. Malo mai ae paga lea ua le maea lana Paeaiga muamua ae faafetai. E le taua le umi na ola ae o au galuega sa fai. Faafetai ia manuia lau malaga. E le tau faafetaia le Malo i le galuega lelei o lea tausaga, ae ave atu le faamalo ma le faamalosi ma le faamanuia i lenei tausaga i galuega o le a feagai ai. O le Tala o le Tupe ua feagai ma i tatou, o lau tala lava lea e fai soo i le taimi e talanoa ai le Tala o le Tupe, tatou faafetai o lo o tatou o mai e faasoa tupe, maua tupe faasoa aua le atinae o Samoa. Tatou vaai i le atunuu e sili ona milionea i le lalolagi o Amerika. E lua totogi... o isi tagata faigaluega a le Malo e ova i le milionea e leai ni totogi o maua. Tauaimisa le au polokiki ae le totogia tagata faigaluega, afaina ai atunuu. Ae a tatou, maua le filemu ola fiafia ola saoloto, maua tupe faasoa. E lagolago le Tala o le tupe ae ave atu le tuualalo i le paia o Minisita.

Lau Afioga i le Minisita o Galuega, ia malo galue, faafetai mo le seleni lea ua tafa lou finagalo aua lo matou nuu i Vaigaga. Ua leva tele ona talosagaina se seleni aua lea pa, ae faafetai o lea ua finagalo lau Afioga ma le Tamaitai Pule i lea vaegatupe laitiiti e \$25,000. Faafetai, faafetai tele. O lea sa fesoasoani mai foi si ou uso o Faumuina, ia leaga o le ma itumalo faifaatasi, lea o le a alu ai i le palota i le isi Paeaiga lea e lumanai nei.

A o tulaga i tatou auala, i lou talitonuga lau Afioga, e tatau ona toe fai se iloiloga auiliili, ua tatau ona toe faalautele le tele o tatou auala, ua fai si vaiti o auala, main roads uma lava, aemaise le alu i tua ma taamilo i Savaii. Sa talafeagai lava i le taimi o laiti taavale ma toagaogao, a o le taimi lenei ou te talitonu ua tatau ona toe tagai i ai lau Afioga, aemaise la o mea o edges o auala, ou te talitonu o le vaega aupito sili lea ona tatau ona ave i ai se faamuamua, aemaise auala fou o lo o fausia nei, aua a e tagai i auala, e amata ona leaga mai tua, e taetae mai le pito i tua, ona sau ai lea agai i totonu. Se i vagana auala ia ua fai mai foot paths, o auala ia e umi ona last. Ae manaia pe a toe tagai i ai lau Afioga i le faatinoga o auala agai i luma. E le gata i lea, o le vaega lea e tipia le auala i le vai, faamolemole, se i fai se tou fetuunaiga. A tipi nei le auala, o se auala matagofie, e fia masina, o isi... o le auala lea a maua ma Levaopolo, ma Olo, e fia masina o tipi ona ou oo lea i le Tamaitai Pule lea e avatu ai le fesoasoani, lea e i ai le fetuunaiga lea e tipi e le vai toe fai e latou. O lou talitonuga lau Afioga, toe iloilo, o lena e tofu lava vaega o auala nei ma vaega latou te maintain ina. O le a le mea e le ave ai i le vaega lena latou te faia, aua o latou foi lena e maintain ina, tipi e latou ma maintain e latou, aua e pei e mumusu le vaega lea e maintain le vaega lea, aua o lea e tipi e le SWA. Ae manaia pe a fai e le vaega lea e faigofie ona fai. E i ai se mea o faaletonu lau Afioga i le Minisita?

**FOFOGA FETALAI:** Malie le sui usufono o lea ua tulai mai le Minisita mo Galuega.

**23 IANUARI 2019**

**Tulafono Tau Faaofi o le Faatatauina o Tupe Faaopopo (Nu.1)  
2018/2019 - felafolafoaiga faaauau i luga o le faitauga faalua**

**Susuga Hon Papaliitele Niko Lee Hang:** Lau Afioga i le Fofoga Fetalai, leai na o se fesoasoani i le saunoaga a le Afioga i le Minisita Lagolago, i le tulaga lea o le galuega lea e tipi ai le aualatele aua le taiga o se paipa mo le suavai taumafa, o la ua i ai fuafuaga, e totogi e le tagata lea e ana le galuega le tupe i le Ofisa o le Vai. O le Ofisa la o le Vai e fesootai ma le konekarate, o le tulaga lea e i ai a uma loa ona tipi ua uma ona toe faalelei le paipa, ua toe faatumu le auala i le tulaga sa i ai. A o le maitau lea e faapea, o le fesootaiga la a le Pulega o le Suavai ma le konekarate lea e mafua ai ona tuai. Ae moni le saunoaga o le tele o mea faapea, o le tuai ia ona faatino. A o le mea lea e taumafai i ai ina ia vave ona toe faatumu le auala ona e afaina ai taavale e soli soli lava ma tele le pu ma afaina ai lava ma le auala. Ia a o le tulaga lea e pei ona silafia e le Afioga i le sui usufono mamalu. Faafetai.

**FOFOGA FETALAI:** Malo faafetai.

**Tofa LEALAILEPULE RIMONI AIAFI:** Lau Afioga, faafetai. Lau Afioga o lea e malamalama lelei lava i le fetuunaiga lea e i ai nei, a o lau tuualalo lea e tuu atu i lau Afioga, e manaia sao aua o lea e totogi e tagata le tipiga o le auala, ae tuai le faatinoga a o lea e manaia le faatino e le vaega lea e maintain ina, e mafai ona fai e latou aua o lea e galulue i aso uma ma toe faatumu. Ae tuu atu pea i lau Afioga.

O le auala lea lau Afioga e alu i le malae vaalele, o i lava e tataua ona ave i ai le tatou faamuamua ona o lea e aupito sili ona tele le faaoga i aso uma. E le o po se lilo faafetai o lea ua avatu le galuega a le Malo e faalautele. Faafetai. Ae tataua la ona tagai i le auala lea e oso i Aleisa, e tele le faaletonu, sa tataua ona upgrade le auala lea, a o lea e feagai le auala lea i tai ma le faaleleia, aemaise le oso atu lea i totonu o Falelauniu i le auala alo lea e oso atu i ina e alu i Aleisa, o le auala pito sili lava lena ona lelei ma faigofie ma televave ai le omai o uta ma le o atu o tai, a ua fai si leva o tuulafoai le auala lea, se faamolemole se i toe tagai ane i ai e ave i ai le faamuamua ma auala uma ia i Falelauniu aua e fua i le aofai o tagata o lo o nonofo ai ma faaogaina, e fai si tele o tagata e nonofo ai, a ua tuai na faagaoioi faamolemole pe a uma taaloga ia tatou te alo atu i ai.

O le isi vaega, na o le fautuaga, o mea ia o taxis. A e agai nei i tua o le flea market, ua le mafai ona feoai tagata ma pasi ma mea i le tele o taxis la e tutu ai ma feoai ai. Sa ou faapea i le Tulafono foi lea, e tataua ona o uma taxis e tutu i taxi stand, tasi le Tulafono mo tagata uma. Ae o lea e foliga mai e ese taxis e tutu i stands ese taxis e feoai solo ma faalavelave solo. E faigata foi la, o le mea foi la lena o lea e tutupu ai faalavelave i tagata ia e o i taxis ma leiloloa a latou meatotino, ma tutupu ai faalavelave ae fiu e sue taxis ia ona e le o tu i se stand. A o le taxi lava ia e alu atu i le stand e faigofie foi ona toe trace mai i ai, e sue mai ai pe a i ai se faaletonu.

**23 IANUARI 2019**

**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

O lea la fai mai nai tama ia e fai a latou stand ua le iloa e latou po o fea tonu le faamamaluina o le Tulafono, ona o lea e faataga isi e omai e petolo solo, e oo i lalo o le fale o le Malo, ia a ta alu atu i ina i le pisi o le fale o le Malo i lenei taimi e tau leai ni car park, e lelei pe a ua aveese taxis na e fai foi la latou car park i ina. Tagai ane i ai lau Afioga mo le agai i luma.

O i i le MNRE lau Afioga i le Sui Palemia, muamua a, a tatou toe usu mai i le taeao ona e tagai lea i faleie na e faafesagai ma Eveni, ua fai si mataga tele o lea vaega, o lea ua uma ona saunia lelei e le Malo maketi lelei, le flea market ma le maketi e o lelei tagata e faatau ai a latou oloa a ua matauina e i ai lava tagata na na faatau i ina, a e tagai la i ai o lena ua i faleie o la ua malepelepe, ona o atu lea faatau i ina, ua oo i luma o le NPF plaza, ua oo lava i fai o faatau ai. Faamolemole e tatau ona fai se fuafuaga, e le matagofie ia vaega, ma se i ave tagata e faaoga mea na fai e le tatou Malo e faatau lelei ai a latou oloa.

O le isi vaega, o tatou vaitafe, pe le mafai e le Matagaluega ona fai se galuega faifaipea i le faamamaina o vaitafe, aua a oo i le taimi lenei o timuga o le mea lea e faigofie ona pa i luga vai ma lolovaia, ona e le o i ai se galuega foi lea e taumafai e faamama ma faaloloto alavai ma vaitafe o lea e toa ai le oneone i taimi uma, pe mafai ona i ai se tulaga i le vaega lea, aua ou te talitonu foi e mafai ona fai fua. E tele kamupani fai auala, fai konekarate e manao i le oneone, ae ave i se tau e fai fua e latou ma faamama e latou i se tau talafeagai.

O le Matagaluega o Leoleo, malo faafetai. Ua tele le saogalemu i le kerisimasi o le galuega lea a leoleo i auala. Ae toe lagolagoina le finagalo o se tasi o sui usufono sa saunua i lenei aso i le tele o faalavelave matuia lea ua tulai mai, tele le faaletonu, fasioti tagata ia ua tulai mai. Sa ou talanoa i le Afioga i le Komesina, aua o lea ou te talitonu, e tele le masalosaloga o tagata nei i mea ia o fualaa faasaina, avatu i ai lau fautuaga, maua loa suspect, i le taimi lenei, tui le toto. Ave le toto e sue, aua po o le a le faaaogaina o le aisa i le tolu, ono masina talu ai, e maua uma lava i totonu. A ua tatau ona faataunuu lea vaega, aua e fai atu lau tala, o le matua faafitauli ogaoga lea ua i inei i Samoa, o le mea lea. Ia matua tagai lelei ma auilili i ai po o le a se faasalaga talafeagai e fai i le mea lenei, ave i ai le faamuamua. O lea e fai i atunuu Asia tagata faapenei, e faasala oti. Aua o se mea aupito sili ona leaga, e aafia ai tupulaga o se atunuu.

O le isi vaega, o tamaiti ia e i ai nei, o le tele o tamaiti e matua tautalaiti, le mafafau vaeane le faafofoga a Samoa, a sau e faatau mai se mea ia oe, a fai atu e leai, ua aisi loa. A o le isi taimi, e ta lava le 10 i le 11 i le po, o la e feoi lava i le taulaga. O tatou i aso ia ma mea sa tatou faatau, o mea sa fai i totonu o aiga, o mea la e maua i lafanua ma le sami. Ae leaga o mea ia ua faatau nei, o mea ia e aumai fale o Saina ma isi kamupani ma omai faatau, e le talafeagai la, ua tatau ona i ai se curfew, e tatau ona i ai se sa, ta le lima i le afiafi ua le tatau ona toe maua ni tamaiti laiti faapea i le taulaga. Ma i se common sense, e le tatau ona... ina ia aveese atu ma tatou lea vaega, ua eseese tupulaga, eseese tamaiti, eseese lenei vaitaimi.

**23 IANUARI 2019**

**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

A outou vaai i ai i nai tamaiti ia e faatau ula mai Tufulele, o le mea lea ua trademark mai lava i le afioaga lea, na ola mai lava tupulaga ma augatupulaga o latou faia le mea lea, e oo mai le aso, e ese le matagofie ma le manaia o lea mea, ma e faaaloalo foi tagata nei. O le mea la lena o lea e encourage e tatou, a o le mea la lea ua fai nei e le toatele, faamolemole lau Afioga toe tagai ifo i le vaega lea. Faafetai tele lava i le Matagaluega o Leoleo, o lea ua aumai le Tulafono lea o tagata e faafoi mai fafo, o pagota. Malo lava faafetai, o le mea lea ua leva ona tatau ona tapena i ai ma tuuina mai, ua fai si toatele o i latou ua faafoi mai, ae tatau ona tagai pea i ai, aua o le tele o nei tagata, pe na o se tai lua i le taitolu tausaga na fanau ai i Samoa o loa i fafo i le 20 i le 30 tausaga, a o lea ua toe faafoi mai. Manatua la o la e i ai le finauga foi lea faapea leaga o le atunuu na fanau ai, ae tatau foi ona i ai se tatou malosiaga e tetele atu ai ia vaega e fai ma tatou tilotilo i ai, aua e i ai soligatulafono na tulai mai nei, o lea na tatou vaai e mafua mai tagata nei mai fafo.

Lau Afioga i le Minisita mo Faamasinoga, se i tagai ane i faasalaga talafeagai mo solitulafono mamafa. Ae fia oo sau tala i mea ia o tatou faamasino, fua foi la i le Tulafono na aumai e le i mamao atu lea e tapulaa ai tausaga i le 68 i le 70 pe a maua le malosi, ia se i toe tagatagai i ai. Aua o lea tatou te vaavaai i ai, o le taimi lea o lava le tomai ma o lo o lava foi le malosi e faaauau ai, aemaise o lena ua i ai le fuafuaga a lo tatou Malo i se tatou Court of Appeal e manaia foi ae faaoga i ai i latou ia ua iu mai tai, e manaia ae faasolo i ai, e i ai latou ia tatou faamasino ua iu mai fafo ua foi mai fafo i atunuu tetele o la e lava le tomai ma le malosi e faaoga i ai i ia vaega. Ona oo mai lea lau Afioga i le Matagaluega o Aoga, e le tau fai atua sau tala aua ma te mafuta pea ma ma talatalanoa i le tele o aso ma ou faasoa foi i mea ia. Ia, lau Afioga i le Minisita ma le Minisita Lagolago, ia faaoga mea lelei ia na lua maua mai ia Faumui lena ua lua lelei ai. Ae na pau lava le mea lea ou te fia avatu ai le fautuaga, o lea ou te faitau nei i le review fou lea o le tou sector plan lea na fai i le 2013-2018, o le mea aupito sili ona ogaoga lea e sau i le fautuaga ma le mea lea na maua, tele le faaletonu i le history rate. O le mea lea na mimita ai Samoa i aso ia, leaga toeitiiti lava oo i le 100%. A o le mea lea ua sau nei i le lipoti, ua matua tele le faaletonu. Igilisi, Numera e oo lava i le faa-Samoa, lau Afioga, ia ave i ai se faamuamua i lea vaega.

O le mea lea i le SQA, talu lava ona aumai le SQA, ou sau faitio i ai, ou te le faitio i le SQA leaga e aoga le latou role, ae o lou talitonuga, pei lava o lena e sese le latou role le latou mandate. Pei o lea ua omai e taumafai e regulate luga i post secondary. E tatau ona amata i lalo. O le a le aoga e toe o ai i luga i faailoga ma mea ia, o lalo le mea e tatau ona tilotilo i ai? Manaia pe a omai e extend le latou mandate, amata i Pre School, Primary School, o i ina e tatau ona ave i ai le faamuamua lau Afioga. O lea ua ou sau ma le igoa fou o le SQA, ae a pe a tuu i ai le SQEA, e le o le Samoa Qualification, a o le Samoa Quality Education Authority. Lau moi lava lau Afioga i le Minisita, ona o ifo loa lea e amata le vaavaaiga mai lalo.

**FOFOGA FETALAI:** Toe lua minute o le sui usufono.

**23 IANUARI 2019**

**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

**Tofa LEALAILEPULE RIMONI AIAFI:** Aua o le mea lea e tupu nei, o tatou foi isi tagata ia e tuuaia nei, tatou sui usufono. O lea tatou te mananao e fai lea college i i, faa-college i, leaga o le mandate lea na sau ai. A o le tele o nei colleges, e le meet ina standards, minimum standards, e tatau ona avea ai ma kolisi, leai ni library, leai ni labs, leai ni faiaoga, ia ona tau lea o le kolisi tau ina tau o le kolisi a le itumalo, ae talofa. O le vaega la lea a le SQA, o i latou ia e tatau ona tilotilo i standards ma vaega ia ina ia mafai ai ona agavaa se aoga i ia vaega.

Lau Afioga, faafetai mo le avanoa ua tuuina mai. E tele mea ae ua ta alofa i lou oioi mai. Ae faauma atu ai se faamatalaga e faapea; ona o lea e maua pea i saunoaga a lo tatou Malo. O le mea ia manatua e le toatele o sui usufono, o Samoa lava ia i le vaai mai a le lalolagi o se atunuu filemu toe saoloto. O lona uiga o lau tala, a fia tetee, tetee, faataga e o e tetee. E leai se pa puipui. O faiga foi faasolitulafono i totonu o ofisa, totonu o galuega ma mea fai a le Malo, e le mafai ona taofia e tatou, aua e maua i so o se atunuu uma o le lalolagi. Na pau le galuega a le Malo lea e fai, ia taatia i vaega uma ofisa ma itutino e vaaia ma malupuipua mea tutupu mai. O isi foi taimi ua ou le fiafia i le tele o vaega e vaavaaia mea nei, ua i ai le Ombudsman, ua i ai le Faamasinoga, o Leoleo, o le Audit, o mea uma ia a tatou o lea e faatino, ma e leai foi se papuipui e taofi ai so o se sui ma so o se tagata sitiseni o le atunuu e molia nisi o i ai se solitulafono. E maua le avanoa mo soo se tagata, e maua le avanoa e so o se tagata. O le ala lea o lou talanoa atu, e faafetai ai i lo tatou saolotoga o i ai, ma le filemu o i ai lo tatou atunuu.

E momoli atu le faafetai ia outou afioga i Minisita le faamalosi i lenei tausaga i la tatou savaliga. O lea ou te nofo ma ou vaavaai atu i le pito i tua, ma ou musumusua ia Lenatai. A ou vaai i le laina atoa lea ona ou alofa lea, a ou vaai atu i tua ia Loau, na oo mai o uliuli lelei lona ao, ao lea ua amata ona paepae ma. E tasi lava le Minisita lea e uliuli atoa lona ao, na o Afamasaga, lau Minisita. O lona uiga e na o au lava le Minisita lagolago lelei lea e i ai. Manuia le Fonousu a Samoa.

**FOFOGA FETALAI:** Malo faafetai, atonu e le umi le saunoaga a le sui usufono mo Anoamaa. O le toe saunoaga foi lea a lea itu o le Maota.

**Afioga ALAIASA MUAGUTUTIA MOEFAAUOUO MALAGAITUTOGIAI SEPULONA MOANANU (Anoamaa):** Taoto ia paia ma sa o Samoa ua uma ona oo oo i ai ia saunoaga o lenei aso atoa foi ma le aso ananafi. E talitonu e le toe faaopoopoa pe toesea i sa matou tala. O paia lava ua taoto ae o se ala ua oo, e le faoa foi pe toesea.

Ae avea ia lenei avanoa matagofie, sei fai ai foi sina sao o lenei itumalo aua le faamoemoe ua lupe nei i le Laulau a fono, o le talanoaina lea o le Tala Faaopoopo o le Tupe. O lau lava matamata aoatetele i le Tala o le Tupe, se e laitiiti ae ganea, e laitiiti ae u'a mea e sau ai.

**23 IANUARI 2019**



**Tulafono Tau Faaofi o le Faatatauina o Tupe Faaopopo (Nu.1)  
2018/2019 - felafolafoaiga faaauau i luga o le faitauga faalua**

E faatoa pau lenei o se Tala o se Tupe ua malie ai le agaga ma le mafaufau. A fua i ai i mea tetele ia e i ai, ia faamanuiaina ai o tatou tagata. Ua leva foi ona o matou tatalo, a maua faamaumauga sa ou tatalo ia sii totogi o tagata faigaluega, ae o lea ua sau le tali. Ou te le o popole la i le Tribunal po o nisi tagata i le tuanai. Ao le ai lea o le faigamalo lenei, o le tatou ai lea mo Samoa. Ua leva ona i ai totogi i le sefulu tausaga, o le mea lava e tasi. O lea ua aumai le tofa, faafetai i le tofa, faamalo i le Malo. Faafetai foi o lea ua amanaia le tautua a i latou o lo o tautua i le ao ma le po aua se manuia o lo tatou atunuu. E moni lava o tatou e fai tonu, ae pei o latou nei e pau i ai le mamafa o le faamoemoe. O lea foi e manaia nai vaega ia e aumai ia tuu faamulimuli tatou. Ae faamuamua ia tagata faigaluega aua le faamanuiaga lea. Ua faamanuiaina tagata matutua, faamanuiaina faiaoga, vaai i le tele o le anoano o le mea lea e sau i le Tala o le Tupe. Ua faamanuiaina e e sii mai i fafo, ou te le iloa la po o a faiga faavae ia e aumai o lea e faaletonu faiga faavae a le Malo. E leai o i lea e atagia ai le lelei ona faafoe o le Malo. A silasila i faiga faavae ma le tau sosofa mai fai mai ua faaletonu. Se e tali lava le atunuu. O lea faatoa uma atu nei la tatou faiga palota, o le a le tali a Samoa, o i ina e iloa ia, o lea lava e sao lelei le tulaga o lea e aga i ai lo tatou sa ma le faamoemoe.

E momoli atu le agaga faafetai i lau Afioga i le Minisita, ae faapea le aumaiga o lenei Tala o le Tupe, ua tatou fiafia uma ai, ma tatou faafetai ai. E pau lava lea ua fai ma masani o tagitagi a o tatou itumalo e aumai. E le natia foi i tua, e leai e momoli atu i luma. Ou te lei talanoa, leaga o lea faatoa uma atu nei le sui usufono fai mai e talanoa i lona tama ma lona tina, e sau loa lauga. E leai o au, ou te talanoa i lou itumalo, e sau e momoli le finagalo lea o lo outou itumalo i le Maota o Samoa, e faapena. E pei o lea e manaia e au ai foi i auala o lo o faaoga nei, ua tau aafia i timuga. Leaga o tatou, a oo loa i le tau lenei ua tatou vaai loa auala ua le lelei. Ou te le iloa po o se faafitauli tau inisinia, ae toe silasila ai foi lau afioga i le Minisita. O lea foi o le a toe fai le auala lea i le alu agai i le malaevaalele. E lei lava nei lava ona o mai ai le kamupani mai Niusila na paaga ma le Swell, na fai atoa ai le auala lea e tau i le malaevaalele, ae e lei faia le auala lea e tau i sasae. E lei i ai lava se taimi ua faapea mai le Malo o le a fai le auala lea. Ae a outou o i le auala lea i le matou itumalo, ua matuai afaina lava le tulaga o lo o i ai i le taimi lenei. Na ona o matou faapena atu. E leaga a totogi le laisene o taavale, e tutusa lava laisene o le taavale e alu i o, ma le laisene o le pasi lea e alu i Falefa. A na faapea e fua i le leaga o auala, sa tatau ona fai suiga, a mea o lou itu lea e te alu ai, o le a pau lau laisene leaga e leaga e le auala. O le mea lea e tuuina atu sei silasila i ai le LTA i ia tulaga. E leai se tulaga o lea e tau saunoa isi sui usufono, e faasea i le Ofisa o Aoga. Ona o tulaga i iuga o suega. Ou te le malamalama i lo tatou atunuu, o le tele o sao o le Malo. E aoga fua le fanau, ave atu tupe e totogi ai faiaoga. O le tele ia o mea ia e faalelei i le tulaga o le siitia o le auaunaga a faiaoga. E le o mapu le Ofisa o aoga i le faiga o mea uma.

**23 IANUARI 2019**

**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

Ae sei silasila ifo matua, e i ai lo outou sao i le atinaeina o fanau. Ne i tei ua outou lafo mai i faiaoga, leaga e tele ia o distractions ia ua i ai nei. Ua te i lava ua ola le moli i le po atoa, ae le iloa o le internet le mea la e fai, o facebook, ona maumau atoa ai lea, ona tuuai lea i le tuuaiga faigofie, e leaga faiaoga. Ae le iloa e tele foi le sao, o tatou matua e tau vaavaai tulaga ia, siaki lau fanau po o sao mea la e ao. O le molimau a le isi tamaloga, fitusefulu pasene o tagata i luga o le internet, o le mea leaga la e matamata ai. O le faaaogaina lena o lea ua i ai nei. Ou te le o fai atu o le leaga le mea, ao mea na o lea ua sui ai mafaufau o tamaiti ma faaletonu ai aoga. Ao lea o le a tuuai mai o le Minisita o le faiaoga o le ulu aoga.....e le...o la tatou avega e tauamo faatasi. Lau afioga ao le tele ia o mea ia e agai atu i ai le Malo e faamanuiaina ai. E pei foi ona saunao, o tatou na aoga, a tuua le aoga i nai tuuaga tai lua vaiaso, ona ave lea o ta ita ta te alu e vele le maumaga o le isi aiga e maua ai so ta pili. Na o tatou ui uma lava i mea faigata na. Ae a le mea lea ua i ai, o lea ua o tatou iloa e leaga le mea. E leaga le mea o le ola le tagolima, ona finau laia. Ao le mea lea ua i ai nei fanau, ua aoga fua, nofo fua, ai fua. Ao le a le tulaga o aliaie mai, e leai se mea o tino mai.

Ona i ai lea o le talitonuga, o au lea o le isi tagata e aafia lou itumalo i le Tulafono lea o le Palota. O lea la ua ou alofa atu, o lea ua aumai finagalo e pei ona i ai i le taeao ua sola. O Saleaula, Tafua, ae sa ou manatu foi e aumai se mea faapea a lou itumalo. Ae ui i lea, o i e iloa ai, sei e toe silasila ifo lava i le komiti. Leaga e faaaloataua e le komiti sui ia, e aumai mea ia, ae le faia le galuega. O lea ua aumai le lipoti, e tele taimi na o matou o ai i uta e leai se mea o sau ai. Ae mananao e o matou e toe aumai e faalepeti le filemu lea. E le faapea le ala o le faiga o tatou. Sei toe siaki ifo lau afioga, o nei komiti uma e i lalo uma lava o le faamalumaluga a lau Afioaga i le Fofoga Fetalai. Ao lea o le a taamimilo mai ma fai mai, fai mai ni a outou tusi tou te ui mai i le Tulafono Tumau. Ao le Tulafono Tumau e leai sona malosiaga faaletulafono. E na o mea e liolio ai le Fonotaga lenei ma tatou talanoa ai i inei. Silasila la i le taitai seseina o le atunuu lea ua i ai. Ae afua mai i le komiti le le sao o le aumai o le mataupu. O mea ia e ono mama ai lo tatou sa ma o tatou faaletonu ai. Ae ui i lea, o le manatu lava ia o Lufilufi, ia nofo lelei Samoa. Ia utagia le mea ua aumai e le Malo, pe tatou te gogoto ai lava, tatou te o faatasi ai lava i lalo. Ae tatou talia lea mea i lenei vaitau.

O au lea na ou foi mai nei lau afioga ua ou vaivai, o lea sa ou alu e momoli le faaaloalo aua le tuumalo o le afioga ia Pa'u. O lea la ua uma ona momoli sao lava i ai i le aiga ou moomooga alofa, ma ia talosia le faigamalga. Ia tafi mala foi i totonu o le Maota lenei aua le tuua foi o le malo e le afioga i le sui usufono. Ia faamaise foi le Atua i le paia o le aiga. Si ou itumalo, o lea lava e manuia mea uma, e leai se mea o faaletonu E pau lava lea, toaga e tatalo aua se manuia o le Afioaga i le Palemia ma Minsita ia fai atinae a lo tatou itumalo. O la matou tala lea ma le faaaloalo. Manuia lau Afioaga i le Fofoga Fetalai, manuia foi le Palemia ma le Kapeneta, manuia le la tala na atoa, ae o matou ola i le alofa o le Atua. Soifua ma ia manuia.

**23 IANUARI 2019**

**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

**FOFOGA FETALAI:** Malo faafetai saunoa i lau afioga i le sui mamalu. E le tau laeia i se upu le toga lelei, e le tau paopaoina foi i se faamatalaga, ia le maa e fai ai le ai o le taulafoga. Malo saunoa faafetai

O lea ua o tatou taunuu i la tatou malologa masani, ona i ai lea o le manatu. A tatou taliu mai i la tatou malologa masani, ona tuuina atu loa lea o le avanoa i le Taitaifono o le Komiti o Tupe, o le sui mamalu mai le itumalo o Alataua i Sisifo.

*Na faataatiaese Taulumaga a le Fono Aoaofaitulafono mo lana malologa masani i le itula e 8: 47 i le po ma toe faaauau i le itula e 9:38 i le po.*

*Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.1) 2018/2019.*

**FOFOGA FETALAI:** Ou te faasilasila atu, ua toe amatalia nei Taulumaga ma Galuega a le Fono Aoaofaitulafono. E momoli atu le faamalo ma le agaga faafetai, malo le onosai. Malo foi le tauatai i le faatinoga o le tatou galuega. Ou te faamalulu atu i nisi o sui usufono o lo o faapena ona i ai lo latou agaga e fia saunoa, ia ona ua maea ona faatulaga galuega ma le poloaiga a le Nofoa. O le amataga o le tatou foi mai i la tatou malologa, O le a saunoa ai le sui mamalu mo Alataua i Sisifo, o le Taitaifono foi lea o le Komiti o Tupe. Tapa lau afioga i le Taitaifono o le Komiti o Tupe.

**Afioga ALIIMALEMANU ALOFA TUUAU (Alataua Sisifo):** Manuia le tausaga fou, malo folau. Lau Afioga i le Fofoga Fetalai, o saunoaga a sui usufono mamalu agai i le Tala Faatatau Faaopoopo Muamua o le Tupe, e laiti lava nai mataupu e le o ni mataupu taua o lo o fesiligia ai le Lipoti a le Komiti o Tupe Maua ma Tupe Totogi, o le a faamuli i ai sina faamatalaga. Ae se i fai muamua sina tala i le vaaiga lautele i le soifuaga ua tatou i ai nei. E leai lava ni mea fou. Lau Afioga i le Fofoga Fetalai, o upu ia ou te faalogo soo ai i totonu o le Maota lenei. Atonu la e le fou i le tele o sui usufono o le Maota lenei, ae mo lou lava ia sui usufono tauatia, e taua lava i le faalogo manatu ona faaoga lea na o mea lelei. O le matou tiute lea o le faufautua, e aoga mea ua tutupu e poupu ai lo tatou sa e fautele. E faatau tele le mataupu tautalagia soo i galuega mataitu a ituau faafetauagai e tolu o le Malo. E mataitu ai e le Pulega Faatonu le Palemene ma le Famasinoga, mataitu e le Faamasinoga Pulega Faatonu ma le Palemene, e mataitu foi e le Palemene le Faamasinoga ma Pulega Faatonu. O le faamanatu o le aiaiga e mataitu ai e le isi itutino le isi itutino po o le siaki ai foi e le isi itutino le isi itutino lau Afioga i le Fofoga Fetalai, ua le nofoai ai lava ae avatu pea se fautuaga ona o la tatou avega e tauave faatasi. E le mafai la ona aloese Alataua Sisifo i tiute mataitu a le Palemene lea o lo o matou faatino atu e ala i Komiti faa-Palemene i le siakiina o galuega a le Malo.

**23 IANUARI 2019**

**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

O le aoga o lenei sui usufono o avanoa e maua i le Tala Faatatau Faaopoopo o Tupe, o le toe tepa lea i tua i a tatou tala faatatau ma fua pe na a mai le faatinoga o galuega mo le tatou agai atu i sini autu o le tamaoaiga. I se vaaiga lautele, e ono sini autu o faiga faavae tau tupe a le Malo. Ma e matauina ai pea ma le agaga faafetai le faaauau pea e le Malo o le tauaveina o tapulaa ina ia ausia. O le itu taua muamua o ia faiga faavae mo le silafia e nisi o le Maota nei, o le tulaga lea ina ia i le va o le 35-38% o le tamaoaiga le aofai o tupe faaalu masani mo auaunaga ina ia lava tupe faasaoina mo le atinae o vaega tumaoti faapea avanoa mo galuega. A tuu la i ai le tupe faaalu faaopoopo lea o le Tala Faatatau lea, ua \$708miliona ai le tupe faaalu, ae matau atu o lea ua \$2.2miliona o le tatou tamaoaiga, ma ua ausia le pasene faatapulaaina mo le tatou tamaoaiga. O lona lua o faiga faavae, ia faatumauina i lalo ifo o le 50% o le tamaoaiga le aofai o aitalafu ma nonogatupe a le Malo i le Tala o le Tupe 2016/2017, aua ou te talitonu o lea toeitiiti taunuu mai le 2017/2018 lea e faamauina ai le \$1,094,000miliona, o le 50.4% o le tamaoaiga a tatou aitalafu. E ala ona ou toe taua le tulaga lea, ona o le tele o le matau atu, o le popole o le toatele o le mamalu o le atunuu i a tatou aitalafu lea e faalava ai atinae o le tatou Malo, o lea o lo o ausia lelei lava le 50% e tatau ona gata ai a tatou aitalafu.

O le faiga faavae lona tolu, ia i le va o le 40-50% o tupe faaalu tupe faaagaaga mo totogi o tagata faigaluega a le Malo, ina ia ogatasi ma le manulauti a le Malo ina ia siitia le faatinoga o auaunaga. E ui lava ina ua aumai siitaga o totogi i le Tala Faatatau Faaopoopo Muamua o le Tupe, ae o lou fiafiaga, pe a faaopoopo le \$8.9miliona lea e aumai i i le siitaga o totogi, ua atoa ai loa le \$242miliona o tupe ua faaaluina mo totogi o le aufaigaluega. A faapasene la i i a tatou tupe faaalu o lenei tausaga, o lea la faatoa ausia tonu lava le va o le 40-50%, o lea ua 42%. Atonu o le mea tonu lea ua tatau ai ma onomea le aumai o le siitaga i Tala Faaopoopo Faatatau Muamua ina ia mafai ona ausia le isi tapulaa lea o faiga faavae. O lona uiga o la sa i lalo lava a tatou pasene o totogi sa le i ausia le isi a tatou faiga faavae.

O lona fa, ia faatumauina i lalo ifo o le 3.5% o le tamaoaiga le faasiliga o tupe faaalu nai lo tupe maua. O lo o faamauina le .1% o le faasiliga o tupe i le 2017/2018 e ui e le i oo mai i le Palemene, a o le tausaga i ona tua atu sa faamauina ai le maualuga i le 3.5% o le faasiliga o tupe faaalu nai lo tupe maua.

O lona lima o faiga faavae, o le faaleleia o galuega faatino a Faalapotopotoga a le Malo ina ia faamamaavega i le Tala o le Tupe, ia lea o lo o i le tatou Tala Faaopoopo le \$4.1miliona lea e fesoasoani mai ai Faalapotopotoga e ala i le faasiliga o tupe mama po o dividends lea ua mafai ai ona faatupeina le Tala Faaopoopo Muamua. Ua ausia uma la matatia ia e lima o faiga faavae a le Malo aua le sini autu mo le tatou tamaoaiga, se i vagana ai la le vaega lona ono o faiga faavae.

**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

O le uunaia o le faaleleia o tupe maua a le Malo. E ui o lo o solosolo lelei pea le aoina o tupe maua a le Malo 2016/2017 ia ma ausia tapulaa faatulagaina ma ova atu, ae i ai lava le atugaluga faa-Suetusi a lou nei sui usufono. O lo o i le lipoti o faamatalaga o tupe 2016/2017 le vaegatupe e \$92.7miliona o aitalafu tuua e le o tuuina i totonu o faamatalaga o tupe pei ona tauave mai i le Lipoti a le Suetusi. O le luitau muamua lava lena lea na matou tuuina i le Afioga i le Ofisa Sili o le Matagaluega o Tupe. E talitonu i le tomai ma le silafia o le a mafai ona foia i lo tatou taimi lenei faafitauli. E le o se faafitauli i le 3 pe 5 tausaga talu ai, o le faafitauli ua leva ona tauave mai. E tele tausaga ae sa le i faia i ai se tatou tonu. Ou te talitonu la a tatou toe tuu atu i le isi Paeaiga e omai latou e fai, e lagona a lea o lou faanoanoa, aua foi e le mafai e le Suetusi Sili ona tauave ana lipoti ia, e tauave mai pea i le isi tausaga ma le isi tausaga se i vagana ua fai i ai se faatinoga ma se faaiuga e fofo ai le faafitauli. O le fautuaga, ina ia i ai nisi faapitoa pau lava lea o le galulue i le lisi lea ma se tasi o le Ofisa o Tupe e lisi mai po o a aitalafu ua ova i le 20 tausaga, po o kamupani po o tagata taitoatasi ina ia tusiese pe write off le uia o auala masani i tulaga faapea, aua e talitonu e le iloa po ua leva ona tapunia nisi o kamupani o i ai i le lisi. O le naunautaiga lava ia o le Alataua Sisifo, ia fai se fofo i le tatou taimi.

Lau Afioga i le Minisita mo Galuega, faafetai tele lava, e matau atu o la e ua amata le galuega o le matou auala taavale i Neiafu, ae i ai ma le fautuaga. E matauina pe a ou alu nei i Savaii i lau matau i konekarate tetele foi nei e faia galuega ia o le moaina o le vao ma le faamama o autafa o le auala. E faataua i lou mafaufau le faasoosoa atu i le lautele o le atunuu o le tamaoaiga. Why distribution of wealth. Ona i ai lea o se lagona, ae a pe a faamatuu atu i tua i nuu galuega nei, latou te faatinoina le moaina ma faamama autafa o alatetele. A faapea e i ai le nuu e le faia le latou galuega, atonu o i ina o le a faaoga ai loa se konekarate aua e uma ane pe na o se tolu lava i le fa ni nuu o le a faaoga i ai se konekarate moa auala.

**FOFOGA FETALAI:** Tulai mai le Minisita mo Galuega.

**Susuga Hon Papaliitele Niko Lee Hang:** Lau Afioga i le Fofoga Fetalai, ou te le fia faauilavea i le saunoaga matagofie a le Afioga i le Taitaifono o le Komiti o Tupe Maua ma Tupe Totogi, ae ua ou tulai atu ma le faaaloalo i le tulaga lea e saunoa i ai le Afioga a le Taitaifono, o lea ua ave o lea foi ua tapena le LTA ona e lua tausaga o konekarate ia e faatino i le taimi nei. O lea foi ua fai le fautuaga pei ona e saunoa i ai, ave pea la le avanoa e fai se survey i nuu ma afioaga, pe mafai ona faatino e latou galuega ia, aemaise lava la lumafale o aiga i totonu o nuu ma afioaga. A o le vaega lea na o vaomatua, e tataua lava ona fai e konekarate. A o le vaega lea e agai mai i ai lau saunoaga, o la e ua tapena i ai, faafetai.

**Afioga ALIIMALEMANU ALOFA TUUAU:** Faafetai tele i le Afioga i le Minisita i le tulaga ua oo i ai fuafuaga mo se mea o lo o nanau i ai le mafaufau i le faasoosoa atu i le lautele o le atunuu o tamaoaiga.

**23 IANUARI 2019**

**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

Ona oo atu lea o se faamatalaga i mea nei o auala galue, e i ai se fautuaga, a oo ina sua auala o nuu, aua ou te iloa leiloa pe toetiiti oo atu ma le isi faasologa lena i le matou itumalo, ona ave lea i ai o le maliega, e tataua ona tausii lelei e ia nuu auala galue, aua e matau atu, e uma ona sua ma faatino galuega lelei i auala, ae toe faatalitali mai foi nuu, e toe o atu foi le Malo e toe maintain ma toe faaleleia. E tataua ona ave le ownership, ave i ai i nuu ma afioaga e ona auala nei, tuuaia le aualatele o le Malo, a o le auala galue, ina ia fai ma latou galuega le faamama o auala galue nei, nai lo le uma o le tolu i le fa tausaga ae toe tagi mai foi i le Malo e toe sua auala nei agai i uta. Ia i ai se contribution, ia i ai se latou fesoasoani i meatotino nei, aua o afioaga lava nei e faaogaina nei auala i le tele o taimi. O i foi tatou te iloa ai pe a toe talosaga mai i le isi sefulu tausaga i le faaleleia o auala pe sa fai i ai se latou galuega pe sa tuu lava e faavaoa se i toe alu atu le masini e sua ona toe fai lea ia lelei.

E faapena foi la se lagona lea sa tau avatu nei i le moavao i konekarate fai auala. O lo i ai aiaiga o faiga faavae o auaunaga o le procurement of services, ia e talitonu o lena e faataua le quality o galuega ia faapea le tau. E talitonu foi e tele taiala mo le faaogaina o auaunaga i galuega tetele, e aumai e tatou paaga mai fafo, ma e tataua ona tatou usitaia. E faapena foi isi atunuu laiti uma.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioaga i le Fofoga Fetalai...

**FOFOGA FETALAI:** Tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** E faamalo i le sui usufono i le lagalaga mea lelei, aemaise lava le tulaga lea i le fautuaina o nuu ia teuteu ia latou auala galue ia ua uma ona fausia e lo tatou Malo ina ia umi ona lelei. Ia o lea foi ua aumai se manatu lelei e le fou ae sa aumai foi isi fautuaga pe mafai ona tuu atu i nuu e teuteu e latou. Ae o le ki atoa o mea ia, o le pulenuu. O latou ia o lea e lafo atu i ai ia le faatuatuaga o le tatou Malo.

E pei foi ona silafia o lea sa fai le fonotaga a pulenuu ma le Kapeneta na ou ave i ai ni nai fautuaga faatama i le faatinoga o le latou galuega. O le faafitauli lea e faafeagai pea ma le Malo, o le o mai o toeiina foi lea ua toetiiti lava le toe aoga. Ia ma o le manaia ia o le ata na pue, o le matou ata na pue, ae ou tilotilo atu, .... se o toeiina uma ua litaea ua tataua ona litaea. Ae o latou uma lava nei o lea e faatuatua i ai le Malo i mea nei.

E i ai le tausaga na totogi ai e le Malo, e le gata ona fai auala galue toe totogi e le Malo ia tupe e ave ao ou Minisita o Tupe i le taimi lena e ave e fesoasoani ai i nuu e teu o latou auala galue. O le mea foi lea o le o taulelea e teu ia auala galue ae totogi. Ua le gata ina o atu le Malo e fau ia le auala galue, ae toe avatu ma le tupe e totogi ai taulelea e o e fau le auala galue e teuteu le auala galue. Ia o le mea la ua tupu, ua alu alu lava, alu atu asiasiga, maua ai faamatalaga a le tele le tupe e aumai, toefe matou toe o e teu le auala galue.

**23 IANUARI 2019**

**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

E pei e foliga mai foi lea ua toe o atu le Malo e fau le auala galue toe o atu foi toe avatu tupe e uunaia ai nuu e o e faatonu taulelea e o e teu latou auala galue, tipi ai loa i ina, le toe avea se tupe. O lea ou te manatunatu i le mea lea o le tuu atu foi i nuu e o ane latou e teu auala, e leai lava se eseese ma le mea lea na avatu ai tupe e teu ai auala galue, o lona uiga, o isi foi tupe e lafo i le sami. Na ona lafo atu lava ae vaai atu o la e leaga lava auala. O le mea lea, taatia mai pea, o le tele o manatu ia e aumai ua foi mai ai le Malo, ae le mafai ona lelei mea ia pe a le sui atoa le filifiliga o latou e omai e avea ma Sui o le Malo i le alu lava i le feagaiga tuai, se tuu i ai le Sao o le nuu, si toaina e alu e nofonofa ai ma le faletua foi o le faatumutumuga o le nuu e alu e nofonofa ai i o. E fiu lava la e fai atu mea ia, ae a le suia le tulaga e tofi ai tatou Sui o le Malo, o le tulaga lena na o tupe lava e togi i le sami. O le mea lena e tupu, ma e fesoasoani foi ia i tatou, tatou o foi tatou e faafono tatou nuu ma o tatou itumalo ma avatu i ai le talaiga o le talalelei. A fia faaleleia mea ia, ua tatau foi ona sui le fililiga o tatou pulenuu po o Sui o le Malo, e le gata i tama ae faapea foi tina. O lea sa ou faamanino pe ua silia nei i le 10 tausaga talu ona lua fonu. Ua le gata o le fonu a pulenuu pei ona masani ai mai aso o le nofo kolone, a o lea foi ua fai ai ma le fonu a pulenuu fafine, po o Sui o le Malo. O i ai lava galuega e faapitoa i tina latou, e aofia ai le faamama o nuu, faamama o aai, faamama o fale, aemaise le tausiga o le fanau e o i aoga i le tulaga tau le soifua maloloina, ia ma tulaga masani o le fai o le siapo ma lalaga le ietoga.

O le mea lena na ala ai ona fai le isi fonu lea, ae i ai foi ma tulaga faaletonu la e aliali mai ai i le mulimuli lava i le fausaga tuai lea e o ai lava tatou, ua tatau ona sui le mea tatou te o ai, ma o le tulaga foi lea sa ala ai ona feiloai le Kapeneta ma pulenuu po o Sui o le Malo, tamaitai ma alii ina ia aua ne i tuua le tuualalo, le fautuaga i o tatou nuu ina ia faaoga tatau seleni a lo tatou Malo o lea e fai ai tatou alauni. Lau Afioga i le Fofoga Fetalai, o le tulaga lena, ae tatau foi ia i tatou o faipule ona fai ma tatou o tatou te fonu i tatou nuu ma taulogologo i ai nisi o mea ia tatou te talanoa i ai, nai lo le mea lea o nisi faatoa alu atu lata i le palota, o la foi e popoto latou e matau mai lou faatoa alu atu, ina o le a lalata ina fai nisi a tatou suega.

Lau Afioga i le Fofoga Fetalai, o le fesoasoani atu lena e faamalo i le sui usufono o lo o saunoa nei.

**FOFOGA FETALAI:** Malo. Tulai mai le sui usufono o lo o saunoa.

**Afioga ALIIMALEMANU ALOFA TUUAU:** Ia, faafetai mo le faamalamalamaina atili o lea mataupu. Atonu o lea sa le talafeagai i lena vaitau, ae sao le saunoaga, ua tatau ona sui i lenei vaitau ma tatou talia suiga o lo o taumafai atu i ai.

O le mataupu lea sa ou fia talanoa atili e aua atoa i ai se talanoa i lenei afiafi, o tulaga ia i aiaiga ia e aumai a tatou paaga mai fafo, lea e faatino ai le faatauina po o le procure ina o auaunaga. Ua masani foi tatou i tulaga e tele ia o aiaiga e aumai a tatou paaga aua leaga o latou e i ai tupe. Sa ou faigaluega foi i ia ituaiga ofisa, ma o mea lava ia e mulimulitaia i se faiga o se galuega.

**23 IANUARI 2019**

**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

Ae peitai ua oo mai i totonu o le Malo, ma ou matau ma ou vaavaai ae le na o le tatou atunuu foi ma atunuu laiti faapea foi le lalolagi atoa, ua avea nisi o aiaiga nei, e i ai lava auunaga e talafeagai i ai donor restrictions nei, ae ua i ai foi isi tulaga ua le mafai ai ona faasafua atu ma faasoasoa atu i le lautele o le atunuu le tamaoaiga, ona e le ausia e latou tulaga e tatau ona latou ausia ina ia mafai ai ona latou tauva pe mafai ai foi ona latou maua galuega. E le o ia te au se tali atoatoa i le taimi lenei, ae i sou vaivaiga, pe le tatau ona tatou toe iloilo i faiga faavae mo sini autu o letatou tamaoaiga pe a oo ina toe iloilo ina ia mafai ai ona faalautele le faasoaina o le tamaoaiga ina ia maua ai avanoa mo i latou e mamao i tua ma le taulaga faapea foi nisi e le o oo atu i ai le faasoa, ae aua foi ne i tatou o ese mamao ma taiala. o le naunautaiga lena o le wide distribution of wealth. Ona faauma ai lea o se tala i lea tulaga.

Lau Afioga i le Minisita mo Pisinisi, Alamanuia ma Leipa, faafetai lava malo mo le filifiliga toa, ou te talitonu o le isi lea faaiuga matua sao lelei lea a tatou le faia o le tatou vaalele. E pei ona folasia e nisi o sui usufono le manaia o le lua pe tolu ni a tatou tatou vaalele e faapaleni ai e le isi vaalele pe a i ai se faaletonu i le isi route po o le isi foi vaalele. O le tele o le lele mai o vaalele i totonu o le atunuu o le atili faatupulaia foi lea o le tamaoaiga, aua o lea ua faamauina i faamaumauga a tagata maimoa mai fafo, o le tulaga lea sa uunaia ai le tamaoaiga o le tatou atunuu.

I se faatalatalanoaga a le Ofisa lea o Tagata Maimoa Mai Fafo, o le latou tala mai e 56% le occupancy rate po o e o lo o nonofo i faletalimalo. Lea foi o lo o maua i lipoti a le Ofisa o Fuainumera Faamauina, malo lava. Manaia tele le suiga lea ua sau ai a tatou lipoti ia mai le Ofisa o Fuainumera Faamauina. E manaia aua foi o la ua iloa ai i ina po o a fua o faatoaga la sa tele i le maketi, o le latou saofaga i le tamaoaiga ae faapea foi le aofai o e nonofo i faletalimalo. Faafetai mo le auunaga. Ona toe foi mai lea o le tala lea i pasene ia o e faaogaina faletalimalo, e talitonu i faatalatalanoaga, o le occupancy rate lea po o le faaogaina, e matele lava i faletalimalo tetele, o lea tatou te matauina foi lava, o le Taumeasina, le Aggies po o le Tanoa. A o nai faletalimalo laiti po o le faaleogalua e tau le ausia le 40% o le occupancy rate. O le faafitauli ina ua fesiligia le Ofisa o Tagata Maimoa Mai Fafo, ona o le taugata po o le le ausia foi o standards, matatia e tatau ona i ai faletalimalo. O isi pisinisi faatoa faailoa lava i le Ofisa o Tagata Maimoa Mai Fafo a ua uma ona fausia. Ou te talitonu o lea e aoga fautuaga lea a le Ofisa i mea ia ua tutupu mo faletalimalo o fougou e fia fausia. A o se manatu e fia avatu, o nai isi la faletalimalo ia sa ala ona o e fai ia auunaga e faatino nei pisinisi taugata ona o le taumafai ina ia fesoasoani i le tamaoaiga o le atunuu. Peitai, ua le ausia e latou ia tulaga. Ou te talitonu o le naunautaiga o nai foi nei tagata ia i ai so latou sao i le tamaoaiga o le tatou atunuu ae o lo o faaletonu lava le aofai o e mafai ona faaogaina faletalimalo. Ona i ai lea o se manatu, pe a pe a toe silasila i ni auala e fesoasoani ai ina ia faaauau pea ma faateleina le sao i le tamaoaiga o ia pisinisi faaleogalua po o pisinisi laiti.



**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

Faafetai mo avanoa faigaluega faavaitaimi lau Afioga i le Minisita. E lagona lava le faafetai i avanoa aemaise mo matou e mamao mai Savaii. Atonu e malie ia te outou, ae mo si o matou nuu i Savaii, na ona foi mai lava o le toasefulutasi lea na o i le tausaga na tea nei ono loa taavale fou i le matou nuu i le vaiaso lava lena, lima fale na toe faaleleia e i ai ma fale fou. O le fiafiaga sili, o le vaai atu lea i le i ai o le suiga i le siitia o le tulaga ua i ai nai aiga ia limavaivai a nai tagata i tua. Faafetai mo ia polokalame matagofie.

Ona oo mai lea o se tala i le Minisita o Tagata Faigaluega a le Malo. E matau atu le tele o Ofisa Sili o Pulega faapea foi Pule Sili Lagolago i le polokalame lea mo le fesuiaiga mai lea taimi i lea taimi mo Ofisa Sili o Pulega po o Pule Sili Lagolago. E masani lava ona faapea le Ekalesia Metotisi pe a fesui ai latou faifeau, ia e fesui ai laau o le faatoaga. E lelei la le faifeau aua e sau mai le isi nuu alu i le isi nuu a o la e faaoga pea le tomai. A o le manatu lea e tau avatu, pe le tagatagai tatou po o le a se auala tatou te faaogaina ai pea le tomai ma le silafia ma le agavaa o tulaga o Faaluuluga o Matagaluega ia ua uma konekarate ae tele investments a le Malo na alu ai. E lelei suiga e fesuisui ai, ae pei o le manatu lea e tau avatu, o le tele o le tomai ma le agavaa lea ua o atu nei saofafai mai tua, e lelei lava pe a o atu loa faipisinisi, ae pe leai se fuafuaga ina ia faaoga ai lea tomai, pe faakonesale, po o le a lava se faiga a ia tapue mai le tomai lea ma le agavaa ua le toe faaogaina ona o tulaga lava i suiga o tatou konekarate, o le mea e talafeagai. Ia, toe tasi lau Afioga i le Fofoga Fetalai, ona ou oo mai lea i le Falemai, i le aoga o le polokalame lea o le PEN, faafetai. O lea sa faatino e le kamupani lea o le Digicel nisi o ia tulaga. O le matau atu pei ona laga i se fesili a se tasi sui usufono ia tupe ia i le Ofisa o le Falemai, o lea e i ai le \$2milion mo le aveina o gasegase i fafo. O lea foi sa taua e nisi o sui usufono le prevention programme, le faataua, aua e talitonu lava e siisii lava i luga e oo atu i le \$10milion a tatou tupe faaalu, aua o lea ua oo atu i le \$8milion mo le auina o gasegase i fafo. Ona i ai lea o se vaivaiga i polokalame ia pe a pe a outsource, avatu i tua, aua o lea e matau atu pau lava le galuega lea e o atu fai o le fua o le toto, fua le suka, fai i ai lapataiga foi ia, pe refer i le fomai pe afai ua tuga se tulaga o i ai, o mea e mafai ona aoa ma faaoga i ai komiti po o ni groups foi e faatinoina le prevention programme, aua e matau atu e toagaogao le aufaigaluega i alii ma tamaitai fomai, e le o mafai foi la ona lautele atu i tua le prevention programme, se i vagana ai le National Kidney Foundation lea latou te taumafai pea e fai lea auaunaga ina ia faalauiloa pea a tatou faamai le pipisi lea o lo o toatele ai le atunuu o lo o aafia ai.

Ia, ona faauma atu ai lea o se faamatalaga, lau Afioga i le Fofoga Fetalai, o le miti lava ia a le Alataua Sisifo mo le isi 20 tausaga pe a oo ina gasolo mai isi augatupulaga, o le tuufaatasia atoa ai lea o a tatou alagaoa, mobilize a tatou resources ae faasoaso atu i se tulaga e faaso lautele i le mamalu lautele o le atunuu e ala i auaunaga ae tatau ona siitia le tomai, e tatau ona i ai galuega e tatau ona fai, ina ia mafai ai ona faatino lea tulaga i le isi 20 tausaga o i luma.

**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

Ia ona faauma lea o lau tala i le matou manao toe faamanatu, lau Afioga i le Minisita o Aoga ma lau Afioga i le Palemia, e toe faamanatu atu le faleaoga o le itumalo o Alataua Sisifo, e talitonu o lena e ave le faamuamua i a tatou taaloga o le Pasefika, ae le uma pea le taulogologo ona o mea e tatau lava ona faatino.

Lau Afioga i le Fofoga Fetalai, ua taoto atu se manatu o lenei itumalo. Ona i ai lea o le taofi, o le a foi le leo o le Alataua Sisifo. O le a se upu ua le taugamalie i le faafofogaaga, ia tofamalie ma uta malie, ae se i tali atu lava i nai fesili laiti ia sa i ai.

O le fesili i le vaegatupe faaopoopo i le falemai i le \$5.7miliona po o se vaega lea mo le toe tuufaatasia o le auunaga, o le tali e leai. E \$3.7miliona mo le siitia o tofogi o le afaigaluega lea e 1,022 le afaigaluega a le falemai, ae o le \$2miliona pei ona ou taua mo togafitiga o gasegase e auina atu i fafo, lea ua atoa ai le \$8miliona o tupe faamatuu atu mo le auunaga.

O le isi manatu o le tulaga lea i le Lipoti lea e taua ai le Labour Act 1972. O le mea foi lea e tupu pe a saosaoa tele le tekonolosi, atonu ua misi i le failautusi ona tuu i ai ma le Tulafono Toe Teuteu o le 2013, aua o lena e i ai le amendment o le Labour Act, lea foi sa laga mai e se isi po o le a le tulaga o brackets la e i ai le \$165,000 ia o le faaitiitia o tupe alu i le polokalame a le Matagaluega o Tupe. O le typical error pei ona taua, ai ua vavevave tele le topeina o le taina o le lipoti ae sa le tatau ona i ai lena faaiuga i tafatafa o le \$165,000.

Ia, alofagia e le Atua lau Afioga i le Fofoga Fetalai, ia maua lou malosi, maua lau tofa aua le faatautaiga o le Maota o Samoa. Ia agalelei le Atua i lau Afioga i le Palemia, le Sui Palemia, Afioga i Minisita faapea Minisita Lagolago, maua foi se malosi o lenei Itu o le Maota, faapea sui o Matagaluega ma Faalapotopotoga o lo o tatou mafuta i lenei afiafi. Ia folau i lagima le sa o Samoa.

Lou itumalo o Alataua Sisifo, ia faamanuia tele le Atua i le tatou itumalo. Faafetai i le Sui Failautusi ma le Ofisa o lo o tautuaina le Palemene. Soifua.

**FOFOGA FETALAI:** Malo faafetai saunoa i lau Afioga i le Taitaifono o le Komiti o Tupe.

Ma o le avanoa foi lenei ou te tapa ai lau Afioga i le Palemia ona o lea ua oo mai i le saunoaga a le Malo e talifuaitau i nisi o mea sa laga e sui usufono mamalu. Ma lou faaaloalo.

**Susuga Hon TUILAEPA AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI:** Faamalo i lau Afioga faapea foi le paia maualuga i le Maota nei. Ua faafogafoga le mamalu o le atunuu faapea foi le Kapeneta i a outou saunoaga i fautuaga ua faamauiina. O lea foi ou te matau e i ai vaega o nisi o mataupu sa laga ua maea foi ona talifuaitau le Kapeneta e faamanino a o faagasolo saunoaga a le tatou Maota nei.

**23 IANUARI 2019**

**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

Ia ma o lea la ua agai mai i le Kapeneta nei e talifuaitau i nisi o mataupu sa laga, ma e i ai le taofi o le a faagasolo loa le tali faasolosolo a le Kapeneta, ma i le tulaga masani o le a amata mai i le Minisita mo Fesootaiga ma Faamatalaga Tekonolosi ona sausaunoa i nisi o vaega. O lea foi ou te matau e le o se Tala Autu o le Tupe e tele, o si tamai tala faaopoopo lava laitiiti o le Tala o le Tupe. Ia e le tele foi ni mea matou te tali atu ai aua e le tele foi ni mea na laga mai. O mafaufauga lelei ma fautuaga na tuuina mai, o lea ua faamaumau uma i lalo, ae o le a agai i ai le Kapeneta e silasila totoa i ai. O le ala foi lena o lea sa valaauina ai Ofisa Sili o Pulega e auai ma faafogafoga mai i le faaaliga o outou finagalo tuusao mai ina ia faigofie ona latou tapenaina le fautuaga mo le faatinoina o nisi o outou finagalo ua opea i lumamea. Lau Afioga i le Fofoga Fetalai, o le itu taua lena o le valaauina o i latou nei. O nisi o i latou e i ai malaga semeamanu e malaga ai i lenei vaiaso, a ua taofia e le Kapeneta e aua ne i malaga a o lea e Fono le Palemene. E leai nisi o toe aisili, o outou lava o tootoo o le atunuu, o outou itumalo lea ua fofoga le atunuu i outou finagalo faaalua ma faapena foi ona talifuaitau le Kapeneta ma faasolo atu ai lava ina tatou agai i le auiliiliina o mataupu taitasi o le tatou Tala Faatatau Faaopoopo o le Tupe. Ia ma o le tulaga lena o lea o le a amata ai loa le matou galuega, o le a saunoa le Afioga ia Afamasaga. Ia o nisi mea o totoe pe a o i ai ni mea o totoe ona ou talituaa atu lea e tali atu, ae a oo mai foi ia te au ua leai se mea, ia tatou o sao loa i le auiliiliina o le tatou Tala o le Tupe. Ia manuia tele le tatou po.

**FOFOGA FETALAI:** Malo faafetai ua faafogoga le Maota ma o le a faapena ona fai. Tulai mai lau Afioga i le Minisita mo Fesootaiga ma Faamatalaga Tekonolosi.

**Afioga Hon AFAMASAGA LEPUIAI RICO TUPAI (Minisita mo Fesootaiga ma Faamatalaga Tekonolosi):** Faafetai atu i lau Afioga i le Fofoga Fetalai mo le avanoa, faamalo foi le tauatai i lenei itula o le afiafi i le mamalu o le Fonousu a Samoa, e le gata i sui usufono mamalu o le Palemene ae faapea foi Afioga i Ofisa Sili o Pulega eseese ma ofisa ua mafai ona tatou mafuta i lenei afiafi.

E manatu o lea ua maea ona lafo le tupemua o le taulafoga i lenei afiafi i le tali atu a le Malo i finagalo sa faaalua i mataupu foi sa lagalaga i finagalo o sui usufono e ala i le saunoga matagofie a le Afioga i le Palemia e tomua ai le matou tali atu a le Malo. E tatou te muaau ma tumua ae muliaumasealii i le alofa ma le agalelei o le Atua o lea ua magoto foi le igafo i lenei vaega o le galuega e lagolago ai le Tala Faatatau Faaopoopo Muamua o le Tupe 2018/2019. Ia, ona faapea lea o se matou faamatalaga, e le tele tele ni mataupu na lagalaga i la matou matafaioi. Na o le lua ni nai finagalo sa faaalua i le tulaga o auunaga tau telefoni. O lo o ou faitau nei ma ou tilotilo i se lipoti sa faapena ona tapenaina e le Ofisa o le Pule Faatonu i le masina o Tesema. Mai le masina o Iuni 2018 i le masina o Tesema 2018, e 101 pou fou na faatutu o le auunaga tau telefoni i totonu o Upolu ma isi motu e oo atu i Salafai mo le faaleleia o le auunaga.

**23 IANUARI 2019**

**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

E manatu masalo ai o le tulaga lea ua le tele ai ni finagalo lagalaga ona o lea ua tele ina faasopolia lo tatou atunuu i le auunaga tau telefoni. Ua outou faafofoga foi i nisi o saunoaga i le tulaga o le vave o le initaneti ua i ai nei, ia, o le tulaga lena pei lava ona outou silasila foi i le Saunoaga o le Tala o le Tupe, o lo o faapena ona faafetaia ai le tulaga o le auunaga faatekonolosi ma fesootaiga, ona o se tasi lea o vaega tele o lo tatou tamaoaga ua faapena ona maua ai i lenei taimi.

O le ono masina muamua talu ona ki le tatou uaea lea o le Tui Samoa ma faaaogaina, e oo atu i le 5% o le tatou tamaoaga ua faapena ona maua ai mai auunaga nei. O se tasi lena o itu aupito sili ona lelei o lo o faapena ona atagia i tulaga tau fesootaiga, aemaise ai le taumafai pea o le Malo ina ia faataunuu auunaga nei o uaea e fesootai mai lalo o le sami. E le na ma le laina ma o lo o outou faafofoga pea i polokalame ma saunoaga i le Afioga i le Palemia, o le Taitaifono foi lea o le tatou Komiti o auunaga faatekonolosi i totonu o le atunuu i ana polokalame i luga o le 2AP ma le TV i vaiaso taitasi. O lo o faaalu atu ai pea le tele o auunaga i le tele o le tekonolosi o lo o taumafai e le o na ma le laina lo outou faafofoga pea i polokalame ma saunoaga a le Afioga i le Palemia. O le taitaifono foi lea o la tatou komiti o auunaga faatekonolosi i totonu o le atunuu, i ana polokalame i luga o le 2AP ma le Televisi i vaiaso taitasi. O lo o faaalu atu ai pea auunaga a le Tekonolosi o lo o taumafai. O lea foi e faatali la tatou uaea lea ua amata ana galuega e taunuu mai i le faaiuga o le tausaga nei 2019. O le tatou uaea lea e sau mai Tahiti, ona atili ai lava lea ona faaleleia le faavavevave aemaise le faataugofieina o la tatou auunaga i le internet i totonu o le atunuu.

O le tele o le itu lelei o le internet faapena foi ona lagalaga finagalo i itu e faapena ona taumafai ai pea le Malo e puipuia o tatou alo ma fanau ma tatou uma. E oo lava i auunaga i totonu o pisinisi ma le Malo, Shada Security. Ona o le tele foi, e moni lava e tele itu lelei ma itu aoga, ae le mafai foi ona moemoenoa i latou amio leaga o lo o taumafai e faaleagaina lenei auunaga taua. O lo o agai pea i luma le taumafai a le Malo i ia itu uma.

Ao le fautuaga lava ma le tuualalo pea e pei ona faafofoga ai foi i nisi o sui mamalu o le Maota, e talosagaina lava totonu o aiga, o le amataga lava lea, ma le faavae foi lea o le puipuiga, ma le tapueina o le fanau ia faapena ona iloa faaaogaina le initaneti faaaogaina telefoni ma faaoga tatau. Matua e tusa lava pe tou te le iloa faaoga le initaneti, ia e talosagaina pea ma tuualalo le Malo e tauala atu i le Matagaluega ina ia faapena ona vaai ma faatapulaa le taimi o tamaiti, aemaise lava i le mea lea o le moe o le tamaititi ma le telefoni. E pei o itu ia o lo o faapena ona amata ai ona faaoga sese nei auunaga taua. Ao itu tau le aoga i aoaoga, o le aoga i itu tau le soifua maloloina, o faamaumauga o faamatalaga uma, aua le agai i luga o le atamai ma le poto, ma saili ai foi pe faapefea ona faatino i ni tulaga lelei ma sili atu nisi o galuega o lo o i luga uma o le initaneti. O le fautuaga lava lea i lenei taimi ao taumafai atu le Malo i itu uma e puipui ai nei auunaga.

**23 IANUARI 2019**

**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

Faamolemole matua o totonu lava o le aiga. Pulega a alii ma faipule, manaia nisi o nuu e faalogologo atu ua i ai ia tulaga ua faatulaga ai, ina ia puipuia ai le tele o i latou o lo o faaoga sese luga o le facebook, i le faaleagaina ai e le gata i totonu o nuu ao le Malo. E manatu o nai faataitaiga lelei ia e mafai ona silasila i ai le tele o afioaga, ina ia faapena ona taumafai pea e tausii le filemu o lo tatou atunuu. O lenei foi taimi ao taumafai atu le auauanaga a le 2AP, ua toe faalelei le pou tele o lo o i tai i Mulinuu i autafa ane o lo tatou Ofisa. E faamalulu atu o le tele o lo tatou atunuu o lo o faapena ona taumafai mai ma fesiligia le le oo atu o le auauanaga i nisi o itu i nisi o taimi aemaise lava i polokalame a le Afioga i le Palemia o lo o taulogologo ai i mea a le Malo. Ona ua outou le faafofoga i ai, o lea ua toe faaleleia la tatou pou. O le pou lea o le auauanaga a lo tatou ofisa faasalalau o le 2AP, e le gata i Samoa nei, ae o lo o faapena foi ona faafofoga mai ai Amerika Samoa, Tokelau, Niue e oo lava i Manua. Ua i ai foi itu o Hawaii ma Taihiti ua faapena ona logoina mai, o lo o faalogologo pea i le alaleo lea a le 2AP. O se taimi o le masina o Iulai, Aokuso ua faamoemoe e faamaea ai lenei galuega. Ao le taimi lenei o lo o i ai le pou le tumau o lo o faaogaina mo lea itu o tatou fesootaiga ma faasalalau. O lo o taumafai pea le atinae fou a le Malo, e pei ona outou faafofoga i ai o le Digital TV. E faamalulu atu, ua tuai i le tele o nisi foi o sui mamalu o lo o musumusu mai i le tele o televise ma faasalalau i totonu o latou afioaga, ona o lenei taimi o lea ua tatou sui i le suiga fou mai le tulaga tuai sa i ai faasalalau i le analog, o lea ua o tatou oo atu i le digital. O le taimi lenei o lo o fausiaina, o le faamoemoe o se taimi e le i oo atu ia Iuni ua faapena ona amatalia faasalalau i le vaega muamua, Phase one, i totonu o le taulaga ona faapena lea ona faasolosolo malie atu i tua. E oo atu i le faaiuga o le tausaga ua faasopolia lo tatou atunuu. O le faamoemoe maua i lea faapena ona faaleleia ia itu uma i faasalalau ia faigofie ai lea ona tatou matamata i ni ata lelei, ia faapena foi ni faasalalau manino. O le naunautai lenei o lo o i ai nei. E i ai nai itu o lo o tuuaia ai, ona o itu tulaga tau fanua o lo o faatutu ai pou faasalalau, ia faatutu ai masini o lo o taumafai i ai lenei atinae.

E talosaga atu foi i aiga o lo o faapena ona faafofoga mai afai o outou fanua o lo o faapena ona taumafai ai nei atinae a le Malo. E tatalo atu ma le faaaloalo ina ia faapena ona outou lagolago ma tatala le avanoa aua le faavaveaveina, avea ai outou ma faamanuia i le tele o itu o lo tatou atunuu. Lau Afioga i le Fofoga Fetalaia, e pau na o le pau ia o mataupu sa lagalaga i finagalo i nisi o sui mamalu sa faapena ona afea lenei auauanaga. Ae tau lava ina oo sau faamatalaga i lenei itula, ua lau silafia e le mamalu o le Maota nei, aemaise Samoa ato ua maea le auauanaga a se tasi o tamalii sa faapena ona avea ma Ofisa sili o Pulega mo Fesootaiga mo tausaga e tele, o le afioga ia Lealiiee Tuaimalo Ah Samu.

Ou te manatu o se avanoa taua lenei, e faailoa ai le agaga faafetai, o au nei o le Minisita e fai ai ma sui o le afioga i le Taitaifono o le Komiti o Fesootaiga, aemaise o le afioga i le Minisita lagolago ma le Malo e tusa ai ma le auauanaga a lenei foi tamalii.

**23 IANUARI 2019**

**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

E tele lona sao, o lona tomai ma lona agavaa ma lona taimi atoa, o le tele o lona olaga sa faapena ona tautua ai i le Malo e ala i lenei matafaioi, matou te manatu ina ia faamauina i totonu o lenei Fonotaga le agaga faafetai. E faaalua i lau afioga Lealiiee, ia tusa ai ma le auunaga sa faapena ona tautua ai i lou soifua, aua le tautuaina o Samoa, e ala i lenei matafaioi o le faasalalauga. O la matou tatalo ina ia alofagia e le Atua, ina ia faapena ona faamanuia le agai i luma o lou soifua aemaise o si ou aiga, e tautua ai foi i le ekalesia ma le nuu. O a foi nisi tulaga e pei ona faafofoga ai i nisi o finagalo faaalua e faaauau ai pea le auunaga. Ia tatou tatalo i le Atua mo lana faasinomaga ina ia faasino mai mo i tatou uma.

Ona faapea lea faatai se faamatalaga, oo atu sina agaga faafetai i si ou itumalo pele o Aana Alofi Nu 3, e momoli atu le agaga faafetai i la outou tapuaiga ma lo outou nofo tatalo. Ao lo o alo pea lo outou sui usufono e tauaveina lo outou tofi o lo tatou itumalo e tautua ai le atunuu. Ia agalelei le Atua ma ia faapena ona faamanuia pea ia outou uma, faamanuia pea si o tatou itumalo. Ae tatou fai tatalo pea e le gata mo lo outou sui usufono, ae tatalo mo lo tatou Malo ia faapena ona i ai le agaga o le Atua, ma ana faauuga e taitai ai pea le atunuu, aua lona manuia i lona agai i luma.

Lau Afioga i le Fofoga Fetalai, ma le paia o le Maota nei aemaise le faafofoga mai o le tatou atunuu, ua faaiu i i se matou leo, faafetai mo lo matou avanoa faafetai.

**FOFOGA FETALAI:** Faafetai i le saunoaga a lau Afioga i le Minisita mo Fesootaiga ma Faamatalaga Tekonolosi, lau afioga le Matua o le Usoalii. Ua see mai le faasologa i le Afioga i le Minisita o Faamasinoga.

**Afioga Hon FAAOLESA KATOPAU T. AINUU (Minisita mo Faamasinoga ma Pulega tau Faamasinoga):** Ou te faatalofa atu i lenei itula o le afiafi, i lau Afioga i le Fofoga Fetalai. Malo le onosai malo le tauatai. Faamalo atu foi i le Palemia ma sui usufono uma o le tatou Palemene. E faapena foi ona ou faatalofa atu i Ofisa sili o Pulega ma Faalapotopotoga Tumaoti a le Malo ua mafai ona tatou faatasi. Lau Afioga i le Fofoga Fetalai, e le umi sau faamatalaga e le umi foi sau tali.

Ua na o le toalua sui mamalu, sa afea le Matagaluega o Faamasinoga. Ao le lona tolu o sui usufono lea ou te vaai atu e le o i. O le sui lea o Faleata i Sisifo sa faapea ona aumai sana tuualalo i le faagasologa o le faamasinoga. Ae ou te le i faaauaua la lau faamatalaga i manatu o sui usufono e pei ona folasia. E avea lenei avanoa ou te fia molimoli atu ai le faamaisega i le tausi ia Ana ma le nofoalo, ona o le valaau paia a le Atua i le tama ia Pau Sefo. O le sui mamalu o Faasaleleaga Nu 2. Ia alofagia e le Atua, ma le aiga nofo faavauvau ona o lana valaau paia.

E pei ona ave atu i le taimi ua fano, sa fesiligia e le sui usufono mo Safata i Sisifo, le agavaa o tagata e faaulu ai se talosaga mo se Poloaiaga le Tumau. O le tulafono lea o Fanua ma Suafa, lea na afea e le sui mamalu mo Safata i Sisifo. O le tali e agavaa, e soo se isi lava e agavaa i le talosagaina o le Poloaiaga le Tumau lea na taua.

**23 IANUARI 2019**

**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

E pau lava le qualification po o le mafai ona faamaonia i luma o le Resitala e te tau i ai i le suafa pe e te tau foi i le fanua faaleaganuu. O lea e te talosagaina ai le Poloaiga le Tumau. Sa taua foi e le sui usufono mo Lefaga ma Faleseela le faasalaga o le le usitaia o le Poloaiga le Tumau, o le Poloaiga le Tumau lava lea e tulituliloa mai e sui usufono ia. O le faasalaga o lo o i ai nei i le Tulafono i le taimi nei. E gata mai le \$500 pe a le usitaia le Poloaiga le Tumau po o le ono masina i le falepuipui. Ao le tulafono fou lea e fufou mai, ua i ai le agaga o le Matagaluega e sii le faasalaga i luga o le \$1,000, po o le tasi le tasi le tausaga i le falepuipui i le le usitaia lea o le poloaiga le tumau. Ae pe matamata atu foi ma le totoa i ai, e pei e le lava lea faasalaga. O le a tuu atu pea i le komiti pe a ave la tatou Tulafono fou lea, i le komiti e toe iloilo ai lea vaega o le Tulafono. Pe ua talafeagai pe le talafeagai foi. O le sui usufono lea mo Faleata i Sisifo, sa tuualalo faapea e faaogaina ia....

**FOFOGA FETALAI:** Malie le Minisita, sei tulai mai le sui usufono mo Safata i Sisifo.

**Afioga Leana Ronnie Posini:** Faafetai i lau afioga, sa leai se manatu e faalavelave i le saunoaga a le Minisita o le saunoaga malamalama. E pau lava lea o le tuufesili e lavea i lau lauga, lea ua saunoa manino le Afioga i le Minisita, i Poloaiga le Tumau. O lea na ou taua e faapea.....o lea ua saunoa le Minisita e agavaa uma lava i le Poloaiga le Tumau. O lau fesili sa taua i lau lauga, i le mataupu lea e tasi, o se mataupu i se fanua ae toa fa itu o lea e agai i itu o faamasinoga. Afai e agavaa uma itu ia e fa e fai poloaiga le tumau. O lau fesili i lau afioga i le Minisita, pe e leai ni feteenaiga i poloaiga le tumau nei e fa. O lea o le a ave uma i itu faamasinoga nei e fa, ae tasi lava le mataupu o lea e finau ai po o se fanua po o se matai. Ma le faaaloalo.

**Afioga Hon Faaolesa Katopau T. Ainuu:** Lau Afioga i le Fofoga Fetalai, o le agaga o le poloaiga lea le tumau, ia fai se poloaiga. O lea o le a ave i itu faamasinoga nei e fa, ae tasi lava le mataupu o lea e finau ai po o se fanua po o se matai. Ma le agaga faaaloalo.

**FOFOGA FETALAI:** Ia se i tulai mai le Minisita.

**Afioga Hon FAAOLESA KATOPAU T. AINUU:** Lau Afioga o le agaga o le poloaiga lea le tumau, ia fai se poloaiga e taofia ai. Na pau lava la le autu, e taofia ai le faia o se matai, po o se faiga o se fale po o se fuafuaga faapena. E na o le tasi lava la pe lua auala, po o le fai po o le le faia. O le uiga lena o le poloaiga le tumau, e le tumau lava se i uma le faaiuga o le faamasinoga, ona tumau lea. A o le le tumau la i le taimi lea i le va o le taimi e amata ai le talosaga agai i le faamasinoga, o le mea lena e ala ai ona tau e le tumau, ae lua lava auala, po o le fai po o le le faia. E leai se isi auala e ova atu i le lua. O lona uiga la a e alu atu e talosaga e taofi le fale, mo se faataitaiga, na pau lava lena o itu uma e fa ia e te taua i le faamasinoga pe ono, e lua lava itu e i ai, pe faia pe mananao e omai e fai pe le mananao e fai.

**23 IANUARI 2019**

**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

**FOFOGA FETALAI:** Malo faafetai. Se i... po ua maea le...

**Afioga Hon FAAOLESA KATOPAU T. AINUU:** E pei e pau ia o mataupu lau Afioga i le Fofoga Fetalai sa afea ai le Matagaluega o Faamasinoga. E leai se isi o le sui usufono mo Faleata Sisifo lea ua aluese atu. E pei lava o le fautuaga, ia faaoga tatou Faamasino Samoa ia fai ai le faamasinoga o talosaga lea e fofou mai.

**FOFOGA FETALAI:** O lena e manaia, a le malamalama lava le sui usufono alu atu e fesili atu i tai i le Ofisa Sili o Pulega ina ia faamanino le mataupu e faapitoa lava mo lona silafia, ae taua le saunoaga a le Minisita.

**Afioga Hon FAAOLESA KATOPAU T. AINUU:** Lau Afioga, ia alofagia e le Atua ia faaopoopo le malosi aua lou valaauina, faapea foi le Taitai o le Maota po o le Afioga i le Palemia, faapea foi sui usufono mamalu uma o le tatou Palemene. E faapena foi i lenei itula ona ou faamalo atu i le tapuaiga a si ou itumalo o Vaimauga Sisifo Nu.2, faafetai le tatalo, faafetai tapuai, o la outou tapuaiga ma la outou tatalo lea e manuia ai lo outou sui usufono. Ma le faaloalo lava.

**FOFOGA FETALAI:** Faafetai. Ia, ua oo mai le faasologa i le Afioga i le Minisita mo Aoga, Taaloga ma Aganuu.

**Afioga Hon LOAU SOLA KENETI SIO (Minisita mo Aoga, Taaloga ma Aganuu):** E talu ae popoe lau Afioga i le Fofoga Fetalai. Ou te manatu foi o lea ua tuneva le po ne i malomaloa le tamaloa mai Fogaa ona feala lea o aitu o le fanua, leaga o le fanua ma lona tapuafanua, o le eleele ma ona tapueleele. E ui i lea o le a faaogaina le 15 minute ou te tali atu ai e tusa ma mataupu sa laga e sui usufono mamalu o le Palemene nei.

Lau Afioga i le Fofoga Fetalai e le toatele nisi na afea lenei Matagaluega, tasi, lua, tolu, fa, lima, ono. O lona uiga o le isi toatele o le matua faafetaia lava o galuega a le Minisita ma le Matagaluega, aemaise le education sector. O matou e tolu matou vaega, o le NUS, SQA ma le MESC ona taua lea o matou o le education sector. O le saunoaga a le sui usufono mo le Itumalo Tu Taulaga i Sisifo po o lou uso o Faumui, fai mai ua siitia mea o resitala foi nei a le NUS. Faumui e sese le mataupu lea. Vaai po o ai le matua lena na... o le saoga o le mea ua siitia mea foi ia o tuition, po o pili o polokalame la e faapena ona faagasolo i gauta i le NUS. O le mea na ala ai ona siitia ona o le finagalo o le Council i le sefulu tausaga talu ai ina ia siitia pili o tamaiti e fua i resources ma le tele ma le anoanoai o mea e faaogaina i totonu o le NUS aua le aoaoina o alo ma fanau, ae le gata i lea o totogi o faiaoga. O le agaga la lena, o lea la e auuai mai ai e tai lua tausaga ma fai le siitaga. A faapea la o le 2010 na amata ai, o lea la ua 2018, lona uiga la e faafa ona sii, e tai lua tausaga ma fai le siitaga. O le saoga lena, a o le resitala o lo o tumau pea i le tulaga pei ona i ai. O le faamatalaga lena na oo mai ia te au e le VC.

**23 IANUARI 2019**



**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

**FOFOGA FETALAI:** Tulai mai le sui usufono mo le Itumalo Tu Taulaga i Sisifo.

**Afioga Faumuina Asi Pauli Wayne Fong (Itumalo Tu Taulaga i Sisifo):** Lau Afioga i le Fofoga Fetalai, faafetai atu lava i lau Afioga i le Minisita, o le mea taua o lena ua e fai mai ua sii. I le tulaga i le resitala, pei uma lava sa \$200 i le tausaga na tea nei, o lea ua \$325 i le tausaga lenei, vagana la e i ai se isi siitaga e le o silafia e lau Afioga ae pei uma lava o le tulaga lena e i ai. O lena ua e talia mai ua sii, ioe, o lea ua sii, ae na ona tatalo atu faapena, pe le toe tuu i lalo i le \$200 lea sa i ai i lea tausaga se i maua pea le avanoa e mafai ai e matua ona totogi le \$200 i lo le \$325. Ma le faaaloalo lava lau Afioga i le Minisita.

**FOFOGA FETALAI:** Tulai mai le Minisita.

**Afioga Hon LOAU SOLA KENETI SIO:** Ou te le iloa la po o ai o le a ou faalogo i ai? Aua o lea ua aumai le fautuaga, o tagata nei e fautuaina au, o lea e aumai e leai se mea o faapena ona siitai ai le resitala, na pau le mea lea ua siitia, o mea o totogi o polokalame foi nei o lo o faapena ona aoaoina ai alo ma fanau. Ae a faapea o lea ou te faalogo atu i le saunoaga a le sui usufono, e pei a. O lona uiga o la e taumate, pe o sii pe le o sii. Ae ui i lea, o le a ou toe tilotilo i ai lau Afioga i le sui usufono po o sao lelei au faamaumauga, e tusa ai ma le tala na aumai ia te au e le NUS.

O lau faleaoga i Vailoa, e sao lelei oe, o lo o i ai le tulaga e faanatinati le faleaoga lea na malaia i le afi, o lo o taumafai lava i ai le tatou Matagaluega faapea foi ma le Matagaluega o Tupe ina ia faatino lea auaunaga ina ia vave le process pei foi ona matau i le saunoaga a le Afioga i le Palemia, o lo o insure i lalo o le tatou Malo. O insurance company foi, se o le latou amio lava lea o le popoto ia e tosotoso ituaiga mea faapea e uma ifo e le totogia. A o le galuega o lo o fai ina ia vave ona faaauau ma faatino loa le faagaioiga o le faleaoga.

O Gagaiifomaga Nu.3, lau Afioga i le tamaitai sui usufono ia, o lena, e 30% pei ona e taumafai mai i ai i le totogi o faiaoga, e sao lelei oe. Ia matau foi o le tausaga muamua lenei o lea ua faatino ai le tuufaatasia o le tulaga lea i fesoasoani a le tatou Malo i aoga, e \$14miliona lea ua i ai nei, o lea la ua i lalo uma o le one government branch, o lea ua faasoia atu le 30% mo totogi o faiaoga, a o le tatou galuega e faapena, e fetuunai muniao, o lea foi ua aumai lau fautuaga e toe tilotilo i ai ma toe avatu. Ae talosia ia ia talia e le Matagaluega o Tupe, ia ae tuu i luga i le 50% ua manaia tele. A o lea ua maua foi laolao na pei ona e saunoa, ia o le agaga lena o le fautua mai, aua e le faapea e i ai foi se atoatoa ia te i matou, e i ai foi taimi e fesasiai ai, ae aumai le fautuaga, e talia ma le agaga faaaloalo.

O Vaisigano Nu.2, faafetai i si ou uso a sui usufono, e pei ona taua, o lou faleaoga i Papa, o lea ua ou faalogo atu ua faagasolo atu i ai, a o lo o i ai lava faiga faavae e pei foi o le JICA, o le latou matafaioi o aoga primary school a le tatou Malo, e agai i ai lo latou fausiaina. Ai foi e sosoo ma Alataua, ioe, e sao lelei oe si ou tuafafine foi i lau talosaga, e le mafai ona galo.

**23 IANUARI 2019**

**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

E talitonu foi o la e silafia e le Afioga i le Palemia ia ona o le kolisi, o mea patino a le tatou Malo e tataua ona fausia. O lea ua uma ona aumai le ioega a le Kapeneta ma ua uma ona pasia e le Kapeneta, na pau lava le mea o le saili o le seleni, o lea la e fetuunai ai muniao po o fea tonu le mea e aumai ai le donor e faia lou faleaoga. A o la e ua i ai, ae talosia ia ia fai i lenei Paeaiga. Ioe. O lou foi lena faanaunaga, ia fai i le Paeaiga lenei.

Ia, Safata i Sisifo, ia si ou uso a sui usufono, o le tele ia o fesili, se o le taua ia o au fesili, o tausaga uma lava e te lauga ai, e ese lota fia faalogologo, e aumai ai au fautuaga lelei e luitau ai foi i matou nei. O fesili na e fesiligia, o lea ua ia te au tali, o mea o technical issues e mafai lava ona fetuunai, ae a uma nei le Fono ona ta talanoa lea i tua e avatu ai tali. O le mananaia ia o tali a le aualii ia o le VC ma le vaega lea o le SQA, o tali e malie ai lou loto aua na o oe lea na e fesili i ai. Accreditation, o mea ia o aperenitisi, fai mai le aualii ia o polokalame fou o la e faatoa avatu ia latou, atonu la e i ai le taimi e accredit ai. A o le taimi nei, e amata i le tausaga lea, e takes time foi lea, o le isi taimi masalo e lima tausaga ona accredit lea ona maua lea o le tulaga lea e i ai. O le mea lea e fai mai o tamaiti foi nei lea e... o fesasiai lava, technical issues, tamaiti foi nei fai mai na tau muamua atu e faauu ae te i ua toe logo atu mulimuli e le faauuina. E sao lelei lava, a na o au se matua, ia ua afu le VC. E tataua ona matua tilotilo totoa faatoa ave ai le tala i tua. Ae sao oe. O si ou uso mai Siumu, ia o lena foi, o lou malae taalo ua uma ona fai, o lena foi ua uma ona fai lou faleaoga. E a e sao? Vaai la i ai?

**Afioga Faalogo Iosefa Sopi:** Lau Afioga i le Fofoga Fetalai...

**Afioga Hon LOAU SOLA KENETI SIO:** Ia, e pei na pau ia...

**FOFOGA FETALAI:** Malie le Minisita, se i toe faamaea mai lava le saunoaga a le sui usufono mo Siumu.

**Afioga Hon LOAU SOLA KENETI SIO:** Ia o si ou uso lea i Faleata Sisifo, ua outou iloa foi Leala e tele ona mafaufauga, e faatupu manatu mai ana fautuaga mananaia. Ia, Leala, se i e Minisita ona e sau lea, se i e Minisita ona e sau lea fai au mea na. A o le taimi lenei, o le SQA, e i ai lava ona Tulafono ua uma ona faataatia e mandate ai a latou galuega. E le soona oso o le oso oso lava i o oso mai i lalo o le primary level. O le a la le mea a le MESC e fai? O le mea la lea, Leala, na ou fautua atu foi ia te oe i le isi aso, a e le lavea... E ui i lea lau Afioga i le Fofoga Fetalai, o lena le agaga, ae faafetai mo fautuaga ua tuuina mai.

**FOFOGA FETALAI:** Malie lau Afioga i le Minisita se i e saunoa mai i le sui usufono mo Siumu lea e tulai mai pe i ai se mea...

**23 IANUARI 2019**

**Tulafono Tau Faaofi o le Faatatauina o Tupe Faaopoopo (Nu.1)  
2018/2019 - felafolafoaiga faaauau i luga o le faitauga faalua**

**Afioga FAALOGO IOSEFA SOPI:** Faafetai mo le avanoa i lau Afioga i le Fofoga Fetalai. E leai sa... e i ai le manao o si ou itumalo na tuuina atu i le aso lea o le umusaina o le faleaoga o le kolisi lea sa ou talosaga atu ai i lau Afioga o le faatotogaina lea o le faleaoga. Faafetai.

**FOFOGA FETALAI:** Po ua maua mai e le Minisita, o le faatotogaina o le faleaoga o lona itumalo.

**Afioga Hon LOAU SOLA KENETI SIO:** E tasi la lea sui usufono e le oo i tua. O la e ua uma ona ave latou... se i toe siaki tasi lava. O lea na ou fai atu nei fai mai o la ua kiliva atu. Ioe. Ou te ofo alii. Se fai ma o i tua i tou itumalo sole.

**FOFOGA FETALAI:** Ia, ua fautua mai le Minisita e fai ma o sui usufono i tua e vaai tou itumalo.

**Afioga Hon LOAU SOLA KENETI SIO:** Ia pei na pau lea lau Afioga. O le matou itumalo, malo le tapuai o lea lava e malosi le tou sui usufono. Ma le agaga faaaloalo. Faafetai.

**FOFOGA FETALAI:** Malo saunoa. Ia e le uma lava le fia faalogologo i le saunoaga a le sui usufono mamalu. Ae i ai le manatu ona o lea ua tatou taunuu i le taimi e muta ai le tatou galuega, toe lima i le 11. Ia o le tulaga lava ia masani e faamaea ai galuega, ae ou te manatu o le a maua le avanoa e faamaea ai le saunoaga a lau Afioga i le Minisita o Tupe ma le tamaoiga mo le Aso Fono a taeao pe a tatou maua i le aso a taeao e avatu i ai e le Atua lo outou soifua lagimama ma le soifua manuia i le paia o le Palemene se i vaeatu le mamalu o le Kapeneta aemaise foi o Faaululuga o Matagaluega ua tatou faatasi, ua leva lenei tauafiafi ae o lo o faapena ona outou lavapapale ma outou lava onosai. E faapea foi i latou uma o lo o faatino le auunaga i le Fonotaga a le Palemene.

Ae tatou te le i tolopo ou te tapa le sui usufono mo Aana Alofi Nu.2 na te faaiuina le tatou Fonotaga i se tatalo.

*Na tolopo Taualumaga a le Fono Aoaio Faitulafono i le itula e 10:58 i le po seia aulia le itula e 9:00 i le taeao o le Aso Tofi, 24 Ianuari 2019.*